


Bwile Bible Translation



Bwile: Bwile Bible Translation (Bible)

Bwile Bible Translation Bwile: Bwile Bible Translation (Bible)

copyright © 2025 The Word for the World International

Language: (Bwile)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-08

PDF generated using Haiola and XeLaTeX on 8 Jul 2025 from source files dated 8 Jul 2025
3cb4ea97-87a2-5d11-9a6a-710ef2de6afb

Contents

MATEYO	1
2 Tesalonika	56
YAKOBO	60

IMBILA NSUMA YALEMBELE MATEYO

UBULONDOLOSI

Imbila Nsuma ukulingana na Mateyo kitabo kimo mufitabo fine mukipingo kipyä ikilondolola ubwikasi bwakwa Yesu Klistu. Ifi fitabo kila kimo bakita ilandwe. Ikilepilibula Imbila Nsuma. Fyalembelwe panuma yamfwa yakwa Yesu kuli Mateyo, Mako, Luka na Yohani. Abamasambililo tabaisiba ubusiku bwakisinka buntu iki kitabo kyalembelwepo lelo kitunganisiwa ukuti nimunsita ya 60 AD. Kabili nenkende intu kyalembelwepo tayaasibikwa lelo kitunganisiwa ukuti ni mu Palesitini nangu mumusuba wa Yerusalem.

Kalemba ni Mateyo uwali kasonkesya wamusonko lintu Yesu talamwita ukuba umusambi. Limbi isina lyakwe bamwisibe nga Lebi. Mateyo ali niuom pabatumwa ikumi nababili kabilo alembelo bakabelenga baba Yuda. Ifi kuti fyamonwa fyasuntinkanya amalembo yamkipingo kya kale. Ayalefwaya ukulangilila ukuti Yesu ali ni Klistu, Umupususi uwasalwa na Lesa, uo balesesemapo. Nakabili Mateyo alilembele ifingi Pabufumu bwakwa Lesa. Abayunda baleenekela Klistu ukwisaba Imfumu yabufumu bwafikansa. Mateyo alesonsomba apakalamba fintu basuminemo Abayuda mukulondolola Ubufumu bwakwa Lesa ubwamumupasi.

Imbila Nsuma ukulingana na Mateyo kitabo ikisuma ukwambilapo mukipingo kipyä pamulandu nafintu kyasuntinkanya kumalembo yamkipingo kyakale. Kyasuntinkanya ifipingo fibili. Abamasambililo basumina ukuti aleesya ukupasyanya imilembele yaftabo fyakwa Mose ifili fitabo fisano ifyabalilapo mukipingo kyakale.

Imilandu yatantama ngefi

Mateyo ayambile Imbila Nsuma mukulondolola pakufyalwa kwakwa Yesu Klistu nokutendeka kwa bupyungisi ikipande (1-4)

Ikyakonkapo Mateyo aloondolola pabupyungisi bwakwa Yesu namafidisyo ayengi ikipande (5-25)

Mukipande kyakulekelesya aalandile pabupyungisi bwakwa Yesu mumfwa yakwe namukusyukuka (26-28)

Ifikolwe fyakwa Yesu Klistu (*Luka 3.23-38*)

¹ Mu emwakonkanine ifikolwe fyakwa Yesu Klistu, umwana wakwa Davidi, uwali mwana wakwa Abulahamu.

² Abulahamu aafyele Isaaki na Isaaki aafyele Yakobo, na Yakobo aafyele Yuda nabamunina.

³ Kabili Yuda aafyele Paresi na Zara uwaku Tama na Faresi aafyele Esrom, kabilo Esrom aafyele Ramu.

⁴ Kabili Ramu aafyele Aminadabu, na Aminadabu aafyele Naashoni, na Naashoni aafyele Salumoni,

⁵ Na Salumoni aafyele Boazi muli Rahabu, na Boazi aafyele Obedi muli Ruti, na Obed aafyele Yesse,

⁶ Na Yesse aafyele Davidi imfumu, kabilo na Davidi imfumu aafyele Solomoni uwali mwana wamukasi wakwe uwaku Uriyasi.

⁷ Kibili Solomoni aafyele Rehoboam, Rehoboam aafyele Abiya, na Abiya aafyele Asa,

⁸ kibili Asa aafyele Yehoshafati, na Yehoshafati aafyele Yoram, na Yoram aafyele Usaya,

⁹ Kibili Usaya aafyele Yotamu, na Yotamu aafyele Ahazi, na Ahazi aafyele Hezekiya,

¹⁰ Kibili Hezekiya aafyele Manasse, kibili Manasse aafyele Amoni, kibili Amoni aafyele Yosiya,

¹¹ Kibili Yosiya aafyele Yekoniya nabamunina, munsita bapiitilwe mu Babiloni.

¹² Kibili panuma babapiita mu Babiloni, Yekoniya aafyele Shiyaliteli, na Shiyaliteli aafyele Zerubabele,

¹³ Kibili Zerubabele aafyele Abiudi, na Abiudi aafyele Eliakimu, na Eliakimu aafyele Azori,

¹⁴ Kibili Azori aafyele Zadoki, na Zadoki aafyele Akimu, na Akimu aafyele Eliyudi,

¹⁵ Kibili Eliyudi aafyele Eleyaza, na Eleyaza aafyele Matani, na Matani aafyele Yakobo,

¹⁶ Kibili Yakobo aafyele Yosefu muka Mariya, uwafyele Yesu uwitwa Klistu.

¹⁷ Eikyo papitile inkulo ikumi nashine ukufuma pali Abulahamu ukufika pali Davidi, kibili ikumi nashine ukufuma pali Davidi ukufika mibusya mu Babiloni, kibili ikumi nashine ukufika mukufyalwa kwakwa Klistu.

Ukufyalwa kwakwa Yesu Klistu (Luka 2:1-7)

¹⁸ Ifi efintu ukufyalwa kwakwa Yesu Klistu kwali. Nyina Mariya aimenwe kuli Yosefu, lelo ilyo tabalaupana asangilwe ukuti, ali nokukwata umwana ukupitila ku maka yakwa Mupasi Wamusilo.

¹⁹ Yosefu ali muttu uwalekita ifyalungama, eikyo talefwaya ukumukanina palwalala kibili aalepinga ukubwesya ubwimashi mubumfisolo.

²⁰ Kilya aletontonkanya palifi, malaika wa Mfumu amonekele kuli ena mukiloto nokumweba ukuti, "Yosefu, wemwana wakwa Davidi, witiina ukupa Mariya. Pantu umwana Mariya akawkata akafuma kuli Mupasi Wamusilo."

²¹ Akawkata umwana umwaume kibili ukamwinike ukuti, "Yesu pantu akapususya abantu bakwe kumembu syabo."

²² Fyonse ifi fyakitike pakuti fintu Imfumu yalandile ukupitila muli kasesema fifikilisyé ukuti,

²³ "Nakisungu akemita nokukwata umwana umwaume kibili akenikwa Imanuele" (ikilepilibula ukuti, "Lesa ali nafwebo").

²⁴ Eikyo lintu Yosefu asibwike, akitile fintu malaika wa Mfumu amukonkomesye eikyo aupile Mariya.

²⁵ Lelo tabakumenepo mpaka umwana afyalwa elo Yosefu amwinika ukuti Yesu.

Abamano ukufuma kukabanga

¹ Lintu Yesu afyelwe mu musumba wa Betelehemu mu Yudeya, munsita Herodi ali imfumu, abamano ukufuma ku kabanga baisile ku Yerusalem

² nokwisaipwisya ukuti, "Alipi umwana afyelwe Imfumu yaba Yuda? Twakimona ulutanda lwakwe lintu lwakisa kukabanga, twaisa mukumusinsimuna."

³ Lintu imfumu Herodi yaumfwile ifi, yalisakamene kumofye nabantu bambi mu Yerusalem.

⁴ Yaatile basimapepo mukalamba bonse naba kafundisyu bamafunde nokubepusya kuntu Klisu ali nokufyalilwa.

⁵ Bayaswike ukuti, "Mumusumba wa Betelehemu mu Yudeya. Pantu ifi efintu bakasesema baalemba ukuti,

⁶ "Iwe we Betelehemu mukyalo kya Yudeya,

wilaimona ukukepesyapo pamisumba syamu Yudeya,

Pantu muli webo mukafuma intungulusi

ikatungulula abena Israeli."

⁷ Elo Herodi aitile abamano abafumine kukabanga mubumfisolo, ukuti awfawilisyu kuli bena insita ulutanda lwamoneke.

⁸ Abatumine ku Betelehemu nokubebe ukuti, "Kabiyen'i kafwayeni umwana bwino bwino, ngamwamusanga mungisibisyu pakuti nanebo ndeyamusinsimuna."

⁹ Abamano abafumine kukabanga baumfwile fintu imfumu yabebele nokuya. Kibili nolutanda luntu bamwene kukabanga lwatampile ukubatangilila mpaka lwaiminina pankende apaali umwana.

¹⁰ Balitemenwe ngansi lintu bamwene ulutanda.

¹¹ Baingile munjanda, kibili lintu bamwene umwana nanyina Mariya bafukeme pansi nokumusinsimuna. Bamuleetele ifyabupe baisile nafyo ifya golide, ububani na murrh.

¹² Pamulandu balisokelwe mukilotu ukuti bekabwelulukila kuli Herodi, baile ku kyalo kyabo ukubomfyu insila imbi.

Ukufukila ku Egipiti

¹³ Panuma abamano baaya, malaika wa Mfumu amonekele kuli Yosefu mukilotu nokumweba ati, "Herodi alatampa ukufwaya umwana pakuti amwipaye. Eikyo ima piita umwana na nyina muye ku Egipiti, mukekale kulya kwine mpaka nkankwebe ukufumako."

¹⁴ Yosefu aimine nokupiita umwana nanyina nokuya ku Egipiti ubusiku,

¹⁵ uko aikele mpaka Herodi awfa. Ifi fyali kufifikilisyu ifyo Imfumu yalandile ukupitila muli kasesema ukuti, "Naatile Umwana wandi ukufuma mu Egipiti."

Ukwipaya kwabaana

¹⁶ Lintu Herodi ailwike ukuti abamano nabamuteya, alisakamene. Akonkomesye ukwipaya abana abaume mu Betelehemu nabapalamineko abakwete imyaka ibili nokuya pesamba, akitile ifi ukulingana nensita intu asambilile kubamano.

¹⁷ Muli iyi nsila ifyalandile kasesema Yeremaya fyalifikilisyu ukuti,

¹⁸ "Ikiunda kyaumfwikile mu Ramah, ikiunda kyaulelosya mubukali. Rashele alelila abaana, nakana ukumatalalika pantu nabafwa."

Ukubweluluka ukufuma ku Egipiti

¹⁹ Panuma Herodi awfa, malaika wa Mfumu amonekele kuli Yosefu mukilotu mu Egipiti

²⁰ nokumweba ukuti, "Ima, piita umwana nanyina ubwelelemo ku Israeli pantu abaalefwaya ukwipaya umwana nabafwa."

²¹ Eikyo Yosefu aimine nokupiita umwana nanyina nokubwelela ku Israeli.

²² Lelo lintu Yosefu aumfwile ukuti Akelausi napyana wisi Herodi pabufumu mu Yudeya, alitinine ukuyako. Kibili apo balimusokele mukiloto aile mukitungu kya mu Galili.

²³ Aileikala mu musumba wa Nasareti pakuti ifyalandile bakasesema fifikilisyse ukuti, "Aketwa umwina Nasarene."

3

Ubusimikilo bwakwa Yohani Kabatisya

(Mako 1.1-8; Luka 3.1-18; Yohani 1.19-28)

¹ Muli silya nsiku Yohani Kabatisya aisile alesimikila mukiswebebe kyamu Yudeya.

² Alandile ukuti, "Lapileni, pantu Ubufumu bwa mumulu nabupalama!"

³ Yohani emuntu Ezaya aalelandapo ukuti,
"Isiwi lyaulebilikisa mukiswebebe lileti,

'Pekanyeni insila ya Mfumu
olololeni umwakupita! "

⁴ Insalu syakwa Yohani syapangilwe namasako yangamali, mumusana alekakamo umusipi wampapa kibili makanta nobuki efyakulya alelya.

⁵ Abantu baisile kuli ena ukufuma ku Yerusalem, ku fitungu fyonse ifyamu Yudeya naku kyalo kyapalamina no mulonga wa Yodani.

⁶ Baleyebelela imembu syabo kibili alebabatisya mumulonga wa Yodani.

⁷ Lintu Yohani amwene Abafalise naba Saduki abengi baleisa mukubatisiwa abebelele ukuti, "Mwensoka mwe! Ninani amyebele ati kuti mwafyuka ukukandwa kuntu Lesa ali nokutuma?

⁸ Kiteni ifintu ifilelangisya ukuti mwafifuma kumembu syenu.

⁹ Kibili mwilatontonkanya ati, kuti mwafyuka ukukandwa mukulanda ati Abulahamu kikikolwe kyenu. Ndemyeba nati Lesa muli aya mabwe kuti afumyamo abaana bakwa Abulahamu!

¹⁰ Isembe naliyipekanya ukuputula ifimuti kumisila, fyonse ifimuti ifisitwala fisabo ifisuma kufitema nokufiposa mumulilo.

¹¹ Namibatisya namensi mukulanga ukuti namulapila imembu syenu, lelo uwamaka ukunkila alinokwisa kibili nebo nsilingile nokupiita indyato syakwe. Akamibatisya na Mupasi Wamusilo elo nomulilo.

¹² Ali nolute lwakwelelako muminwe yakwe. Akafumya imisungu pamusolo. Akatutila Injano mubutala bwakwe. Imisungu akoca mumulilo ushishima."

Ukubatisiwa kwakwa Yesu

(Mako 1.9-11; Luka 3.21,22)

¹³ Yesu afumine ku Galili nokuya kumulonga wa Yodani mukubatisiwa kuli Yohani.

¹⁴ Lelo Yohani alyesesye ukuti amukanye. Amwebele ukuti, "Niwebo ulingile ukumbatisya, nomba nikinsi waisila kuli nebo?"

¹⁵ Lelo Yesu ayaswike ukuti, "Leka kibe ififine pali nomba. Pantu muli iyi nsila ninsi twafikilisyse ubulungami bonse." Elo Yohani asumina.

¹⁶ Lintu Yesu abatisiwe, kilyafye afuma pamensi umulu waliswike, kibili amwene Umupasi wakwa Lesa uletentemuka nge nkunda waikala napali ena.

¹⁷ Nesiwi lyafumine mumulu ukuti, "Uyu mwana wandi untu natemwa kabili muli ena emombekelwa."

4

Yesu atunkwa

(Mako 1.12-13; Luka 4.1-13)

- 1 Elo Umupasi watungulwile Yesu mumatololo mukutunkwa kuli Kiwa.
- 2 Panuma yakufunga insiku amakumi yane akasuba nobusiku, Yesu alyumfwile insala.
- 3 Kiwa aisile kuli Yesu nokumweba ukuti, "Ngoli Mwana wakwa Lesa, eba aya amabwe yasanguke umukate."
- 4 Lelo Yesu ayaswike ukuti, "Kyalembwa ukuti, 'Tekumukate kweka umuntu engabela no mweo, lelo nikwisiwi lyonse ilifuma mukanwa kakwa Lesa.'
- 5 Kibili Kiwa apiitile Yesu ku Yerusalem mu musumba wamusilo, amuninike pamulu wamutenge we Tempete,
- 6 nokumweba ati, "Ngoli Mwana wakwa Lesa ipose pansi, pantu kyalembwa ukuti,
"Lesa akeba bamalaika bakwe ukukubaka;
bakakwimya muminwe yabo,
pakuti wikaipuntula kumabwe."
- 7 Yesu ayaswike ukuti, "Kyalilembwa nakabili ukuti, 'Wilaesya Imfumu Lesa obe.'"
- 8 Kibili Kiwa atwele Yesu palupili ulutali nokumulangisya amabufumu yapesonde mubukalamba bwayako.
- 9 Nokumweba ati, "Fyonse ifi ndekupela ngawamfukamina nokunsinsimuna."
- 10 Yesu amwaswike ukuti, "Kabiye uko, Kiwa! Kyalilembwa ukuti, 'Ulesinsimuna Imfumu Lesa obe kibili ekafye eo ulepyungila.'
- 11 Kiwa asile Yesu kibili nabamalaika baisile nokwisa mupyungila.

Yesu atampa imilimo yakwe mu Galili

(Mako 1.14-15; Luka 4.14-15)

- 12 Lintu Yesu aumfwile ukuti Yohani nabamwingisya mukifungo, aile ku Galili.
- 13 Afumine mu Nasareti, aileikala mu Kapenamu, umusumba wakumbali ya mumana wa Galili mukyalo kya Zebuluni na Nafutali.
- 14 Ifi fyakitike mukufikilisyia fintu kasesema Ezaya alandile ukuti,
- 15 "We Zebuluni nawe Nafutali,
mwefyalo fyabela mumbali ya Bemba, kwisilya lyamulonga wa Yodani.
We Galili wa Bena fyalo!
- 16 Abantu abaikala mumfimfi
nabamona ulubuto ulukalamba.
Abo abekala mukinsingwa kyamfwa
ulubuuto nalubasanikila."
- 17 Ukuftuma pali ilya nsita, Yesu ayambile ukusimikila ukuti, "Lapileni, pantu Ubufumu bwamumulu nabupalama!"

Yesu aita abasambi bakwe abakubalilapo

(Mako 1.16-20; Luka 5.1-11)

- 18 Lintu Yesu aleenda mumbali yamumana wa Galili, amwene bamunina babilii Simoni (uwaleitwa Petelo) namunina Andereya baleteya amakonde pantu baali bashila.

¹⁹ Yesu abebele ati, "Nkonkeni nkamikita ukuba abashila babantu."

²⁰ Palyapene basile amakonde nokuya nao.

²¹ Yesu aendelelekofye ikyalinga nakabili amona Yakobo na Yohani abana bawkwa Zebedee. Baali mubwato na wisi Zebedee balelunda amakonde. Yesu alibetile,

²² kabilo palya pene basile ubwato na wisi nokuya nao.

*Yesu afundisya, asimikila nokundapa
(Luka 6.17-19)*

²³ Yesu aile mu Galili monse, mukufundisya mumu sinagogi, ukusimikila Imbila Nsuma Pabufumu nokundapa amalwele yamisango misango.

²⁴ Ilyasi lyapali ena lyasabankene munkyaloo kya Silya kyonse, ikyakuti abantu balemuletela bonse abaali nabawala, abalekyusawa kumalwele yamisango misango, abaakwete ingulu, abakifulubi nababulebe nao aalibondepe bonse.

²⁵ Ibumba lyalimukonkele ukufuma ku Galili namu Dekapolisi, ukufuma ku Yerusalem, ku Yudeya nabusilya bwa Yodani.

5

*Amafunde yapa lupili
(5.1—7.29)*

¹ Lintu Yesu amwene ibumba ilikalamba aninine mumbali yalupili emo aile ikala. Abasambi bakwe balimukolongene,

² kabilo atampile ukubafundisya ukuti.

*Amapaalo yakine
(Luka 6.20-23)*

³ Balipalwa abapiina mumupasi;
pantu Ubufumu bwamumulu bwabo!

⁴ Balipalwa abaloosya;
pantu bakakoselesiwa.

⁵ Balipalwa abamutembo;
pantu bakapokelela fintu Lesa alaya!

⁶ Balipalwa abansala nekilaka kyukuita ubulungami;
pantu Lesa akalenga bakekute.

⁷ Balipalwa abaluse,
pantu nabo bakabelelwa uluse!

⁸ Balipalwa abasanguluka imitima,
pantu bakamona Lesa.

⁹ Balipalwa abaapanga umutende;
pantu baketwa abana bakwa Lesa!

¹⁰ Balipalwa abo abapakasilwa pamulandu wabulungami,
pantu Ubufumu bwamumulu bwabo!

¹¹ Muli abapalwa, abantu ngabamituka nokumipakasa nokumibepesywa ubufi bwamisango misango pamulandu wandi.

¹² Beni abansansa kabilo temweni pantu ikilambu kyenu ikikalamba kyasungilwa mumulu. Ifi efintu bakasesema abaliko kale bapakeswe.

*Umukele nolubuto
(Mako 9.50; Luka 14.34-35)*

¹³ Muli mukele wa pano isonde. Nomba umukele ngawaonaika kuti walowesiwa kulikinsi? Taukwata milimo nakabili, kuoposafye abantu baunyantapo.

¹⁴ Muli lubuto lwa pano isonde. Umusumba uwakulwa palupili teti ufsiwe.

¹⁵ Takuli uwasya ilampi nokukupikapo ulweso, lelo babika apasansama pakuti ibusye bonse mujanda.

¹⁶ Lekeni ulubuto lwenu lusanike pa bantu, pakuti bamone ifintu ifisuma mukita nokulumbanya Wisinwe Mumulu.

Amafundisyo yapa Mafunde yakwa Mose

¹⁷ Mwilatontonkanya ati naisa mukonaula Amafunde yakwa Mose nangu bakasesema, nsyaisa mukuyapwisya lelo naisa mukuyafkilisyia.

¹⁸ Ndemyeba ikine kine nati, umulu nekyalo fikapita lelo ndemilaya nati takwakonaike ikilembo nangu kalitoni mu Mafunde mpaka fyonsen fikafkilisyie.

¹⁹ Eikyo kansi onse uwatobapo limo pamafunde nangu lingakyepa syani, nokufundisya abantu bambi ukukita fimofine aketwa umunono Mubufumu bwa mumulu. Lubali lumbi nakabili onse uwasunga ifipope nokufundisya baambi ukukita fimofine, akaba umukalamba Mubufumu bwa mumulu.

²⁰ Ndemyeba nati tamwakengile Mubufumu bwa mumulu ubulungami bwenu ngatabwakakile ubwaba Falise naba Kafundisya bamafunde.

Ifundisyo pakufulwa

(Luka 12.57-59)

²¹ Mwalyumfwa ukuti ifikolwe bafyebele ati, "Mwilaipaya kabilna onse uwaipayana afwile atwalwa mukupingulwa."

²² Lelo ndemyeba ukuti onse uwafulilwa munyina alingile ukumutwala mukupingulwa. Kabili onse uwatuka munyina akatwalwa kukilye, naonse uwaita munyina ukuti kiwelewele akaba mubwafya bwamulilo waku Gehena.

²³ Eikyo ngoli pakutula ikyabupe pakipailo kyakwa Lesa, elo waibusya ati munonko nakukwatila ikintu kumukosi,

²⁴ sya ikyabupe kuntansi yakipailo, kabiye muleyawikisyanya elo wise utule ikyabupe kuli Lesa.

²⁵ Umfwaneni bwangu bwangu nomuntu ukweteko imilandu lintu mukili muleya nankwe mukulubulula. Pantu kuti ayakutwala kuli kapingula, nao kapingula akutwala kuli kapokola kabili ukabikwa mukifungo.

²⁶ Ndimukumyeba ikine kine nati, ukekala mulya mpaka ukalipe nolupiya lobe lonse ulwakulekelesya.

Ifundisyo pa bukende

²⁷ Mwalyumfwa fintu kyalandilwe ukuti, "Mwilakita bukende."

²⁸ Lelo ndimukumyeba ati, onse uwalolesya umwanakasi nolunkumbwa lubi ninsi nakita kale ubukende mumutima wakwe.

²⁹ Eikyo ilinso lyobe ilya kukulyo ngalyakulenga ukubembuka, lilobole nokuliposa! Kyawamisyapo ukulufya ikilundwa kimo ikya kumubili obe ukukila umubili obe onse ukuposwa ku Gehena.

³⁰ Ukuboko kobe ukwa kukulyo Ngakwakulenga ukubembuka, kuputule nokukuposa! Kyawamisyapo ukulufya ikilundwa kimo ikyamubili obe ukukila umubili onse ukuposwa mu Gehena.

*Ifundisyo palwa kulekana mufyupo
(Mateyo 19.9; Mako 10.11-12; Luka 16.18)*

³¹ Kyalilandwa nakabili ukuti, "Onse uwaleka umukasi wakwe afwile ukumupa ikipepela kyakupwilapo ikyupo."

³² Lelo ndemyeba ukuti uyo onse uwasya umukasi wakwe pamulandu uusili wabukende ninsi amulenga ukuba umukende. Kabili naonse uwaupa umwanakasi baleka nao ninsi akita ubukende.

Ukufundisya pamilapo

³³ "Kabili mwalyumfwa ukuti ifikolwe bafyebele ati, 'mwilalapa bufi lelo mulefikilisyia fintu mwalyumfwa ku Mfumu ukukita.'

³⁴ Lelo ndemyeba ukuti, Mwiilalapa pakulaya, mwilalapa ku myulu pantu kipuna kya bufumu ikya kwa Lesa,

³⁵ mwilalapa pesonde, pantu ekipuna kyamakasa yakwa Lesa, nangu pali Yerusalemu pantu musumba wa Mfumu nkalamba.

³⁶ Mwilalapa napamutwe wenu pantu tekuti mupange umusisi nangu umo ukubuta nangu ukufita.

³⁷ Mulelandefye ukuti, 'Ee' nangu 'Awe' ifintu fimbii fintu mulanda fifuma kumubifi."

*Ifundisyo palwa kilandushi
(Luka 6.29-30)*

³⁸ "Mwalyumfwa fintu kyalandwa ukuti, 'Ilinso pe linso, kabili iliino pelino.'

³⁹ Lelo ndemyeba ukuti, mwilalandula umuntu ngamilufyanya. Umuntu ngakuuma ulipi kwitobo lyakukulyo leka akuume nakwitobo lya kukuso.

⁴⁰ Kabili umuntu ngakutwala kukilye pakufwaya ukukupoka insalu yobe leka apiite ne koti lyobe.

⁴¹ Umuntu ngakupatikisa ukuya nao umulundu umo, kabiye nao imilundu ibili (2 km).

⁴² Umuntu ngakulomba ikintu mupele kabili ngalefwaya ukumwasima ikintu mwasime."

*Ukutemwa abalwani
(Luka 6.27-28,32-36)*

⁴³ "Mwalyumfwa ati kyalandwa ukuti, 'Muletemwa ababiyi, mulepata abalwani benu.'

⁴⁴ Lelo ndemyeba ukuti temweni abalwani benu kabili mulepepela abamipakassa,

⁴⁵ pakuti mube abaana bakwa Wisinwe mumulu. Pantu aleka akasuba kakwe ukubala pa bantu abaabi na pabasuma fimofine, kabili alokesya imfula pabalungami napababembu.

⁴⁶ Nikinsi Lesa engamilambwila ngamwatemwafye abamitemwa? Pantu nabakasonkesya bamusonko nabo balakita ifyofine!

⁴⁷ Kabili ngamuposyafye bakibusa benu busye ninsi namukitapo ubupusano? Nabenafyalo nabo balakita ifyofine!

⁴⁸ Mube abapwililika ngafintu Wisinwe mumulu aba uwawililika."

1 "Kengeleni, mwilakita ubulungami pa meno ya bantu bambi pakuti bamimone, pantu ngamwakita ifyo tamwakapokelele kilambu kuli Wis-inwe wa mumulu.

2 "Eikyo kansi ilyo mwapelila ikintu kumubusu, mwilasabankanya ngafintu babumbimunda bakita muma sinagogi na mumisebo. Bakita ifi pakuti abantu babalumbanye. Ndemyeba ukuti balipokelela kale ikilambu ikyakumanina.

3 Lelo lintu mulepela, mwileka ukuboko kwenu ukwa kukuso kwisibe ifilekita ukuboko kwa kukulyo.

4 Pakuti ukupela kwenu kube ukwa munkama kabili na Wisinwe uumona munkama akamilambula."

Ukufundisya pe pepo (Luka 11.2-4)

5 "Lintu mulepepa, mwilaba nga babumbimunda abatemwa ukwiminina mumisebo na muma Sinagogi, pakuti babamone kubantu. Ndemyeba nati balipokelela ikilambu kyabo mukukumanina.

6 Lelo ilyo mulepepa, ingileni mukyumba kyenu mwisaleko ikiibi nokupepa kuli Wisinwe usimoneka. Kabili na Wisinwe umona ifyamunkama akamilambula.

7 "Kabili ngamulepepa mwilabomfyा amasiwi ayengi ayabula ubuyo ngafintu Abena Fyalo bakita. Batontonkanya ukuti Lesa elo engomfwa amapepo.

8 Mwiba ngabena, pantu Wisinwe alisiba fintu mufwaya lintu tamulamulomba.

9 Ifi nomba efyo mufwile ukupepa:
'Mwe Taata wesu uwamumulu,
 isina lyenu likindikwe,

10 ubufumu bwenu bwise,
 ubufwayo bwenu bukitwe pesonde ngamumulu.

11 Tupeleni lelo ikyakulya kyesu ikya kila busiku.

12 Tweeleni fintu twalufyanya,
 ngafintu twelela abatulufyanya.

13 Mwitutwala mukwesiwa ukukalamba,
 lelo mututule kufyabipa.'

14 Pantu ngamuleelela bambi fintu bamilufyanya, na Wisinwe mumulu nao akamyelela.

15 Lelo ngatamuleelela bambi, na Wisinwe takamyelele fintu mwalufyanya.

Ifundisyo palwa kufunga

16 "Elo mulefunga, mwilaikala inkumbabulili ngafintu babumbimunda bakita. Balekelesya imimonekele yabo pakweba ati abantu bonse babamone ati balefunga. Ndemyeba ikinekine nati bena balipoka ikilambu kyabo kyonse.

17 Lelo lintu mulefunga, mulesamba kumenso nokusuba amafuta mu mutwe,

18 pakuti abantu bambi belaisiba ukuti mulefunga. Kanofye Wisinwe eka usimoneka. Kabili Wisinwe uumona fintu mukita munkama akamilambula.

Ifyuma mumulu (Luka 12.33-34)

19 "Mwilaungila ifyuma fyenu pesonde apo ubuswa nenkuutu fingo-naula, kabilo apo abano bengengila no kwiba.

20 Lelo Sungileni ifipao fyenu mumulu umo ubuswa nenkuutu teti sonyaule kabilo nabano teti bengile nokwiba.

21 Pantu umutima wenu ukaba ukwaba ifyuma fyenu.

*Ulubuuto lwa mubili
(Luka 11.34-36)*

22 "Ilinsio elampi lyamubili. Amenso yobe ngayatuntulu ninsi umubili obe onse uli mulubuuto.

23 Lelo amenso yobe ngateyatuntulu, umubili obe ukaba mumfimfi. Ngakyakuti ulubuto muli webo nimfimfi, ninsi nimfimfi yakipesya mano!

*Lesa nefyuma fyapano isonde
(Luka 16.13; 12.22-31)*

24 "Takuli umuntu uwingaba umusya wabasikulu babili, kuti apatapo umo nokutemwapo umbi, kuti anakilapo umo nokufupulapo umbi. Tekuti upyungile fyonse pamo, Lesa nolupiya.

25 "Eikyo ndimukumyeba ukuti, mwilaungila pabwikasi bwenu, fintu mukalya nafintu mukanwa, nangu pansalu syamubili wenu. Busye ubwikasi bwenu tabwakila ifyakulya? Kibili busye umubili tawakila insala?

26 Lolesyen'i pafyoni fyamulwelele, ifisilima, tafisombola nangu ukusungila mumatala, lelo Wisinwe wamumulu alafiliisy! Busye tamwakindamapo ukukila ifyoni?

27 Ninani pali mwebo uwingalundapo insiku pamulandu wakusakanana?

28 "Nikinsi musakamanina pansalu? Lolesyen'i pamaluba ya mumpanga fintu yakula, tayabomba nangu ukuipangila ifyakufwala.

29 Lelo ndemyeba nati, Nemfumu Solomoni nobunonshi bwakwe bonse tatalile fwikwapo ngalimo pali aya maluba.

30 Ngakyakuti Lesa eufwika ifyani fyamumpanga, ifyakuti lelo epofili mailo fyaposwa mumulilo tekuti amifwike ukukishapo, mwe bantu bakitetekelo kinono?

31 "Eikyo mwilaungila nokuipusya ukuti: 'Busye nkalya insi? Busye nkanwa insi? Nangu busye nkafwala kinsi?'

32 Pantu ifi, eyfo abenafyalo bafwaya, lelo Wisinwe wamumulu alisiba ukuti mulakabila fyonse ifi fintu.

33 Lelo intansi fwayeni Ubufumu bwamumulu Nobulungami bwabuko, kabilo nafyonse ifi ifyasyala akamipeela.

34 Eikyo mwilaungila pabusiku bwa mailo, ubwamailo bukaisakanana ubwine. Kila busiku bwalikwata isakamiko lyabuko.

*Ukupingula abanenu
(Luka 6.37-38,41-42)*

1 "Mwilapingula abanenu, pakuti mwikapingulwa,

2 pantu insila mupingwilamo abanenu eyo mukamipingwilamo kabilo nefipimo mubomfy'a eyfo nemwe mukapiminwamo.

3 Nikinsi umwena akasanga mulinsio lyakwa munonko lelo wafilwa ukumona umulando mulinsio lyobe?

4 Kuti walanda syani kuli munonko ukuti, "Leka nkufumye akasanga mulinso," ilyo webo taulemona umulando mulinso lyobe?

5 Webumbimunda we! Mbale fumya umulando mulinso lyobe elintu walamona fintu wingafumya akasanga mulinso lyakwa munonko.

6 "Mwilapela ifyamusilo ku mbwa, kabili mwilaposela inkumba ubulungu bwenu ubwa mutengo, pantu kuti syena syabunyantaula nokumyalukila.

Lomba, Fwaya, Konkonsya

(Luka 11.9-13)

7 "Lomba kikapelwa kuli webo, fwaya walasanga, konkonsya kabili ikiibi kikeswilwa kuli webo.

8 Pantu onse uwalomba akapeelwa, na onse uwafwaya akasanga kabili nekiibi kikeswilwa ku ukakonkonsya.

9 Busye palimwebo nani engapeela umwaana wakwe ilibwe ngamlombu umukate?

10 Nangu ukumupeela insoka ngamulomba isabi?

11 Ngakyakuti mwebo nangu muli babi, mwalisiba ukupeela abaana benu ifisuma. Nga Wisinwe wamumulu tekuti akisyepo ukupeela ifintu ifisuma kubamulomba!

12 "Eikyo mulifyonse, mulekitila bambi fintu mwingafwaya bamikitila, ubu ebupilibulo bwa mafunde na bakasesema."

Insila iinono

(Luka 13.24)

13 Ingilileni pamwinsi uunono. Pantu unono emwinsi lelo uwasalala ninsila iitwala kukonaulwa, kabili nabengi emo bengilila.

14 Lelo umwinsi uutwala kumweo unono kabili walyafya nabausanga banono.

Ikimuti nefitwalo fyaciko

(Luka 6.43-44)

15 Kengeleni kuli bakasesema babufi, besa kuli mwebo ngempaanga kunse, lelo mukati mimbulu iibi.

16 Mukabesibila kufisabo. Kumyunga takuseeka imyangasi, nangu amakunyu tayaseeka ku nkololo.

17 Ikimuti ikisuma kuseeka ifitwalo fisuma, lelo ikimuti ikiibi kuseka ifitwalo ifiibi.

18 Ikimuti ikisuma teti kitwale ifisabo ifiibi nangu ikimuti ikiibi ukutwala ifisabo ifisuma.

19 Kabili nekimuti kyonse ikisitwala ifisabo ifisuma kukitema nokukiposa mumulilo.

20 Eikyo kansi mukabesibila kufisabo.

Nsyakwisiba

(Luka 13.25-27)

21 "Tebonse abangita ukuti, 'We mfumu, we Mfumu' abakengila Mubufumu bwamumulu kanofye abo abakita fintu Taata wamumulu afwaya ukuti bakite.

22 Pali bulya busiku abengi bakatiila kuli nebo ukuti, 'We Mfumu, we Mfumu! Busye tatwalesesema mwisina lyobe, no kutamfyia ingulu Mwisina lyobe, kabili nokukita ifisungusyo ifingi mwisina lyobe?'

23 Elo nkabeba ukuti, 'Nsyamisiba. Fumeni apa, mwebantu ababifi mwe!' "

*Bakakula bamayanda bibili
(Luka 6:47-49)*

²⁴ "Eikyo, onse umfwa aya masiwi yandi nokuyakita aaba ngo muntu uwamano uwaakulile injanda pelibwe.

²⁵ Imfula yalilokele, imilonga yaliiswile nomwela walipupile ku njanda lelo tayawile pantu yakulilwe pebwé.

²⁶ "Lelo umfwa amasiwi yandi nokunayakita aaba ngekipumbu ikyakulile njanda pa musenga.

²⁷ Imfula yalilokele, imilonga yaliswile, umwela walipupile kuli ilya njanda nayo yaliwile. Kabili yawile bubi bubi!"

Abantu batapa imifundile yakwa Yesu

²⁸ Lintu Yesu apwisisye ukulanda ifi, ibumba lyalipapile pa mafundisyo yakwe.

²⁹ Talefundisyia ngabakafundisyia bamafunde, lelo alefundisyia nga umo uwakwata amaka.

8

*Yesu aundapa uwafibasi
(Mako 1:40-45; Luka 5:12-16)*

¹ Lintu Yesu atentemwike palupili, ibumba ilikalamba lyalimukonkele.

² Elo umuntu uwalekyusiwa nobulwele bwafibasi aisile mufukamina nokulanda ukuti, "Mwemfumu ngamulefwaya kuti mwangundapa."

³ Yesu atambulwile ukuboko amwikata, nokumwasuka ukuti, "Ndefwaya, pola!" Palya pene alipolele kubulwele bwakwe.

⁴ Yesu amwebele ukuti, "Usininkisyé ukuti tawebeleko umuntu nangu umo, lelo kailange kuli basimapopo, upela nelambo lintu Mose akoncomesyé ngo bunte kuli bena."

*Yesu aundapa umubomfi wamukalamba wabasilika
(Luka 7:1-10)*

⁵ Lintu Yesu aingile mu Kapenamu, umukalamba wabasilika alimukumenye nokumulomba ubwafwilisyo,

⁶ aebele ati, "Wemfumu umubomfi wandi nalala pabulo, taleyenda kibili nakyusiwa apakalamba."

⁷ Yesu amwaswike ukuti, "Nalaya mundapa."

⁸ Lelo umukalamba wabasilika ayaswike ukuti, "Iyoo Mwemfumu, nsilingile ukuti mwise muñanda yandi, lelo landenifye isiwi umubomfi wandi alapola.

⁹ Pantu nanebo nalikwata abonakila, kibili nalikwata nabasilika abanakila. Ndeba umo ukuti, 'Kabiye!' Nao ayaa kibili naeba umbi ukuti, 'Isal!' Nao aisa, kibili ndeba umusya wandi ukuti, 'kitefi!' Nao akita."

¹⁰ Lintu Yesu aumfwile ifi alisungwike nokweba abamukonkele ukuti, "Ndemyeba ikine kine, nsyasangapo uwakitetele mu Israeli ngoyu.

¹¹ Ndemyeba ukuti, abengi bakesa ukufuma kukabanga nakumasamba nokwikala pamo na Abulahamu, Isaaki na Yakobo pamutebeto Mubufumu bwamumuñu.

¹² Lelo abana babufumu bakaposwa mumfimfi, ukukaba ukulila nokusumanya ameno."

¹³ Yesu aebele umukalamba wabasilika ukuti, "Kabiye, kyalaba ngafintu usumine."

Kibili nomubomfi wamusilika alipolele pali kalyakene kasita.

*Yesu aundapa abantu abengi
(Mako 1.29-34; Luka 4.38-41)*

14 Lintu Yesu aile mujanda yakwa Petelo, amweene nyinafyala wakwa Petelo ali pabulo nalwala impepo.

15 Amukwete kuminwe apopene nempepo yamuleka, aimine nokutampa ukubatangata.

16 Ikyungulo, abantu abengi abakwete ingulu babaletele kuli Yesu. Yesu atamfisyé ingulu kwisiwi nokundapa bonse abali nabalwala.

17 Ifi fyakitike pakufikilisa ifyalandile kasesema Esaya ukuti, "Aundepe amalwele yesu nokutuposya."

*Bamo abalefwaya ukukonka Yesu
(Luka 9.57-62)*

18 Nomba lintu Yesu amwene ibumba lyamukolongana aebele abasambi bakwe ukwabukila busilya bwamumana.

19 Kafundisya wamafundé aisile kuli ena nokumweba ukuti, "Mweka-fundisya, ningipekanya ukuya nemwe konse kuntu muleya."

20 Kabili Yesu amwaswike ukuti, "Bamumbwe balikwata amendo, kabili nefyoni fyalikwata ifinsa lelo Umwana Wamuntu takwata apakusamina umutwe."

21 Naumbi uwali umusambi alandile kuli ena ukuti, "Wemfumu, leka mbale mbwelelemo ndeyasika taata."

22 Lelo Yesu amwaswike ukuti, "Nkonka, kabili leka abafwa basike abafwa banabo."

*Yesu atatalika amaputa
(Mako 4.35-41; Luka 8.22-25)*

23 Kabili nalintu Yesu apateme mubwato, abasambi bakwe balimukonkole.

24 Apopene akashululu kaima pamumana namaputa yalapumaula kubwato, Yesu ena ninsi ali mutulo.

25 Abasambi baile kuli Yesu mukumusibusya. Bamwebele ukuti, "Tupususwe ye Mfumu, twalafwa!"

26 Yesu abaswike ukuti, "Kinsi muletiina, mwebakitetekelo ikinono!" Aimine nokukalipila umwela namaputa, kabili kwali icilenga.

27 Abasambi balipapile, nokulanda ukuti, "Busye muntu wamusango syani uyu? Nomwela namaputa nafyo filemumfwila!"

*Yesu atamfyá ingulu mubantu babili
(Mako 5.1-20; Luka 8.26-39)*

28 Lintu Yesu afikile busilya bwamumana, kukyaló kyabena Gadara, bamukumenye kubantu babili abafumine mumanda. Aba bantu balikwete ingulu kabili bali nabakalipa ikyakuti tapali abalepita kuli ilya nsila.

29 Palyapene balapunda ukuti, "Nifinsi ulefwaya kuli fwébo, Wemwana wakwa Lesa? Busye waisa mukutukanda ilyo insita yapekanisiwa tailafika?"

30 Nomba akatalamukilafye kwali umukuni uwankumba uukalamba isyalelya.

31 Kabili ingulu syapapete Yesu ukuti, "Ngawalatutamfyamo, ututume mumukuni wankumba."

32 Kabili Yesu asyebéle ukuti, "Kabiyení," Syafumine nokuya mumukuni wankumba kabili nomukuni wa nkumba watentemukila mumukonko wayawila mumumana nokufwa.

33 Abantu abalesunga inkumba, balibutwike, baile mumusumba, mukulondolola ilyasi lyonse nefyakitike kubantu abakwete ingulu.

34 Bonse mumusumba baile mukukumanya Yesu, lintu bamumwene bamupapete ukuti afume mukyalo kyabo.

9

Yesu aundapa uwabulebe (Mako 2.1-12; Luka 5.17-26)

1 Yesu apatame mubwato nokubwelela busilya bwamumana kumusumba wakwe.

2 Abantu bamo baletele kuli ena uwabulebe ninsi nalala pabutanda. Kibili lintu Yesu amwene ikitetekelo bakwete, aebele uwabulebe ukuti, "Sipa, wemwana wandi! Imembu syobe syaelelwa."

3 Pali ifi, bakafundisya bamafunde bayebele abene beka ukuti, "Uyu mutunu alepontela Lesa!"

4 Lelo Yesu ikyo alisibe amatontonkanyo yabo, abepwisye ukuti, "Nikinsi muletontonkanisisya ifyabubifi?

5 Busye kinsi kyayangukapo pakulanda ati, 'Imembu syobe syaelelwa' nangu ukulanda ati, 'Ima nokwenda'?

6 Lelo nalamilangisya nomba ukuti Umwana wa Muntu alikwata amaka yakwelela imembu." Eikyo aebele uwabulebe ukuti, "Ima, piita ubutanda bobe kabiye kunjanda"

7 Kibili alimine nokuya kwakwe.

8 Lintu abantu bamwene ifi, bakwetwe umwenso, kibili balumbenye Lesa pakupeela amaka kubantu.

Yesu aita Mateyo (Mako 2.13-17; Luka 5.27-32)

9 Lintu Yesu afumine kuli ilya nkende, amwene kasonkesya wamusonko, wesina lya Mateyo, naikala mutu alebombela. Amwebele ukuti, "Nkonka." Mateyo aimine nokumukonka.

10 Kibili ilyo Yesu alelya munjanda yakwa Mateyo, bakasonkesya bamusonko abengi nababembu baisile yamba ukulya na Yesu kumo nabasambi bakwe.

11 Lintu Abafalise bamo bamwene ifi, baipwisye abasambi bakwe ukuti, "Kinsi Kafundisya wenu aliila pamo nabakasonkesya wamusonko elo nababembu bambi?"

12 Lelo lintu Yesu abomfwile abaswike ukuti, "abantu abatuntulu tabakkabila shiranga kano abalwele.

13 Kabiyyeni musambilile umwalola ifi, 'Nkabila uluse, telambo.' Pantu nsyaisa mukwita abalungami lelo nakonka ababembu."

Iipusyo lyapakufunga (Mako 2.18-22; Luka 5.33-39)

14 Elo abasambi bakwa Yohani kabatisya baisile kuli Yesu nokumwipusya ati, "Nikinsi fwebo naba Falise tufungila, lelo abasambi bobe tabafunga?"

15 Yesu abaswike ukuti, "Busye insindisi syakwa sibwinga kuti syaba syani nobulanda ilyo sikili nasibwinga? Lelo insita ikafika ilyo sibwinga akapiitwa pali bena lyena bakalafunga ukulya.

16 "Takwaba uubika ikikamba ikipyा pansalu yakale, pantu ikikamba kipyा kuti kyalepula insalu nekipunda kyakulilako.

17 Nangu ukubika umwangasi uusilabila munyambi isikote, umusango inyambi kuti syapuuaka, umwangasi wapongoloka nenyambi syaonaika. Lelo babika umwangasi munyambi isipyi epakupususya fyonsé fibili."

***Yesu abusya umukasyana kibili aundapa nomwanakasi wamukunko
(Mako 5.21-43; Luka 8.40-56)***

18 Yesu palya akili alelanda ifi, kwaisile intungulusi yaba Yuda kuli ena, yamufukamina nokulanda ukuti, "Umwana wandi awafafye ililine, nomba twende umutambalikepo amaboko kibili alaba nomweo."

19 Eikyo Yesu aimine nokumukonka kibili nabasambi bakwe baile nao.

20 Umwanakasi uwalekyusawa nomukunko pamysaka ikumi limo naibili aisile kunuma yakwa Yesu, nokukumya kupela yansalu yakwe.

21 Aebele mumutima wakwe ukuti, "Nganakumyafye kunsalu yakwe ndepola."

22 Yesu apilibwike nokumona, alandile ati, "Sipa wemwana wandi umwanakasi," "Ikitetekelo kyobe kyakuposya." Pali ilya ine nsita umwanakasi alipolele.

23 Yesu aingile munjanda yantungulusi yaba Yuda. Lintu amwene abalelisya imitolilo nebumba lyabantu abalelolosya,

24 alandile ukuti, "Bonse fumineni panse! Uyu mukasyana tafwile alelefye!" Elo bonse bamuseka.

25 Lelo lilyafye abantu bafuma panse, aingile ayamukwata pakuboko, kibili nao aima.

26 Ilyasi lyapali ifi lyasabankene muli ilya nkende yakyalo.

Yesu aundapa impofu sibili

27 Yesu afumine kuli ilya kende, kibili kilya aleya, abaume babilo impofu batampile ukumukonka. Bapundile ukuti, "Mwana Davidi, tubelele uluse!"

28 Lintu Yesu aingile munjanda, impofu syaisile kuli ena, kibili nao asipwisye ukuti, "Busye namusumina ati, kuti nakitefi?"

Bayaswike ukuti, "Eee, Mwemfumu?"

29 Yesu aikete amenso yabo nokulanda ukuti, "Nakikitwe, ukulingana ne kitetekelo kyenu!"

30 Kibili namenso yabo yaliswike. Yesu abasocele ukuti, "Mwiebako nangu umo pali ifi!"

31 Lelo bailesabankanya ilyasi pali Yesu muli ilya nkende yakyalo yonse.

Yesu aundapa umuntu uusyalelanda

32 Lintu abaume babilo baleya, baletele umuntu uusyalelanda kuli Yesu pantu alikwete ikibanda.

33 Kibili lintu ikibanda kyantafiwe muli ena, umuntu usyalelanda atampile ukulanda, kibili nabonse balisungwike. Bapundile ukuti, "Tat-watala monapo ifyaifi mu Israeli!"

34 Lelo Abafalise balandile ukuti, "Mukalamba wafibanda eumupele amaka yakutamfyia ifibanda."

Yesu aumfwila abantu uluse

35 Kibili Yesu aile aletandala mumisumba yonse nemisi. Afundisye mu-masinagogi, abilile Imbila Nsuma yabufumu, nokundapa abantu abalwele amalwele yamisango misango.

36 Lintu amwene ibumba lyabantu aiketwe nobulanda, pantu baali nabasakamana, ababula uwakubafwa ngempaanga isyabula kacema.

³⁷ Aebele abasambi bakwe ukuti, "Ubusombosi bukalamba, lelo ababomfi banono.

³⁸ Pepeni kuli Lesa wabusombosi ukuti atume ababomfi abengi mukusombola."

10

Abatumwa ikumi limo nababili (Mako 3.13-19; Luka 6.12-16)

¹ Yesu aitile abasambi bakwe ikumi limo nababili nokubapa amaka yaktutamfyा umipasi yakowela nokundapa amalwele yamisango misango.

² Aya emasina ya batumwa ikumi limo na babili, Simoni (uwaleitwa Petelo) na munyina Andereya, Yakobo na munyina Yohani bamwana Zebede,

³ Filipi na Batolomeo, Tomasi na Mateyo kasonkesya wamusonko, Yakobo mwana Alufeya, na Tadeyasi,

⁴ Simoni umwina kenani, na Yudas Isikalyoti uwafutwike Yesu.

Imilimo ya batumwa ikumi limo nababili (Mako 6.7-13; Luka 9.1-6)

⁵ Yesu atumine aba batumwa ikumi limo nababili nokubeba ukuti, "Mwilaya ku benafyaloo na mumisumba ya bena Samaliya.

⁶ Lelo muleya ku mpaanga isyaluba isya munjanda yakwa Israeli.

⁷ Kibili mukalesimikila ukuti, 'Ubufumu bwakwa Lesa buli mupepi!'

⁸ Mukaleundapa abalwele, mukalebusya abafwa, mukaleundapa abafibasi, nokutamfyा ifibanda. Mwapokelela ukwabula ukulipila, eikyo mukalepela ukwabula ukulipilisya.

⁹ Mwipiita ulupiya ululi lonse ulwa Siufele, golide nangu ulwa kyela mumifuko yenu,

¹⁰ mwipiita akacola nangu imikansu ibili, insapato nangu inkonto. Ababomfi bafwile bapelwa fintu balefwaya.

¹¹ "Kibili onse umusumba nangu umusi untu mwayamo, fwayenimo umuntu uulingile, mukaleikala nao mpaka mukafume muli ilya nkende.

¹² Ngamwaya pañanda, mulelanda ukuti, 'Umutende ube nemwe.'

¹³ Muli iyo njanda nga bamipokelela, lekeni umutende wenu ube pañanda, lelo nga bakana ukumipokelela umutende wenu umibwelele.

¹⁴ Kibili umo ngakana ukumipokelela nangu ukumfwa ku masiwi yenu, kunteni ulukungu kunkasa syenu nokufuma muli ulya musumba nangu iyo njanda.

¹⁵ Ndemyeba ikinsika ati pabusiku bwabupingusi, Lesa akalangapo uluse ulukulu ku bantu bamu Sodoma na Gomora ukukila uyo musumba.

Ukupakaswa kuleisa (Mako 13.9-13; Luka 21.12-17)

¹⁶ "Moneni! Namituma nge mpaanga pakati ka mimbulu. Mukengele nge nsoka kibili mufuuke nge nkunda.

¹⁷ Mukengele ku bantu, pantu bakamikwata nokumitwala muflye, kibili bakamilopola mu masinagogi.

¹⁸ Pamulandu wandi bakamitwala kubalasi nakuli basyamfumu, mukuba bakambone kuli beena, naku Benafyaloo.

¹⁹ Lelo ngabamikwata, mwikasakamana pafyo mukalandaa nangu ifyo mukafilanda, lintu insita ikaflifa mukapelwa ifyakulanda.

20 Pantu amasiwi mukalanda tayakabe yenu, yakafuma ku mupasi wakwa Wisinwe ukalalanda muli mwebo.

21 "Munina akepaisya munina, nawisi akakita fimofine kubana, nabaana nabo bakemina wisi nokumwipaisya.

22 Kabili mukapatwa kuli bonse pamulandu nesina lyandi. Lelo onse ukasipikisyu ukufika kumpela akapusuka.

23 Ngabamipakasa mu musumba umo, butukileni muli umbi. Ndemyeba ukuti tamwakapwisyu umulimo wenu mumisumba yonse iyamu Israeli ninsi Umwana Wamuntu aisa.

24 "Umusambi tekuti akile kafundisya, umubomfi teti akile imfumu yakwe.

25 Umusambi kuti afika pakuba nga kafudisya nomubomfi nge mfumu. Ngakyakuti umutwe wa njanda baleewita ukuti Beleezebu, abamu njanda bakabeta amasina ayabi ukukilapo!

Ninani uwakutiina

(*Luka 12.2-7*)

26 "Mwilabatiina, pantu takuli ikyafimbwapo ikisyakasokoloke, nangu ikyafisama ikisyakesibikwe.

27 Ifyo ndemyeba mumfimfi mukafilande palubuto, nafyonse mwaum-fwa mukumisonga imwe mukalefilanda pamulu wa njanda.

28 Kabili mwilatiina abepaya umubili lelo teti bepaye umweo, lelo muletiina uwingonaula fyonse umubili nomweo mu Gehena.

29 Busye utupele tubili tatusitiswa nolupiya lomo? Lelo tapali nangu kamo akengapona pansi ukwabula ubufwayo bwakwa Wisinwe.

30 Imwe nemisisi yakumitwe yenu yalipendwa.

31 Eikyo mwilatiina, pantu mwalikila utupele utwingi!

Ukulumbula nokukana Yesu

(*Luka 12.8-9*)

32 "Bonse abalandu palwalala ukuti baba nanebo, nanebo nkakita fimofine pamenso yakwa Taata mumulu.

33 Lelo onse uwankana pamenso ya bantu, nkamukana pamenso yakwa Taata mumulu.

Temutende, lelo lupanga

(*Luka 12.51-53; 14.26-27*)

34 Mwilatontonkanya ukuti naisa mukuleta umutende pesonde iyoo, nsyaisa mukuleta umutende lelo naleta ulupanga.

35 Naisa mukupusanya umwana umwaume nawisi, umwana umwanakasi nanyina, umuko umwanakasi nanyina fyala,

36 kabili abalwani ba muntu, bakaba ba munjanda yakwe.

37 "Onse uwatemwa wisi nanyina ukukila nebo tandingile, kabili naonse uwatemwa umwana wakwe umwaume no mwanakasi ukukila nebo tandingile.

38 Onse usipiita umusalaba wakwe no kunkonka, talingile ukuba umusambi wandi.

39 Onse uwasanga umweo wakwe akaulufya, kabili onse uwalufya umweo wakwe pamulandu wandi akausanga.

Ifilambu

(*Mako 9.41*)

40 "Onse uwampikelela ninsi apokelela nebo, kabili naonse uwampikelela ninsi apokelela uwantuma.

41 Onse uwapokelela kasesema pamulandu wakuti ni kasesema, akapokelela ikilambu kyakwa kasesema, kibili naonse uwapokelela umuntu umulungami pamulandu wakuti mulungami, akapokelela ikilambu kya mulungami.

42 Kibili naonse uwapeela kamo pali utu twaike ulukombo lwamensi yatalala pamulandu wakuti kamusambi kandi, ndemyeba ikinekine nati akapokelapo ikilambu kyakwe."

11

*Intumi syafumine kuli Yohani Kabatisya
(Luka 7,18-35)*

1 Lintu Yesu apwiile ukulangilila abasambi bakwe ikumi limo nababili ifyakukonka, afumine kuli ilya nkende nokuya mukufundsiya nokusimikila mumisumba yamu Galili.

2 Nomba lintu Yohani Kabatisya mukifungo aumfwile pafintu fyonsé Klisu aleekita, atumineko abasambi bakwe bamo kuli ena.

3 Baipwisye Yesu ukuti, "Busye niwebo uuli nokwisa nangu tuloleleku umbi?"

4 Yesu ayaswike ukuti, "Kamwebeni Yohani fintu muleumfwa nafintu mulemona,

5 impofu silemona, ifilema fileyenda, abafibasi balepolo, bankomya matwi baleumfwa, abafwa balebusiwa, kibili ne Mbila Nsuma ilebilwa kubabusu.

6 Alipalwa uusiipununa pamulandu wandi!"

7 Lintu abasambi bakwa Yohani baile, Yesu atampile ukulanda pali Yohani kwi bumba ukuti, "Lintu mwaile kuli Yohani mukiswebebe, kinsi mwaleenekela ukumona? Busye litete lilepunga kumwela?

8 Busye kinsi mwaile mukumona? Busye muntu uwafwele insalu syabusaka? Iyoo abantu abafwala ifyo bekala ku kipango!

9 Busye kinsi mwaile mukumona? Busye nikasesema? Ee, lelo ndemyeba ukuti, mwamwene uwakila pali kasesema.

10 Yohani emuntu amalembo yalandapo ukuti, 'Moneni, nkatumá intumi yandi iyakuntangilila, iyakukupekanisisya insila.'

11 Ndemyeba ukuti Yohani mukalamba ukukila bonse abaikalapo pakyalo. Lelo uwakepesya Mubufumu bwa mumulu mukalamba ukukila Yohani.

12 Ukufuma pansita yakwa Yohani Kabatisya ukufika nandakai Ubufumu bwamumulu bwaba bwakulwila, nababulwila pamaka ebabupoka.

13 Pantu bakasesema bonse namafunde yalesesema ukufika pali Yohani,

14 ngamulefwaya ukusumina imbila yabo, Yohani ni Eliya uo balandile ukuti ali nokwisa.

15 Uuli namatwi omfwe!

16 "Nomba, busye nipii ningapasyanya ino nkulo? Ili nga baike abaleyangala pakisankano. Ibumba limo lilebilisyia ilinankwe ukuti,

17 Twalimilisisye inyimbo syapa bwinga, lelo tamwakindile! Twalimibile cilolo, lelo tamwalilile!"

18 Pantu lintu Yohani aisile talelya nokunwa, kibili nabonse balandile ukuti, 'Alikwata ikibanda!'

19 Lintu Umwana Wamuntu aisile aliliile nokunwa, kibili bonse balandile ukuti, 'Moneni uyu muntu, alalisya, kibili alanwa, nikibusu wabakanikesya bamusonko na babembu!' Nomba ifikitwa fyamano yakwa Lesa filasinina ukuti wakisinka."

*Imisumba iisyasumina
(Luka 10.13-15)*

²⁰ Yesu atampile ukwebaula imisumba umo akitile ifipesyamano ifingi, lelo abantu tabalapile.

²¹ "Walisyama, we Chorazini! Walisyama, we Betisaida! Ifisugusyo ifyakitwa muli webo fingakitwa mu Tare nangu Sidoni, abantu bamulya ngabalilapile akale mukufwala ifilanga nokuisuba imito!

²² Ndemyeba ukuti pabusiku bwa Bupingusi Lesa akalangapo uluse ulukalamba kubantu bamu Tare na Sidoni ukukila mwebo!

²³ Kabili nawe Kapenamu! Busye walefwaya ukuisansabika ukufika mumulu? Ukaposwa ku Gehena! Ifisungusyo fyakitilwe muli webo fingakitwa mu Sodoma nandakai ngepoili!

²⁴ Eikyo ndemyeba ukuti Pabusiku bwa bupingusi Lesa akalangapo sodoma uluse ulukulu ukukila mwebo!"

*Iseni mutuusye kilinebo
(Luka 10.21-22)*

²⁵ Pali iyoine nsita Yesu aebele ukuti, "Mwetaata, Imfumu ya mumulu napesonde! Namitotela pantu ifi fintu mwalififisa kubamano naku basambila, mwafisokolola ku bana.

²⁶ Ee, Mwetata ifi fyali bufwayo bwenu.

²⁷ "Tata alimpela ifintu fyонse. Kabili takwaba uwaisiba Umwana kanofye Wisi, kabili takwaba uwaisiba Wisi kanofye Umwana nabo bonse abo Umwana aasala ukusokolwela.

²⁸ "Iseni kuli nebo, mwebacucutika, namweba fininwa nefisendo, nalami peela ukutuusya.

²⁹ Piteeni ikoli lyandi, kabili nokusambilila kuli nebo, pantu ndiwa-mutembo kabili nalifuuka mu mutima, kabili mukasanga ukutuusya.

³⁰ Pantu ikoli lyandi talyayafya, nekisendo kyandi kyalyanguka."

12

*Ilipusyo lyape Sabata
(Mako 2.23-28; Luka 6.1-5)*

¹ Yesu na basambi bakwe baaleyenda mwibala lya ɻano Pesabata. Abasambi bakwe bayambile ukusaba imisonso ya ɻano balalya pantu balyumfwile insala.

² Lelo lintu Abafalise bamwene ifi baebele Yesu ukuti, "Mona, abasambi bobe balekita ifyakanisiwa ukukita Pesabata!"

³ Yesu ayaswike ukuti, "Busye tamwabelenga fintu Davidi akiitile na bantu bakwe lintu baumfwile insala?

⁴ Aingile munjanda yakwa Lesa na bantu bakwe nokulya umukate wapelwe kuli Lesa, nanguline takyali nakisuminisiwa mumafunde bena ukulya, kanofye basimapepo ebaali nabasuminisiwa ukulya.

⁵ Nangu busye tamwabelenga mwifunde ukuti basimapepo bamwi Tempele abalebomba pe Sabata bakaana ukusunga ikyebo kya pabusiku bwe Sabata, lelo bali abakaele?

⁶ Ndemyeba ukuti pano pali uwakila pe Tempele.

⁷ Mwingesiba umwalola ukuti, 'Ine mfwaya uluse telambo lyanama.' Ngatamupeela abakaele imilandu,

⁸ pantu Umwana Wamuntu ni Mfumu ye Sabata."

*Yesu aundapa umuntu wakisansa kyalemana
(Mako 3.1-6; Luka 6.6-11)*

⁹ Yesu afumine kuli ilya nkende nokuya ingila mu sinagogi lyabo,
¹⁰ kibili kwali umuntu uwali nekisansa kyalemana. Baipwisye Yesu ukuti, "Busye kyalisuminisiwa ukundapa Pesebata?" Pakuti bamupele umulandu.

¹¹ Yesu ayaswike ukuti, "Ngakyakuti umo pali mwebo nakwata Impaanga elo yawila mukikulo Pesabata, busye tekutí ailobole?

¹² Busye umuntu takindamapo ukukila Impaanga! Eikyo kyalisuminisiwa ukukita ikisuma pabusiku bwe Sabata."

¹³ Elo aebele umuntu ukuti, "Tambalika ukuboko kobe."

Umuntu atambalike ukuboko, kibili kwalipolele nga kumbi ukwasyala.

¹⁴ Elo Abafalise bafuma haya mukumfwana ifya kwipaya Yesu.

Umubomfi uwasalwa uwakwa Lesa

¹⁵ Ikyo Yesu alisibe amapange yabo, alifumine kuli ilya nkende, kibili ne bumba ilikalamba lyalimukonkele nao alibondepe bonse.

¹⁶ Alibasokele ukuti beyebako bambi pali ena.

¹⁷ Ifi fyali kufikilisyia ifyalandile kasesema Ezaya ukuti,

¹⁸ "Uyu emubomfi wandi, uo nasala,
uo natemwa, kibili uo mbekelwamo.

Nkabika Umupasi wandi pali ena,
kabili akasimikila ubupingusi kufyalo.

¹⁹ Takalekita fikansa nangu ukupuunda,
tapakabe uukomfwa isowi lyakwe mumisebo.

²⁰ Takafunaule itete ilyafwantwa,
nangu ukusimya ulukuni ululepya.

Mpaka umulinganya ukakimfyé,

²¹ kibili ifyalo fikabika isubilo muli ena."

Yesu na Beleezebu

(Mako 3.20-30; Luka 11.14-23)

²² Baletele kuli Yesu umuntu uwali impofu kibili talelelanda pantu alik-wete ifibanda. Nao Yesu aundepe umuntu ayamba ukumona nokulanda.

²³ Ibumba lyonse lyalipapile pali fintu Yesu akiitile. Baipwisye ukuti, "Busye kuti aba Mwana wakwa Davidi?"

²⁴ Lintu Abafalise sera baumfwile ifi bayaswike ukuti, "Atamfyia ifibanda pamulandu umukalamba wafibanda Belezebu alamupeela amaka yaktamfyá."

²⁵ Yesu alisibe fintu baletontonkanya eikyo aebele ukuti, "Ubufumu bonse ngabwayakanika nokwamba ukwilwisya teti bwiminine. Kibili nomusumba nangu ulupwa ulwayakanika mu mabumba nokwamba ukwilwisya lukonaika.

²⁶ Kansi Satana ngakuti atamfyia Satana ninsi aimina umwine eka. Nomba busye ubufumu bwakwe kuti bwaiminina syani?

²⁷ Ngantamfyia ingulu ukubomfyia Belezebu. Kansi ngabana benu sera batamfisyia mu maka yakwani? Abana benu ebakamipingula!

²⁸ Umupasi wakwa Lesa ngeumpa amaka yakutamfyia ingulu ninsi Ubufumu bwakwa Lesa nabwisa palimwebo.

²⁹ "Takuli umuntu uwingengilila umuntu uwamaka nokupiita ifyuma fyakwe, kano ayambilapo ukukaka umuntu uwamaka, elo engengila nokupiita ifyuma fyakwe.

30 “Onse usyaba nanebo ninsi mulwani, usingafwa ukukolonganika ninsi alasalanganya.

31 Kibili ndemyeba ukuti abantu kuti baelelwa imembu syonse ne-fyabubifi balaanda, lelo onse uwapontela Mupasi wamusilo takelelwe.

32 Nowalandama amasiwi yamusala lula pa Mwana Wamuntu kuti aeelwa, lelo uwapontela Mupasi Wamusilo takelelwe pali ndakai nomuyayaya.

Ikimuti nefitwalo fyakiko

(*Luka 6.43-45*)

33 “Pakukwata ikitwalo ikisuma kukwata ikimuti ikisuma, ngokwete ikimuti ikibi ukakwata ikitwalo ikibi. Ikimuti bakisibila kufitwalo kitwala.

34 Mwensonka mwe! Kuti mwalandama syani ifintu ifisuma mwe babifi? Pantu akanwa kalanda ifyaisula mumutima.

35 Umuntu umusuma afumya ifintu ifisuma ifyamukipao kyakwe ikisuma, kibili nomubifi afumya ifintu ifibi ifyamukipao kyakwe ikibi.

36 Lelo Ndimukumyeba ukuti, pabusiku bwa bupingusi umuntu onse akalubulula pesiwi lyonse ilyabula ubuyo aalandapo.

37 Amasiwi yenu yakabomfesiwa mukumipingula, kukulanda ati muli bakaele nangu muli bamilandu.”

Bafwaya ikisibilo kyakipesya mano

(*Mako 8.11-12; Luka 11.29-32*)

38 Elo bakafundisyu Bamafundye naba Falise bamo baeba Yesu ukuti, “Wekafundisyu, Tulefwaya ukumona ikisibilo kuli webo.”

39 Lelo Yesu abaswike ukuti, “Inkulo iyabubifi kibili iyabukende ilomba ikisibilo, lelo tapali ikisibilo ikikapelwa kuli yena ukukila ikisibilo kyakwa kasesema Yona.

40 Filyafine Yona apwile insiku sitatu, ubusiku nakasuba munda yak-isabi, efintu no Mwana Wamuntu akapwa insiku sitatu, ubusiku nakasuba mu musili.

41 Pabusiku bwa bupingusi abantu baku Ninive bakeminina nokumipa umulandu, pantu balilapile imembu syabo lintu baumfwile Yona alesimikila, nomba ndemyeba nati, pano pali umukalamba ukukila Yona!

42 Pabusiku bwa bupingusi Namfumu waku Sheba akeminina nokumipa umulandu, pantu alyendele ukufuma kukyalo kyakwe ukwisa umfwa kumafundisyo ayamano ku mfumu Solomoni, kibili ndemyeba nati, pano pali umukalamba ukukila Solomoni!

Ukubweluluka kwa Mupasi Wakowela

(*Luka 11.24-26*)

43 “Ilyo umupasi wakowela wafuma mumuntu, ulaya ulelulumba umwabula amensi mukufwaya umwakutuusya kibili taumusanga.

44 Uyeba uwine weka ukuti, ‘Nalabwelela munjanda yandi.’ Ilyo wabwele-lamo nokusanga tamuli nangu kimo, namupyangwa, nabamubika bwino, umwabusaka.

45 Ulaya wayapiita imipasi simbi isili kinelubali isyabipisyapo ukuukila, nokwisa ikala mulya. Nomba imibeele yabumi bwawulya muntu, iya pakulekelesya yabipisyapo ukukila iyantansi. Ifi efikakitika kuli ino nkulo iyibifi.”

Nyina nabamunyina bakwa Yesu

(*Mako 3.31-35; Luka 8.19-21*)

⁴⁶ Lintu Yesu aalelanda na bantu, nyina na bamunyina bakwa Yesu balifikile. Baiminine panse balefwaya ukuti balande nao.

⁴⁷ Umo pa bantu abaali kulya amwebele ukuti, "Banoko na bamunoko beminine panse balefwaya ukulanda nobe."

⁴⁸ Yesu amwaswike ukuti, "Busye bamayo nibani? Nangu bamuninane bandi nibani?"

⁴⁹ Elo asonta pabasambi bakwe nokulanda ukuti, "Moneni! Aba ebamayo nabamuninane!"

⁵⁰ Onse uukita ubufwayo bwakwa Taata emuninane, enkansi yandi kibili emayo."

13

Umulumbe wakwa katanda wa mbuto (Mako 4.1-9; Luka 8.4-8)

¹ Bulyabwine busiku Yesu afumine mujanda nokuya mumbali ya munana eko aikele.

² Ibumba ilikalamba lyalimukolongene ikyakuti apateme mubwato emo aikala, kibili nebumba lyonse lyaimininne kunshiko.

³ Abebele ifintu ifingi mumilumbe ukuti,

"Katanda wa mbuto aile mukutanda.

⁴ Nalintu atandile, imbuto simo syaponene mumbali yansila, kibili nefyoni fyaisileya.

⁵ Simbi syaponene pansakalabwe, apaali iloba ilinono, inseke syatampile ukumena bwangu bwangu pantu umusili tawaile saana pansi.

⁶ Lelo lintu akasuba katulile, fyonse fyalipile nokubonsa pantu tafyak-wete imisila.

⁷ Simbi syaponene mu myunga. Imyunga syalikulile nokwisa sitabilila.

⁸ Lelo simbi syaponene mu musili uusuma, kibili syalikulile nokutwala ifisabo, imiku umwanda umo, simbi amakumi mutanda, nasimbi amakumi yataatu (30) ukukila isyabyelwe.

⁹ "Uukwete amatwi naomfwe!"

Umulandu wakubomfyia imilumbe (Mako 4.10-12; Luka 8.9-10)

¹⁰ Elo abasambi baisile kuli Yesu bamwipusya ukuti, "Nikinsi ulandila nabantu mumilumbe?"

¹¹ Yesu abaswike ukuti, Pantu ukwisiba inkama ya bufumu bwa mumulu kwalipelwa kuli mwebo, lelo tekuli bena.

¹² Pantu umuntu uwakwatapo fimo akapelewapo nafimbi, pakweba ati akakwate ifingi ukukilapo, lelo umuntu usyakwata nangu kimo akapokwa na kanono kantu akwata.

¹³ Ifi efintu ndandila nabo mumilumbe, "Pakuti balolesye, lelo ukwabula ukumona kibili bomfwe lelo ukwabula ukwiluka.

¹⁴ Ubusesemo bwakwa kasesema Esaya bwalifikilisyé kuli bena ukuti,
"Mukomfwa lelo ukwabula ukwiluka,

mukalolesya lelo ukwabula ukumona,

¹⁵ pantu imitima yaaba bantu tayakutulukwa,

kibili na matwi yabo yalikoma.

Kibili baalisala amenso yabo,

Ngateifyo amenso yabo,

ngayalamona,

na matwi yabo ngayalomfwa,

Ne mitima yabo ngaileluka kibili ngabalibwelela kuli nebo ukuti imbondape.'

16 "Lelo yalipalwa amenso yenu pantu yalamona, namatwi yenu pantu yalomfwa.

17 Ndemyeba ukuti bakasesema abengi na bantu abalungami balefwaisya ukumona ifi, lelo tabafimwene, kibili balefwaisya ukumfwa ifi muleumfwa lelo tabafyumfwile.

*Yesu alondolola umwalolele umulumbe
(Mako 4.13-20; Luka 8.11-15)*

18 "Umfweni nomba umulumbe wakwa katanda fintu ulepilibula.

19 Umuntu ngaumfwa imbila yapa Bufumu ukwabula ukwiluka, aba ngembuto syaponene mumbali yansila. Umubiifi alesa nokwisa sompolo ifyabyelwe mumitima wakwe.

20 Imbuto syaponene pansakalabwe simininako, abantu abomfwa imbila kibili palya pene baipokelela ne nsansa,

21 Lelo apo muli bena tamwaba misila. Basipikisyafye apalinga kibili lintu amafya no kupakaswa kwaisa pamulandu wambila balanenuka bwangu.

22 Imbuto syaponene mumyunga simininako abo bonse abomfwa imbila, lelo amasakamiko yabwikasi buno nomukonkelelo wafyuma watosya imbila, kibili tabatwala fisabo.

23 Kibili nembuto syaponene mu musili uusuma simininako abo bonse abomfwa imbila nokwiluka, balatwala ifisabo, bamu imiku umwanda umo, bambi amakumi mutanda, kibili nabambi amakumi yatatu ukukila fintu babyele."

Umulumbe wakalolo

24 Yesu abebele umulumbe naumbi ukuti, "Ubufumu bwa mumulu bwaba ngo muntu uwabyele imbuto isisuma mwibala lyakwe.

25 Lelo lilya abantu bonse bali mutulo ubusiku, umulwani aisile byalamo kalolo munjano nokuya.

26 Kilya imisonga yamena yapakula nokupakula, elo kalolo nayo yamoneka.

27 Ababomfi baulya muntu baisile kuli ena nokumweba ukuti, 'Mwemfumu, busye tamwatandile imbuto isisuma mwibala? Nga kalolo aafumine pi?'

28 Ayaswike ukuti, 'Umulwani ewakitile ifi. Busye ulefwaya tuleyanukulamo kalolo?'

29 Abaswike ukuti, 'Awe, pantu ilyo mulenukula kalolo kuti mwanukwila pamo nejano.

30 Lekeni injano na kalolo fikulile pamo mpaka pa busombosi. Nkeba abakalasombola ukunukulamo kalolo pakwamba, ukuikaka mufikuka nokuyokya, kibili nokulonganya injano ukubika mubutala.'

*Umulumbe wa luseke lwabanga
(Mako 4.30-32; Luka 13.18-19)*

31 Yesu abebele umulumbe naumbi ukuti, "Ubufumu bwamumulu bwaba ngo luseke lwa lubanga ulo umuntu apiitile nokuya byala mwibala lyakwe.

32 Luseke ulunono panseke syonse, lelo ilyo lwakula, luba kimpunsa ikikalamba palifyonse mwibala. Kisanguka ikimuti, ikyakuti nefyoni fipanga ifinsa kumisambo yakiko."

*Umulumbe wantutumusi
(Luka 13.20-21)*

³³ Kabili Yesu abeba naumbi umulumbe ukuti, "Ubufumu bwamumulu bwaba nge ntutumusi sintu namayo apitile angandwila mufipimo fitatu ifyabunga mpaka umufuba onse watutumuka."

*Kintu Yesu aalandile imilumbe
(Mako 4.33-34)*

³⁴ Fyonse ifi Yesu abomfesye imilumbe pakweba amabumba, taalandile ikintu nangu kimo ukwabula ukubomfyा umulumbe.

³⁵ Akiitile ifi mukufikilisyा fintu kasesema Ezaya alandile ukuti, "Nkabomfyा imilumbe pakulanda nabo, nkabeba ifintu ifyafisama ukutula papubumbo bwe sonde."

Yesu alondolola umulumbe wakalolo

³⁶ Yesu afumine pa mabumba nokwingila mujanda, abasambi bakwe basile kuli ena nokumweba ati, "Twebe fintu umulumbe wakalolo mwibala ulepilibula."

³⁷ Yesu abasuka ukuti, "Umuntu uwabyele inseke isisuma Mwana Wamuntu.

³⁸ Ibalà lisonde, inseke isisuma bantu aba Mubufumu, kalolo bantu bamubifi,

³⁹ kabili nomulwani uwatandilemo inseke ni Kiwa. Ubusombosi nimpela yankulo, kabili na babomfi babusombosi ni bamalaika.

⁴⁰ Ngafilya kalolo alonganikwa nokokewa mumulilo, efintu kikaba na pampela yakyalo.

⁴¹ Umwana Wamuntu akatuma bamalaika mukukolonganika abo bonse abalenga abantu ukubembuka nabo bonse abakita ifintu ifibi, ukubafumya Mubufumu bwakwe,

⁴² kabili bakabaposa mwilungu lyamulilo, umukaba ukulila nokusumanya ameno!

⁴³ Elo abalungami bakabengesime nga kasuba Mubufumu bwakwa Tata. Uukwete amatwi naomfwe!

Umulumbe wakipao kyafiswa

⁴⁴ "Ubufumu bwa mumulu bwaba nge kipao kyafiswa mwibala kintu umuntu atutwila nokufimbapo, elo aya nasansamuka ngansi, asitisya nafyonse fintu aakwata ayasitamo lilya ibala.

Umulumbe wa bulungu

⁴⁵ "Nakabili Ubufumu bwa mumulu bwaba ngo muntu wamakwebo ulefwaya ubulungu ubwayemba.

⁴⁶ Kilya asanga ubwayembesyा ayasitisya fyonse fintu aakwata nokuyabusita.

Umulumbe wa Bukonde

⁴⁷ "Kabili Ubufumu bwamumulu bwaba ngo bukonde ubwaposwa pamumana nokwipaya isabi lyamisango yonse.

⁴⁸ Lintu isabi lyaisula mubukonde abashila babutintila kunshiko baikala balasala, ilisuma babika mukitunga, ilibi baliposa.

⁴⁹ Efintu kikaba pakupwa kwakyalo, bamalaika bakesapatula abantu ababifi ukubafumya kubalungami

⁵⁰ nokuyabaposa mwilungu lyamulilo umo bakalila nokusumanya ameno yabo.

Iciine cakale necipyा

51 "Elo Yesu abepusya ukuti, "Busye Namwiluka ifintu fyonse ifi?" Nabo bamwasuka ukuti, "Ee".

52 Kibili abebele ukuti, "Eikyo onse kafundisya Wefunde uwaba umusambi wa Mubufumu bwa mumulu ali ngomwine warjanda uufumya ifipao fyakwe ifipyा ne fyakale muntu afisungila."

*Yesu bamukana ku Nazareti
(Mako 6.1-6; Luka 4.16-30)*

53 Lintu Yesu apwisiye ukulanda iyi milumbe alifumine kuli ilya nkende

54 nokubwelulukila ku musumba wakwe. Aafundisye musinagogi nabonse abaumfwileko balisungwike. Baipwisye ukuti, "Busye nipi aafumya aya mano namaka yakukita ifisungusyo?"

55 "Busye uyu temwana Kapopa wambao? Busye temwana Mariya? Busye Yakobo, Yosefu, Simoni na Yuda tebamunyina?

56 Busye bankasi yakwe tatwikala nabo kuno? Nga nipi aafumya fyonse ifi fintu?"

57 Eikyo balimukene.

Lelo Yesu abebele ukuti, "kasesema kunkende syonse balamukindika ukufumyakofye mumusumba wakwe nakuli balupwa bakwe."

58 Eikyo takitileko ifisungusyo ifingi pantu tabakwete ikitetekelo.

14

*Imfwa yakwa Yohani Kabatisya
(Mako 6.14-29; Luka 9.7-9)*

1 Pali ilya nsita Herodi imfumu yamu Galili, yaumfwile ululumbi pali Yesu.

2 Yaebele bakilolo bakwe ukuti, "Ni Yohani Kabatisya eubukile kubafwa, ekintu akwatiile amaka yakukita ifisungusyo."

3 Pantu Herodi alikete Yohani, amukaka mu minyololo nokumubika mukifungo. Aakitile ifi pamulandu na Herodyasi muka munyina Filipi.

4 Yohani aebele Herodi ukuti, "Takyasuminisiwa webo ukupa Herodyasi!"

5 Herodi alefwaya ukwipaya Yohani lelo aletiina abantu, pantu bena balisumine Yohani ukuti ni kasesema.

6 Lelo Pakusefya ubusiku bwa kufyalwa kwakwa Herodi, umwana wakwa Herodyasi umwanakasi alicindile ku ntansi ye bumba kabilii aisekesye Herodi,

7 ikyakuti alilapela ukumupela kyonse kintu engalomba.

8 Lelo nyina ailemusonga, eikyo alandile ati, "Mpeni umutwe wakwa Yohani Kabatisya pansani!"

9 Imfumu yalisakamene lelo pamulandu nomulapo yapangile pa meno ya bantu bonse yakoncomesye ukuti bamupele.

10 Yatumine abakuyaputula umutwe wakwa Yohani mukifungo.

11 Baletele umutwe pa nsani bapela akakasyana, nako kayapeela nyina.

12 Abasambi bakwa Yohani bapiitile ikitumbi bayasika elo bayaeba Yesu.

*Yesu apeela amakana ya bantu yane ifyakulya
(Mako 6.30-44; Luka 9.10-17; Yohani 6.1-14)*

13 Lintu Yesu aumfwile ifyakitike, afumine kulya nobwato nokuya kunkende yakwe eka. Lelo lintu ibumba lyaumfwile ifi, lyamukonkele ulwa pansi ukufuma mumisumba.

¹⁴ Lintu Yesu afikile ku nshiko amwene ibumba ilikalamba, umutima wakwe waiswilemo inkumbu, kabili aundepe amalwele yonse.

¹⁵ Mukyungulo abasambi bakwe baisile kuli ena nokumweba ukuti, "Kuno tuli nikukiswebebe kabili nakasuba nakawa, eba abantu baye mumisi bayesita ifyakuti balye."

¹⁶ Yesu nao abaswike ukuti, "Tabafwile ukuya, mwebobene bapeniko ifyakuti balye!"

¹⁷ Bayaswike ukuti, "Tukwetefye imikate isano nesabi libili."

¹⁸ Yesu alandile ukuti, "Leteni kuli nebo."

¹⁹ Aebele amabumba ukwikala pafyani, elo abuula imikate isano ne sabi libili, alolesya mu mulu aapala ifyakulya. Aamokwele imikate isano apela abasambi, nabo abasambi bayakanya abantu.

²⁰ Abantu bonse balilile nokwikuta. Kabili nabasambi bapiitile ifitunga ifyaisula ifyakulya fyasyelepo.

²¹ Impendwa yabaume abalile yali amakana yasano (5,000) ukwabula ukupendelako abanakasi, na baana.

Yesu aenda pamensi

(Mako 6.45-52; Yohani 6.15-21)

²² Yesu aebele abasambi bakwe ukupatama mubwato bamutangilile busilya bwa mumana, ilyo ena alesalanganya abantu.

²³ Panuma ya kusalanganya abantu, apilukile pa lupili mukupepa. Lintu ikyungulo kyafikile aali kulya kwine eka,

²⁴ lelo pali iyi nsita ubwato bwali nabufika apatali, bwalesenkela nama-puta pantu umwela walebusunka.

²⁵ Kuli kakula Yesu aisile ku basambi, aleyenda pamumana.

²⁶ Lintu abasambi bamumwene aleyenda pamumana balitiinine ngansi, baebele ukuti, "Kiwa!" Kabili bapundile no mwenso.

²⁷ Lelo Yesu palyapene abeba ukuti, "Tekeni imitim, Ninebo mwitiina!"

²⁸ Petelo epakulanda ukuti, "Wemfumu, nganiwebo ngeba ingise kuli webo ndeyenda pamensi."

²⁹ Yesu nao amwaswike ukuti, "Isa!" Petelo akokele mubwato nokwamba ukwenda pamensi aleya kuli Yesu.

³⁰ Lelo lintu amwene umwela alitinine, ayamba nokwibila mumensi. Alilile ukuti, "Mwe Mfumu, mpususyen!"

³¹ Yesu palyapene atambulwile ukuboko amukwata nokulanda ukuti, "We muntu wakitetekele kinono! Kinsi wakitisikila?"

³² Lintu bapateme mubwato nomwela walala.

³³ Elo abaali mubwato basinsimwine Lesa ukuti, "Mukiine uli Mwana wakwa Lesa!"

Yesu aundapa umulwele mu Genesareti

(Mako 6.53-56)

³⁴ Kabili lintu bayabwike umumana, baisile kukyaloo kya Genesareti.

³⁵ Lintu abantu bakuli ilya nkende baisibe Yesu, balaisye bonse muli ilya nkende ukuleta bonse abaali nabalwala kuli Yesu.

³⁶ Balimupapatile ukuti, aleke abalwele bakumyekofye kumpela yansalu yakwe, kabili na bonse abakumisyecko balipolele.

¹ Elo Abafalise bamo naba Kafundisya bamafunde bafumine ku Yerusalemaisa kuli Yesu nokumwipusya ukuti,

² "Nikinsi abasambi bobo baletobela intambi syafikolwe fyesu? Tabasamba ku minwe pakulya!"

³ Yesu abaswike ukuti, "Nemwe nikinsi mutobelai ifipope fyakwa Lesa, pamulandu nentambi syenu?

⁴ Pantu Lesa alandile ukuti, 'Ulekindika wiso na noko,' kabilii 'naonse uwalandia ifibi pali wisi nangu pali nyina, afwile ukwipaiwa.'

⁵ Lelo mwebo mulanda ukuti umuntu nganakwata fintu engafwilisya wisi nangu nyina, mulanda ukuti, 'fyakwa Lesa,'

⁶ eikyo tafwile ukukindika wisi, pamulandu nentambi syenu mulenga imbila yakwa Lesa ibe iyafye.

⁷ Mweba bumbimunda! Ezaya alilungike lintu aseseme pali mwebo ukuti,

⁸ 'Aba bantu bankindikafye pa kanwa,
lelo imitima yabo yaba ukutali nanebo.

⁹ Bansinsimunafye apafye,
namafunde yabo yabuntunse!' "

*Ifintu ifilenga umuntu ukukowela
(Mako 7.14-23)*

¹⁰ Yesu aitile abantu nokubeba ati, "Kutikenai nokwiluka!

¹¹ Ifingila mukanwa kamuntu tafimulenga ukukowela lelo ififuma mukanwa kamuntu efimulenga ukukowela."

¹² Elo abasambi baisile kuli ena nokumweba ukuti, "Busye namwisiba ukuti aba Falise nakibakalipa lintu bakyumfwa fintu mwakilandia?"

¹³ Yesu ayaswike ukuti, "Kyonse ikimuti kintu Taata mumulu tabyala, kikanukulwa.

¹⁴ Balekeni, nintungulusi impofu, kabilii impofu ngayatungulula impofu inankwe bonse kuwilila mucikulo."

¹⁵ Petelo aebele ukuti, "Tulondolweleni umwalolola uyu mulumbe."

¹⁶ Yesu abepwisyе ukuti, "Busye nanomba tamwiluka?

¹⁷ Busye tamumona ukuti kyonse ikingila mukanwa, kipita munda, elo kyafumina kunse ya mibili?

¹⁸ Lelo ififuma mukanwa, fifuma mu mutima kabilii ifi efilenga umuntu ukukowela.

¹⁹ Pantu mumutima mufuma imilangwe iibi, ukwipaya, ubukende, ubulalelale, ubujo, bukambone bwa bufi, no musalula.

²⁰ Ifi efikowesya umuntu, lelo ukulya ukwabula ukusamba kuminwe takukowesya umuntu."

*Ikitetekelo kyakwa namayo waku Kenani
(Mako 7.24-30)*

²¹ Kabilii Yesu afumine kulya nokuya kufitungu fya Tare na Sidoni.

²² Namayo waku Kenani uwaleikala muli ilya nkende aisile alebilisya ukuti, "We Mfumu, Mwana Davidi mbelela uluse! Umwana wandi umwanakasi alekyusisa nekibanda."

²³ Lelo Yesu tamwaswikepo iswi nangu limo. Kabilii abasambi baisile kuli Yesu no kumupapata ukuti, "Mwebeni aleya! Aletupangilafye ifyongo!"

²⁴ Yesu ayaswike ukuti, "Natumwafye kumpaanga isyaluba isya munjanda yakwa Israeli."

25 Lelo namayo apalamine mupepi, afukama pansi nokumupapata ukuti, "Ngafwilisyen'i mwe Mfumu!"

26 Yesu ayaswike ukuti, "Tekintu ikyayana ukupiita umukate wabana ukuposela imbwa."

27 Nao ayaswike ukuti, "Kisinka mwe Mfumu, lelo nembwa sine silalya ubufungau bupona kwitebulo lyakwa wisikulu."

28 Yesu epakumwasuka ukuti, "Uli namayo wakitetekele ikikalamba! Kintu wakilafwaya kyalakitwa kuli webo." Kabili pali ilya ine nsita, umwana wakwe alipole.

Yesu aundapa abantu abengi

29 Kabili Yesu afumine kulya nokuya kumumana wa Galili. Aapilukile mumbali yalupili nokuyaikala kulya.

30 Amabumba ayakalamba yaisile kuli ena nokumuletela abantu aabali, abalema, impofu, ababulebe, bankomya matwi nabambi abantu abaali nabawala, bababikile pankasa syakwa Yesu, nao alibondepe.

31 Abantu balipapile ukumona bakibulu balelanda, abalema baleyenda, nempofu silemona kabili balumbenye Lesa wabena Israeli.

Yesu alisha abantu amakana yane

(Mako 8.1-10)

32 Yesu aitile abasambi bakwe abeba ukuti, "Nabomfwila inkumbu aba bantu, pantu baaba nanebo pansiku sitatu nomba apa tabakwete ifyakuti balye. Nsilefwaya ukubatuma baye ukwabula ukulya pantu kuti bapon ulushile pakuya."

33 Abasambi bamwipwisye ukuti, "Nipi twalasanga ifyakulisya ili ibumba muno mukiswebebe?"

34 Yesu abepwisye ukuti, "Mukwete imikate inga?"

Nabo bamwaswike ukuti, "Tukwete imikate kinelubali nesabi ilyalinga."

35 Yesu aebele ibumba ukwikala pansi.

36 Elo apiita imikate kinelubali nesabi, atasya Lesa, amokola apela abasambi nabo bapeela abantu.

37 Bonse balilile nokwikuta fyasyalanapo. Abasambi bapiitile ifitunga kinelubali ifyaisula ifyakulya fyasyelepo.

38 Impendwa yabaume abaalile ukwabula ukupendelako abanakasi nabana yali amakana yane.

39 Panuma Yesu asalanganya abantu, apateme mubwato nokuya kukyalo kya Magadani.

16

Abafalise balomba ikisibili

(Mako 8.11-13; Luka 12.54-56)

1 Kabili Abafalise naba Saduki baisile kuli Yesu mukumwesya, eikyo bamwipwisye ukuti abalange ikisibili ukufuma mumulu.

2 Lelo Yesu abaswike ukuti, "Akasuba nga kawa, mulanda ukuti, 'lelo kwakala bwino, pantu umulu uli uwakasika.'

3 Kabili ulukyelo mulanda ukuti, 'yalaloka pantu umulu uli uwakasika kabili uwafita.' Mwalisiba ukwilula imimonekele ya mulu, lelo teti mwilule ifisibili fya nsita!

4 Inkulo iibifi kabili iyabukende ifwaya ikisibili, lelo takuli ikisibili ikikapelwa kuli yena ukukila pa kisibili kyakwa Yona."

Eifyo Yesu alibasile nokuya.

*Intutumusi syaba Falise naba Saduki
(Mako 8.14-21)*

5 Lintu bayabukile busilya bwamumana, abasambi balilabile ukupiita umukate.

6 Yesu abebele ukuti, "Kengeleni ku ntutumusi syaba Falise naba Saduki."

7 Bayambawile abene beka ukuti, "Aalandila ifi pamulandu tatupitile umukate."

8 Lelo Yesu aisibe fintu baleyambaula, alandile ukuti, "Mwebakitetekelo ikinono, kinsi muleyambawila pakukana kwata umukate?

9 Busye tamwailuka nandakai? Busye tamwibusya imikate isano fintu yalisisyе abantu amakana yasano? Busye mwaiswisye ifitunga finga, ifya fyakulya fyasyelepo?

10 Nga pamikate kinelubali iyo nalisisye abantu amakana yane? Busye mwaiswisye ifitunga finga, ifya fyakulya fyasyalepo?

11 Nikinsi mwakifililwa ukwiluka ukuti nsyakilalanda pa mukate? Kengeleni kuntutumusi syaba Falise naba Saduki."

12 Elo abasambi bailwiike ukuti taalelanda pa ntutumusi sya mumikate, lelo nipamafundisyo yaba Falise naba Saduki.

*Petelo alanda ukuti Yesu ni Klistu
(Mako 8.27-30; Luka 9.18-21)*

13 Lintu Yesu aisile mukitungu kya Kaesaliya Filipi, aipwisye abasambi bakwe ukuti, "Busye abantu balanda ukuti Umwana Wamuntu ninani?"

14 Bayaswike ukuti, "Bamo balanda ukuti ni Yohani Kabatisya, bambi balanda ati ni Eliya, elo bambi balanda ukuti ni Yeremaya nangu umo muli ba kasesema."

15 Elo Yesu abepwisye ukuti, "Ngamwebo mulanda ukuti ninebo nani?"

16 Simoni Petelo ayaswike ukuti, "Niwebo Klistu, Umwana wakwa Lesa uwamweo."

17 Yesu amwaswike ukuti, "Walipalwa we Simoni mwana Yohani, pantu tekumuntu iki kisinka kyasokolwelwa kuli webo, lelo ni Taata uwamumulu ewakupela ubusokololo.

18 Kibili nakweba ukuti niwebo Petelo, kibili napa ili libwe nkakulapo ulukuta lwandi nempongolo syamaka yamfwa tafyakalukinfye.

19 Nkakupa imfungulo syabufumu bwa mumulu, kyonse kintu wakaka pesonde, namumulu kikakakwa, kibili nakyonse kintu wakakula pesonde na mumulu kikakakulwa."

20 Elo Yesu asoka abasambi bakwe ukuti tabafwile ukwebako umuntu nangu umo ukuti ni Klistu.

*Yesu asobela imfwa yakwe nokukyula
(Mako 8.31—9.1; Luka 9.22-27)*

21 Ukufuma pali ilya nsita Yesu ayambile ukweba abasambi bakwe ukuti, "Nkaya ku Yerusalemu mukukyula apakalamba ku bakalamba, kuli basimapepo bakindami nabakafundisya Bamatunde. Nkepaiwa, lelo panuma yansiku sitatu nkabusiwa kubafwa."

22 Petelo apiitile Yesu pambali nokumukalipila ukuti, "Iyoo we Mfumu! Ifi tafyakamikitikile!"

²³ Yesu apilibwike nokweba Petelo ukuti, "Fuma kuli nebo Satana! Uli kyakumpumfyanya munsila yandi, pantu amatotonkanyo yobe yabuntunse tayalefuma kuli Lesa."

²⁴ Yesu aebele abasambi bakwe ukuti, "Onse ulefwaya ukuba umusambi wandi, aikane umwine, apiite umusalaba wakwe nonkunkonka.

²⁵ Pantu onse upususya umweo wakwe acaulufya, lelo onse ulufya umweo wakwe pamulandu wandi akausanga.

²⁶ Busye umuntu finsi engakwatamo, nganonka isonde lyonse, lelo alufya umweo wakwe? Takuli kintu umuntu engapela ukukabusya nomweo.

²⁷ Pantu Umwana Wamuntu alinokwisa mubukata bwakwa Wisi naba Malaika bakwe, mukulambula umuntu ukulingana nefikitwa fyakwe.

²⁸ Ndemyeba ikisinka ukuti bamo pano tabakafwe mpaka bakamona Umwana Wamuntu aleisa Mubufumu bwakwe."

17

Yesu ayaluka

(Mako 9.2-13; Luka 9.28-36)

¹ Panuma yansiku mutanda Yesu apitiile Petelo, Yakobo namunyina Yohani pa lupili ulutali apo baileba beka.

² Yesu ayalwike pamenso yabo. Pamenso yakwe pabengesime nga kasuba. Nensalu syakwe sysangwike isyabuta ngo lubuuto.

³ Kibili kwamonekele Mose na Eliya baleambaula na Yesu.

⁴ Petelo epakweba Yesu ukuti, "We Mfumu kuti kyawama twaikala pano. Ngaulefwaya nalakula imitanda itatu, umo uobe, umo uwakwa Mose naumbi uwakwa Eliya."

⁵ Lintu Petelo akili alelanda, awe inkumbi ilyabeka lyabakupa, kibili nesiwi lyafumine mumakumbi nokulanda ukuti, "Uyu Mwana wandi untu natemwa, eombekelwamo mumfwileni!"

⁶ Lintu abasambi baumfwile isiwi, bawile pansi ubunkupeme kibili baiketwe nomwenso.

⁷ Lelo Yesu aisile kuli bena nokubakumya, elo abeba ukuti, "Imeni, mwitiina!"

⁸ Lintu bainwine amenso tabamwene nangu umo lelo Yesu ekafye.

⁹ Lintu baletentemuka pa lupili, Yesu abakonomesye ukuti, "Mwiybako nangu umo ikimonwa, mpaka Umwana Wamuntu akabusiwe kubafwa."

¹⁰ Kibili abasambi bamwipwisyе ukuti, "Busye nikinsi bakafundisyа bamafunde balandila ukuti Eliya awfile abalilapo ukwisa?"

¹¹ Yesu nao abaswike ukuti, "Kisinka, Eliya ali nokwisapo bwangu kibili akesa mona ukuti ifintu fyonse fyabela muntu fifwile ukubela.

¹² Lelo ndemyeba ukuti Eliya alisa kale kibili na bantu tabamwisibe, bamikitile ukulingana nefyabasekesye. Efintu no Mwana Wamuntu bakamukyusya."

¹³ Elo abasambi bailwike ukuti alebeba pali Yohani Kabatisya.

Yesu aundapa akalumendo akakwete ikibanda

(Mako 9.14-29; Luka 9.37-43a)

¹⁴ Lintu babwelele kwibumba, umuntu aisilefukamina Yesu nokumweba ukuti,

¹⁵ "We Mfumu belela umwana wandi uluse! Pantu alapona ikifulubi kibili alakyula ububi. Ilingi alaponena mumensi na mumulilo.

¹⁶ Nakimuleta ku basambi bobe lelo tabakimundapa."

¹⁷ Yesu ayaswike ukuti, "Mwenkulo iisyasumina, kibili iyaumalala imitima! Busye nekekala namwebo ukufika lisa? Busye nkasisipikisya ukwikalala namwebo ukufika lisa? Leteni akalumendo kuli nebo!"

¹⁸ Yesu akalipile ikibanda, nakyo kyafumine mukalumendo napali kalya kene kasita kapola.

¹⁹ Elo abasambi baisile kuli Yesu bamwipusya kumbali ukuti, "Busye nikinsi fwebo twakifililwa ukutamfyia ikibanda?"

²⁰ Abaswike ukuti, "Nipamulandu wa kitetekelo kyenu ikinono, ndemyeba ikisinka ukuti ngamwakwata ikitetekelo nga kaluseke ka lubanga, kuti mwalandala ku lupili ulu ukuti, 'Fuma apa selela kulya!' Nalo kuti lwasela. Tapali ifikasyupa kuli mwebo."

²¹ Lelo ifi tafiyafye kano kwi pepo nokufunga.

*Yesu asobela imfwa yakwe nakabili
(Mako 9.30-32; Luka 9.43b-45)*

²² Lintu abasambi bakolongene bonse mu Galili, Yesu abebele ukuti, "Umwana Wamuntu alaba pakupelwa mumaboko ya bantu

²³ bakamwipaya, lelo panuma ya nsiku sitatu akabusiwa kubafwa." Kibili abasambi baiwilemo ubulanda.

Umusonko we Tempele

²⁴ Lintu Yesu nabasambi bakwe baisile mu Kapenamu, bakasonkesya bamusonko wamwi tempele baisile ipusya Petelo ukuti, "Busye kafundisya wenu talipila umusonko wa mwi tempele?"

²⁵ Petelo nao abaswike ukuti, "alalipila."

Kibili lintu Petelo aisile panjanda, Yesu ewabalilepo ukumwipusya ukuti, "Simoni ngawebo uletipo syani? Nibani balipila umusonko ku mfumu syapano kyalo? Busye bana babo nangu bantu bambi?"

²⁶ Petelo alandile ukuti, "bantu bambi"

Yesu amwebele ukuti, "Ikileplibula ukuti abana babo tabafwile ukulipila.

²⁷ Lelo tatulefwaya ukuleta ubwafya. Kabiye ku mumana uposepo indobani, isabi ulebalilapo ukuloba, wisule mukanwa ulesangamo ulupiya ulwalinga ukulipila umusonko wamwi tempele ulobe nolwandii. Ulupiite ileyabalipila umusonko wesu."

18

*Ninani umukalamba?
(Mako 9.33-37; Luka 9.46-48)*

¹ Pali ilya nsita abasambi baisile kuli Yesu mukumwipusya ukuti, "Busye ninani umukalamba mu bufumu bwa mumulu?"

² Yesu aitile umwaike amwimika pakati kabo,

³ nokulanda ukuti, "Ndemyeba ikisinka ukuti ngatamupilibwike nokuba ngo mwana umunono tamwakengile mubufumu bwa mumulu.

⁴ Onse uwaikefya ngo mwana umunono, mukalamba mu bufumu bwa mumulu.

⁵ Onse uwapokelela umwana umunono ngoyu mwisina lyandi, ninsi apokelela nebo.

*Mwilalenga bambi ukubifya
(Mako 9.42-48; Luka 17.1-2)*

⁶ Lelo onse uwalenga ukuti kamo pali utu twaice utwasumina muli nebo ukubembuka, kyamuwamina ukumukakila ilibwe lya kupelelako mu mukosi nokumuposa pali bembba washika.

⁷ Akalanda pesonde pamulandu wafintu ifilenga abantu ukupunuka! Pantu ifi fintu fyalingile ukwisa, lelo akalanda ku muntu uwalenga fise!

⁸ Ukuboko kobe nangu ulukasa lobe ngalwakulenga ukubembuka, kупутuleko nokukuposa! Kyawamapo ukwingila ku mweo ukwabula ukuboko nangu ulukasa ukukila na maboko yabili nangu amakasa yabili nokuposwa mu mulilo wamuyayaya.

⁹ Ilinsio lyobe ngalyakulenga ukubembuka, lilobole nokuliposa! Kyawamapo ukwingila ku mweo nelinsio limo ukukila na meno yabili nokuposwa mu Gehena.

Umulumbe wampaanga iyalubile (Luka 15.3-7)

¹⁰ Moneni ukuti tamusalwilepo nangu kamo pali utu twaike. Pantu ndemyeba ukuti bamalaika batuko mumulu, Lyonse bamona ikinso kyakwa Taata mumulu.

¹¹ Pantu Umwana Wamuntu aisile mukupususya abantu baluba.

¹² Busye mwebo muletipo syani? Umuntu ngalikwata impaanga umwanda umo elo paluba imo? Busye tekuti asye isili amakumi pabula napabula kulupili nokuyafwaya iilubile?

¹³ Ndemyeba ikine kine ngaisanga, ala kuti asansamukisyia ngansi pali imo iyalubile ukukila pasili amakumi pabula napabula isisilubile.

¹⁴ Efintu na Wisinwe wamumulu tafwayapo ukuti nangu kamo pali utu twaike ukuloba.

Ukwalulula munonko

¹⁵ "Munonko ngakubifya, kabiye kuli ena uleyamweba ikilubo uko muli babili. Ngakumfwa ninsi mwawikisyanya na munonko.

¹⁶ Lelo ngakana ukukumfwa, piitako umuntu umo nangu babili, pakuti ubwafya bonse busininkisiwe kuli bakambone babili nangu batatu.

¹⁷ Kibili ngakana ukubomfwa, londolwelako abakulukuta. Ngakana ukumfwa ku lukuta lyena ninsi lekafye abe kuli webo ngo mwina fyalo nangu kasonkesya wamusonko.

Ukukanyako nokusuminisyia

¹⁸ "Ndemyeba ikinekine ukuti, kyonse kintu mwakaka pesonde na mulu kikakakwa, kibili na kyonse kintu mwakakula pesonde na mumulu kikakakulwa.

¹⁹ "Kibili ndemyeba ukuti, ngakyakuti babili pali mwebo basuminskyanya pano isonde pali kintu balomba, Taata wamumulu akabakitila.

²⁰ Pantu ponse apo babili nangu batatu bakolongana mwisina lyandi nanebo nkaba pakati kaboo."

Umulumbe wamusya wabula uluse

²¹ Petelo aisile kuli Yesu amwipusuya ukuti, "We Mfumu busye miku inga ningelela munyinane uwandufyanya? Busye miku kinelubali?"

²² Yesu amwaswike ukuti, "Nsyakwebe ukuti imiku kinelubali lelo ndelanda ukuti," "amakumi kinelubali, imiku Kinelubali,

²³ eikyo ubufumu bwa mumulu bwaba nge mfumu iyalefwaya ukwisiba abasya bakwe fintu babomfesye ulupiya lwakwe.

²⁴ Lilya yatampa ukupitulukamo, bailetela umusya umo uwamukong-wele ulupiya lwa golide amakana ikumi limo.

²⁵ Uyu musya takwete ifyakuti alipile, eikyo imfumu yapingwile ukumusitisya pamoo nomukasi wakwe, abana bakwe pamoo nafyonse fintu akwete pamulandu wakulipila imisyia.

26 Uyu musya afukeme ku mfumu nokupapata ukuti, 'Ndoleleniko, nkamilipila fyonse!'

27 Imfumu yalimumfwilile uluse, eikyo yalimwelele imisia nokumuleka aya.

28 "Lelo uyu musya lilyafye afumapo, akumanya umusya mubiye uwamukongwele ulupiya lwa golide umwanda umo. Epakumukwata pamukosi alamweba ukuti, "Ndipila fintu wankongola!"

29 Umusya mubiye afukeme nokumupapata ukuti, 'Mpelako akasita, nkakulipila!'

30 Lelo alikene ukumumfwa, asukwa amuposa mukifungo mpaka akamulipile imisia.

31 Lintu abasya babiye bamwene ifyakitike, balifulilwe kabi baile kumfumu bayayeba ifintu fyonse.

32 Eikyo imfumu yaitle umusya nokumweba ati, 'We musya umubi we!' 'Nalikwelele ulupiya wankongwele lonse pamulandu walimpapete ukuti nkwelele.

33 Busye webo tekuti umfwile umubyo uluse ngafintu nakubelele uluse.'

34 Imfumu yalifulilwe ngansi, ikyakutu yaposele uyu musya mukifungo um bali nokumukyusya mpaka akalipile ulupiya lonse."

35 "Ifi efintu Taata wa mumulu akakita kuli onse, ngatamwelela bamunonko ukufuma pansi yamitima yenu."

19

Yesu afundisya pakulekana mufyupo (Mako 10.1-12)

1 Lintu Yesu apwisisye ukulanda aya masiwi, afumine mu Galili, aile kukyaloo kya Yudeya busilya bwa mulonga wa Yodani.

2 Amabumba ayakalamba yalimukonkele kabi alibondepe kulya kwine.

3 Abafalise bamo baisile kuli Yesu bamwipusya ilipusyo lyakumwesya ukuti, "Busye kyalisuminisiwa umwaume ukuleka umukasi wakwe pamulandu uli onse?"

4 Yesu abaswike ukuti, "Busye tamwabelenga ukuti uwababumbile ukutula mukutendeka, abumbile umwaume no mwanakasi?

5 Kabi nokweba ati, 'Pamulandu waiki umwaume akasya wisi nanyina nokuyasuntinkana pamo nomukasi wakwe, kabi aba babili bakaba umibili umo.'

6 Nomba tabali babili lelo baba umo. Eikyo ikyabika Lesa pamo tapali umuntu uwingalekanya."

7 Abafalise bamwipwisye ukuti, "Busye kinsi Mose aebele umwaume ukulembela umukasi kalata yakupwilapo ikyupo nokumutamfy?"

8 Yesu abaswike ukuti, "Nipamulandu wakumalala kwa mitima Mose amisuminisyue ukuleka abakasi benu, lelo mukutendeka takyali ngefi."

9 Kabi ndemyeba ukuti, onse uwaleka umukasi wakwe, pamulandu usili wabulalelale, aupa naumbi ninsi akita ubukende."

10 Abasambi bakwe bamwebele ati, "Ifi ngefintu kyaba pamulume nomukasi wakwe, ninsi kyawamapo ukukana upa."

11 Yesu abaswike ukuti, "Tebantu bonse abengasumina aya mafundisyo, lelo kanofye kuli abo kyapelwa.

12 Pantu kwaliba imilandu iyingi iyo abaume teti bopile, bamo nipamulandu efintu bafyelwefye, bambi teti bope pamulandu abantu ebalengla ukuba muli iyi nsila, kabi nabambi basalapofye ukuti teti bope

pamulandu no bufumu bwa mumulu. Lekeni uwingapokelela ili fundisyo alipokelele."

*Yesu apaala abana banono
(Mako 10.13-16; Luka 18.15-17)*

¹³ Abantu baletele abana abanono kuli Yesu, ukuti abatambalikepo amaboko nokubapepela. Abasambi balibakalipile.

¹⁴ Lelo Yesu alandile ukuti, "Lekeni abana abanono bese kuli nebo mwibakanya, pantu ubufumu bwa mumulu bwabo."

¹⁵ Kabilo abatambalikepo amaboko nokufuma kulya.

*Umulumendo wafyuma
(Mako 10.17-31; Luka 18.18-30)*

¹⁶ Elo umuntu umo aisile kuli Yesu amwipusya ukuti, "We kafundisya, kisumansi ningakita pakukwata umweo wamuyaya?"

¹⁷ Kabilo Yesu amwebele ukuti, "Kinsi ikyo wangitila ati umusuma? Lesa fye eka emusuma. Ngolefwaya ukukwata umweo wamuyaya, ulekonka ifipope fyakwe."

¹⁸ Umulumendo aipwisye ukuti, "Busye nifisa?"

Yesu amwaswike ukuti, "Wilaipaya, wilakita ubukende, wilaiba, wilabepesya abantu ubufi,

¹⁹ ulekindika wiso na noko, kabilo uletemwa umubiyio ngasitu waitemwa."

²⁰ Umulumendo ayaswike ukuti, "Nalikonka ifipope fyonse ifi, busye nikinsi kimbi mfwile ukukita?"

²¹ Yesu amwaswike ukuti, "Ngaulefwaya ukuba uwapwililika, kabiye uyesitisya fyonse fintu wakwata! Upele ulupiya kubapina, lyena ukakwata ifyuma mumulu. Elo wise unkonke."

²² Lintu umulumendo aumfwile ifi, aile uwabulanda pantu ali nanonkesya.

²³ Kabilo Yesu aebele abasambi bakwe ukuti, "Ndemyeba ikinekine ukuti, kintu kyasupa uwafyuma ukwingila mu bufumu bwa mumulu.

²⁴ Nakabilo ndemyeba ukuti, kyayangukapo Ingamilia ukupula mu linso lyansindano ukukila uwafyuma ukwingila mu bufumu bwakwa Lesa."

²⁵ Lintu abasambi baumfwile aya masiwi balipapile umupwilapo. Baip-wisye ukuti, "Nomba busye kansi ninani uwingapusuka?"

²⁶ Lelo Yesu abalolesye nokubasuka ukuti, "Ifi fintu fyayafya kubantu, lelo kuli Lesa fyonse fyalyanguka."

²⁷ Petelo ayaswike ukuti, "Mona fwebo twalisya ifintu fyonse nokukukonka. Busye nifinsi tukakwatamo?"

²⁸ Yesu abebele ukuti, "Ndemyeba ikine kine ukuti, lintu Umwana Wamuntu akekala pakipuna kya bufumu ikyabukata Mukyalo kipyta, namwebasambi bandi ikumi limo na babili, mukekala pafipuna fya bufumu mukupingula imikowa ikumi limo nasibili isya bera Israeli.

²⁹ Kabilo naonse uwasya amayanda, bamunyina, bankasi yakwe, bawisi, banyina, abana nangu amabala pamulandu wandi, akapelelwapo pali fyonse imiku umwanda umo kabilo akakwata nomweo wamuyaya.

³⁰ Lelo abengi abantansi bakaba abanuma, kabilo na bengi abanuma bakaba abantansi.

1 “Pantu ubufumu bwa mumulu bwaba ngo mwine wa njanda, uwafumine kumakya ukuyafwaya abakubomba mwibala lya myangasi.

2 Panuma baumfwana nabankito ukubalipila ulupiya lwa busiku bumo, abatumine mwibala mukubomba.

3 Munsita ya naini koloko ya luchelo amwene na bambi nabeminina ukwabula ifyakukita pa kisankano,

4 nabo abebele ukuti, ‘Kabiyen'i mubombe mwibala lya myangasi, ndemilipila ulupiya ulwalinga.’

5 Efintu baile. Aya nakabili mu kasuba pakati elo namunsita ya fifitini koloko, ayakita fimofine.

6 Kilya akasuba kaba mukuwa muma seventini koloko asanga nabambi beminiefye. Abepusya ukuti, “Kinsi mwiminininine pano akasuba konse ukwabula ukulakita nangu kimo?”

7 Nabo bamwaswike ukuti, ‘Nikyo tapali abakutwingisa inkito.’ Elo abeba ukuti, ‘Nemwe bene kabiyen'i kabombeni mwibala lya myangasi.’

8 “Lantu ikyungulo kyafikile, umwine we bala aebele kangalila wa bankito ukuti, ‘Ita abankito bonse ubalipe amalipilo yabo, wambile ku bakingila inuma, ulekelesye kuba kingila intansi.’

9 Lantu Abankito abayambile ukubomba pansita ya seventini koloko baisile, bafolele amalipilo yabusiku bumo.

10 Lantu abaingile intansi baisile, baletontonkanya ati balefolapo amalipilo ayakulu pali bonse. Lelo bonse bafolele lumolwine.

11 Lantu bapokele bayambile ukuilisyanya ku mwine we bala.

12 Bamwebele ukuti, ‘Aba abanuma bakibombakofye insita imo. Lelo mwabalipa fimofine nafintu mwakitulipa. Twakilabomba mukasuba ninsi nakabala!’

13 Umwine we bala ayaswikepo umo pabankito ukuti, ‘Mune nsikufyengele, milipile amalipilo yabusiku bumo yantu twakyumfwana.

14 Piita amalipilo yobe uleya! Nemwine nedefwaya ukulipila uyu uwanuma ngafintu nkulipile.

15 Busye nsyakwata insambu sya kukita fintu ndimukufwaya no lupiya lwandi? Nangu waumfwa akalumwa pantu ndi wabupe?”

16 “Eikyo abanuma bakaba abantasi, kibili na bantansi bakaba abanuma.”

Yesu alanda pamfwa yakwe ulwa miku itatu

(Mako 10.32-34; Luka 18.31-34)

17 Kibili lantu Yesu aleya ku Yerusalem, apiitile abasambi bakwe ikumi limo na bibili pambali kibili munsila abebele ukuti,

18 “Moneni, tulimukuya ku Yerusalem uko Umwana Wamuntu alaya pelwa kuli basimapepo bakindami naba kafundisya bamafunde. Balaya mupingwila ukufwa.

19 Kibili bakamupela kubenafyalo abakamupunika, ukumulopola, kibili nokumutanika, lelo panuma yansiku sitatu akabusawa ku bafwa.”

Nyina alombela abaana bakwe ubukalamba

(Mako 10.35-45)

20 Elo nyina wa bana bakwa Zebede aisile kuli Yesu nabana bakwe, nokufukama, amulomba ifintu fimo.

21 Kibili Yesu amwipwisye ukuti, “Nikinsi ulefwaya?”

Nao alandile ukuti, “Suminisya abana bandi, mubufumu bobo umo akekale kukulyo kobe naumbi akekale kukuso kobe.”

²² Yesu ayaswike ukuti, "Tamwisibe kintu mulelomba. Busye kuti mwanwa ulukombo luntu nalanwa?"

Nabo bamwaswike ukuti, "Ee kuti twanwa."

²³ Yesu abebele ukuti, "Ee mukanwa mulukombo lwandi, lelo ukwikala kukulyo kwandi nangu kukuso tenebo uwakusuminisya. Isi nkende syabo Taata apekanisisya."

²⁴ Lintu abasambi ukumi limo abasyala baumfwile aya masiwi, bali-fulilwe bamunyina babili.

²⁵ Yesu abetile pamo bonse nokubeba ukuti, "Mwalisiba ukuti bansyam-fumu ba benafyaloo balikwata amaka pa bufumu bwabo, nentungulusi syabo silabomfyaa amaka syakwata pabantu.

²⁶ Lelo mwebo mwilakita nga bena. Umo pali mwebo ngalefwaya ukuba umukalamba, abe umubomfi wababiye,

²⁷ nakabili umo ngalefwaya ukuba uwantansi, abe umusya wenu

²⁸ kwati Mwana Wamuntu taisile ukuti bamupwingile lelo aisile mukupunga nokupela umweo wakwe mukulubula abantu abengi."

*Yesu aundapa impofu sibili
(Mako 10.46-52; Luka 18.35-43)*

²⁹ Lintu balefuma ku Yeriko, ibumba ilikalamba lyalibakonkele.

³⁰ Abantu babili abaali impofu abaali nabekala mumbali yamusebo lintu baumfwile ukuti Yesu alepita babilisyé ukuti, "We Mfumu Mwana Davidi! Tubelete uluse!"

³¹ Ibumba lyalibakalipile nokubeba ukuti bekale tondolo. Lelo bena bakonkenyepofye ukubilisyé ukuti, "We Mfumu, Mwana Davidi tulangu-lukileko!"

³² Yesu aiminine nokubeta alabepusya ukuti, "Kinsi mulimukufwaya imikitile?"

³³ Nabo bamwaswike ukuti, "We Mfumu, tulimukufwaya ukumona!"

³⁴ Yesu abomfwilile inkumbu kabili abakwete mumenso, palyapene balimwene nokwamba ukumukonka.

21

*Yesu aingila mu Yesrusalemu nomukinsi
(Mako 11.1-11; Luka 19.28-40; Yohani 12.12-19)*

¹ Kabili lintu Yesu na basambi bakwe bapalamine ku Yesrusalemu, baisile ku Betifage pa lupili lwa Miolife. Yesu atumine abasambi babili,

² nokubeba ukuti, "Kabiyenii mumusi uli kuntansi, kabili mwalaya sanga impunda naikakilwa pamo nakana, mukakule mundetele.

³ Ngakyakuti umo amipusya, mumwebe ukuti, 'Imfumu ilefifwaya' Nao alemileka mupiite impunda."

⁴ Ifi fyakitike mukufilikisa fintu kasesema alandile ukuti,

⁵ "Eba umwana umwanakasi Ziyoni ukuti,

'Mona Imfumu yobe ileisa kuli webo!

Naifuka kabili ininie pali punda. Napa kana ka punda.' "

⁶ Abasambi baile nokuyakita fintu Yesu abebele ukukita.

⁷ Baletele impunda nakana, bayansikepo insalu panuma ya mpunda, elo Yesu apilukilapo.

⁸ Ibumba lyabantu abengi lyaambile ukwansika insalu syabo mumusebo, bambi nabo baleteta imisambo yafimuti baleyansika mumusebo.

⁹ Ibumba ilyali kuntansi yakwa Yesu nelyali kunuma lyayambile ukubilisyia ukuti, "Lumbanyeni Mwana Davidi! Alipalwa uwisila mwisina lya Mfumu!"

¹⁰ Lintu Yesu aingile mu Yerusalem, mu musumba monse mwakabile nasee! Ku fyongo kabili baleipusyafye ukuti, "Nani uyu?"

¹¹ Abantu mwibumba bayaswike ukuti, "Ni Yesu kasesema uwafuma ku Nazareti mu Galili."

Yesu atamfyia abamakwebo mwi Tempole

(*Mako 11.15-19; Luka 19.45-48; Yohani 2.13-22*)

¹² Yesu aingile mumusolo wetempele nokwamba ukutamfyia abantu bonse abalesitisya nokusita. Apilibwile amatebulo yabalekabusya ulupiya nefipuna fyabalesitisya inkunda.

¹³ Abebele ukuti, "Kyalilembwa ukuti, 'injanda yandi iketwa injanda yamapepo.' Lelo mwebo mwaipanga umwakufisama abano!"

¹⁴ Impofu nabalema baisile kuli Yesu mwitempele, nao alibondepe.

¹⁵ Lelo lintu basimapepo mukalamba naba kafundisyia Bamatunde yakwa Mose bamwene ifisungusyo nokumfwa abaana balebilisyia ukuti, "Hosanna kuli Mwana Davidi!" Balifulilwe.

¹⁶ Baipwisye Yesu ukuti, "Busye naumfwa fintu aba bana balelanda?"

Yesu nao abaswike ukuti, "Ee ningumfwa, busye tamwabelenga ilembo ililanda ukuti, 'Kutunwa twabana naku bakwibebe kwafumine amalumbo?'"

¹⁷ Kibili alibasile, afumine mu musumba aya ku Betani, uko ashikilwe ubusiku bonse.

Yesu atipa umukunyu

(*Mako 11.12-14,20-24*)

¹⁸ Kumakya, lintu Yesu alebwelulukila ku musumba wa Yerusalem, ali naumfwa insala.

¹⁹ Amwene ikimuti kya mukunyu mumbali yamusebo, lelo lintu aileko ailesanga takuli nangu kimo kwalifye amabula. Eikyo alandile kukimuti ukuti, "Tawakatwalepo ifisabo nakabili!" Palyapene ikimuti kya mukunyu kyauma.

²⁰ Lintu abasambi bamwene ifi, balipapile ngansi. Baipwisye ukuti, "Busye umukunyu wauma syani apapene?"

²¹ Yesu abaswike ukuti, "Ndemyeba ukuti, nganamukwata ikitetekelo kabilo tamutwiske, teifi fyeka nakita mwingsakita lelo, kuti mwaeba nolu lupili ukuti, 'Ima, ipose muli bemb'a nalo lukaiposa.'

²² Nganamusumina, mukapokelela kyonse kintu mwalomba mwipepo."

Ilipusyo lya insambu syakwa Yesu

(*Mako 11.27-33; Luka 20.1-8*)

²³ Yesu aile mumusolo we Tempele kabilo lilya alefundisyia, abakalamba na basimapepo mukalamba baisile mwipusya ukuti, "Ninsambensi wakwata isyakukita ifi fintu? Ninani wakupela isi nsambu?"

²⁴ Yesu abaswike ukuti, "Nalamipusya ilipusyo limo, kabilo ngamwanga-suka nalamyeba insambu nakwata isyakukita ifi fintu.

²⁵ Busye nipi insambu syakwa Yohani isyakubatisya syafumine, busye nikuli Lesa nangu nikulu bantu?"

Bantampile ukwambaula abene beka ukuti, "Busye twalalanda syani? Ngatwayasuka ati, 'Nikuli Lesa,' aletweba ukuti, 'Nikinsi tamwasuminine Yohani?'

²⁶ Lelo ngatwalanda ukuti, 'Niku bantu,' Tuletina fintu abantu bengakita, pantu bonse balisininwe ukuti, Yohani ali ni kasesema."

²⁷ Eikyo bayaswike Yesu ukuti, "Tatwisibe."

Nao abebeba ukuti, "Nandibo nsyamyebe kuntu mfumya insambu syakukita ifi fintu."

Umulumbe wa bana abaume bibili

²⁸ "Busye muletipo syani? Kwali umuntu uwakwete abana abaume bibili, aile kuwantansi amweba ukuti, 'Wemwana kabiye uleyabomba mwibala lya myangasi lelo.'

²⁹ Alandile ukuti nsileyako lelo panuma yansita apilibula imilangwe aya bomba.

³⁰ Elo Wisi aile kibili ku mwana umbi ayamweba fimofine. Ayaswike ukutu nalaya lelo taileko.

³¹ Busye mwanansi wakitile ifyalefwaya wisi?"

Bayaswike ukuti, "Uwantansi."

Eikyo ndemyeba ikinekine ukuti, bakasonkesya bamusonko naba kilende balemitangilila ukwingila mubufumu bwamumulu.

³² Pantu Yohani Kabatisya aisile kuli mwebo mukumilanga insila yabulungami, tamwamusumine. Lelo bakasonkesya wamusonko nabakilende balimusumine. Kibili nalintu mwamwene ifi tamwalapile nokusumina.

Umulumbe wa balesonkela mwibala lya myangasi

(Mako 12.1-12; Luka 20.9-19)

³³ Kutikeni kumulumbe naumbi, kwali umwine wakisonso uwalimine ibala lya myangasi, akulilileko ulubango, aimbile umwakufinina imyangasi kibili aakula no lupungu. Elo asonkesya ibala kubalimi nokuya mu kyalo kimbi.

³⁴ Lintu insita yakusombola yafikile, atumineko abasya bakwe ukuyapita ifisabo fyakwe.

³⁵ Lelo abalesonkelamo bakwete aba abasya bakwe, baumapo umo, umbi bamwipaya kibili naumbi bamutoba amabwe.

³⁶ Kibili atumineko abasya nabambi abengi ukukila abantansi, nakibili nabo babakitile fimofine.

³⁷ Mukulekelesya umwine webala atumineko umwana wakwe, ukuti, 'ikinekine yuu bakaya mukindika.'

³⁸ Lelo lintu abalesonkela bamwene umwana balandile ukuti, 'Iyi nimpyani, iseni tumwipaye! Nebala likaba yesu.'

³⁹ Eikyo bamukwete, bamuposa kunse yebala nokumwipaya.

⁴⁰ Yesu abepwisye ukuti, "Busye ilyo umwine webala akesa, nikinsi akesa kita kuli aba bantu?"

⁴¹ Bayaswike ukuti, "Akesaipaya abo bantu ababifi, nokusonkesya ibala kubantu bambi abakalamupa ikyakaniko kyakwe pansita yabusombosi."

⁴² Yesu abebele ukuti, "Busye tamwabelenga fintu ikyalembwa kilanda? 'Ilwbe lintu bakakula basulile ngelyabula ubuyo

elyaisileba ilikankala pali yonse.

Uku kubomba kwakwa Lesa,

kibili kipapusyo mu menso yesu!"

⁴³ Ndemyeba ukuti ubufumu bwakwa Lesa bukapokololwa kuli mwebo nokupelwa ku bantu abatwala ifisabo.

⁴⁴ "Umuntu onse untu ili libwe lyaponena akaputaulwa mutupimfyia naonse uwaponena pali ili libwe akashonaulwa."

45 Lintu basimapepo bakindami naba Falise baumfwile imilumbe yakwa Yesu balisibe ukuti ebantu alelandapo,

46 eikyo bafwaile insila yakumwikatilamo. Lelo baletina ibumba, ilyasumine Yesu ukuti nikasesema.

22

Umulumbe wa matebeto ya bwinga (Luka 14.15-24)

1 Nakabili Yesu abebele mu milumbe ukuti,

2 "Ubufumu bwa mumulu kuti bwapasyanisiwa ku mfumu iyapekanisiye umwana wakwe umwaume amatebeto ya bwinga.

3 Yatumineko abasya bakwe ukuyaeba abalalikwe ukwisa kumatebeto, lelo balikene ukwisa.

4 Elo yatuma abasya nabambi ukuti, 'Kebeni abalalikwe ukuti, nimekanya amatebeto nefintu fyonsenafipekanisiwa. Iseni kumatebeto ya bwinga!'

5 Lelo tabaposeleko amano bayangilwefye imilimo yabo, umo aya kwibala lyakwe, umbi aile kuntu alebomba amakwebo,

6 elo bambi bakwete abasya, baboma nokubepaya.

7 Imfumu yalifulilwe. Yatumineko abasilika ukuyaipaya abo bantalamisoka nokokya umusumba wabo.

8 Elo yaeba abasya ukuti, 'Ubwinga nabupekanisiwa, lelo abantu abalalikwe balikene ukwisa.

9 Eikyo kabiyeni mumisebo muleyalalika abantu bonse bantu mulesanga kumatebeto.'

10 Abasya baile mumisebo nokuya kolonganika bonse abantu basangilemo, ababi na basuma. Kibili munjanda mwaiswile abantu.

11 Lelo lintu imfumu yaisile mukomona abalalikwe, yasangilemo umo ususyafwele insalu syapa bwinga.

12 Yamwipwisye ukuti, "Kibusu, busye wakingila syani muno ukwabula ukufwala insalu syapa bwinga?" Lelo takwete ifyakulanda.

13 "Elo imfumu yaebele abasya ukuti, 'Mukakeni amaboko namolu mumupose panse mumfimfi. Umukuba ukulila nokusumanya ameno.'"

14 "Abalalikwa bengi lelo abasalwa banono."

Ukulipila umusonko (Mako 12.13-17; Luka 20.20-26)

15 Abafalise bakolongene balaumfwana fintu bengakofya Yesu.

16 Batumine abasambi babo naba kwa Herodi ukuyalande ukuti, "Wekafundisya twalisiba ukuti fintu ulanda fyakisinka, ufundisya ikine pabufwayo bwakwa Lesa pabantu, kibili tautiina muntu nangu umo, pantu tawaba nakapatulula.

17 Twebe, busye webo uletipo syani? Busye tufwile ukulipila umusonko kuli Kesalo nangu iyoo?"

18 Lelo apo Yesu alisibe imilangwe yabo iyabubifi abebele ukuti, "Imwe babumbimunda, kinsi mulengesesywa."

19 Ndangeni ulupiya lwakulipa umusonko!"

Bamuletele ulupiya lwamuseke,

20 elo abepusya ukuti, "Busye iki kinsa nesina fyakwa nani?"

21 Bayaswiye ukuti, "Fyakwa Kesalo."

Elo Yesu abeba ukuti, "Peleni kuli Kesalo ifyakwa Kesalo, kibili peleni kuli Lesa ifyakwa Lesa."

²² Balipapile lintu baumfwile aya masiwi, kibili bamusile nokuya.

Ilipusyo lyapa kubuka kubafwa
(*Mako 12.18-27; Luka 20.27-40*)

²³ Bulya bwine busiku, Abasaduki abasumine ukuti takwakabe ukubuka kubafwa baisile ipusya Yesu ukuti,

²⁴ "Wekafundisya, Mose atwebele ukuti umwaume uwaupa ngafwa ukwabula ukufyalapo abana, munina afwile aupa mukamfwilwa pakuti afyalileko munina abana.

²⁵ Nomba kwaliko bamunina kinelubali abaleikala kuno. Uwantansi alyupile, kibili afwile ukwabula ukufyalapo abana eikyo umukasi wakwe asyele namunina.

²⁶ Ikintu kimokine kyakitike kuwabubili, nakuwabutatu namukulekesyesi kuli bonse kinelubali.

²⁷ Napampela umwanakasi nao afwa.

²⁸ Nomba pakubuka kwabafwa, busye akaba mukasi wakwani apo bonse bamunina kinelubali balimupilepo?"

²⁹ Yesu abaswike ukuti, "Mwaliluba! Pantu tamwaisiba ifyo amalembo yafundisya kibili tamwaisiba namaka yakwa Lesa.

³⁰ Pakubuka kwabafwa, abantu tabakaleupa nangu ukupwa lelo bakaba nga bamalaika mumulu.

³¹ Lelo pamulandu wakubuka kwabafwa, busye tamwabelenga fintu Lesa amyebele ukuti,

³² 'Ninebo Lesa wakwa Abulahamu, Isaaki na Yakobo.' Ni Lesa wabamweo te Lesa wabafwa."

³³ Ibumba lyalipapile pakumfwa aya mafundisyo.

Ikipope ikikalambapo
(*Mako 12.28-34; Luka 10.25-28*)

³⁴ Lintu Abafalise baumfwile ukuti Yesu atalalika Abasaduki, balikolongene pamo.

³⁵ Umo pali bena uwali ni kafundisya wamafunde aesesye Yesu mulipusyo ukuti,

³⁶ "Wekafundisya, busye kipopensi ikikalamba mu Mafunde?"

³⁷ Yesu amwaswike ukuti, " 'Uletemwa Imfumu Lesa obe, nomutima obe onse, nomweo obe onse kibili namano yobe yonse.'

³⁸ Iki ekipope kyantansi kibili ikikalamba.

³⁹ Ikyabubili niki, 'Uletemwa umubiyio ngafintu waitemwa.'

⁴⁰ Amafunde yonse naba kasesema bashinta pali ifi fipope fibili."

Ilipusyo lyapali Mesiya
(*Mako 12.35-37; Luka 20.41-44*)

⁴¹ Ilyo Abafalise bakili nabakolongan Yesu abepwisye ukuti,

⁴² "Busye mwebo mutontonkanyapo syani pali Mesiya? Busye mulanda ukuti nimwana nani?"

Bayaswike ukuti, "Nimwana Davidi."

⁴³ Yesu abepwisye ukuti, "Busye nikinsi Davidi, uwaletungululwa no Mupasi amwitile ukuti 'Imfumu'? Pantu Davidi alandile ukuti,

⁴⁴ 'Imfumu yalandile ku Mfumu yandi ukuti,
ikala kukulyo kwandi

mpaka inkabike abalwani bobe pansi yamakasa yobe.'
45 Davidi ngamwitile ukuti 'Imfumu,' Busye kuti aba syani umwana wakwa Davidi?"

46 Tapaali uwamwaswike, kibili ukutula pali bulya busiku, tapali uwaip-wisyepo Yesu amepusyo nayambi.

23

Kengeleni ku Bafalise na kuli Bakafundisya bamafunde (Mako 12.38-39; Luka 11.43,46; 20.45-46)

1 Elo Yesu aeba amabumba na basambi bakwe ukuti,

2 "Abafalise na bakafundisya bamafunde bekala mukipuna kyakwa Mose.

3 Eikyo muleumfwila nokukonka fyonse fintu balemyeba, lelo mwilakita fintu bakita, pantu bena tabakita fintu basimikila.

4 Bakaka ifipe ifyafinisa, babika pafipeya fyabantu, ifyo bena tabekatako nomunwe wabo pakwimya.

5 Ifintu fyonse fintu bakita, bakitila ukubamona kubantu. Bakaka utupande utwamalembo bafwala pampumi na kumaboko utwalepa. Elo namasenkebele yansalu syabo balayalefy!

6 Batemwa inkende syamukinsi pamalila elo nefipuna ifyakindamisyapo mu masinagogi,

7 kabilo batemwa ukulabaposya nomukinsi pafisankano, nokubeta ukuti 'Bakafundisya'.

8 Lelo mwebo mwilaitwa ukuti, 'Kafundisya' pantu mwakwatafy'e Kafundisya umo, kibili muli bamunina.

9 Kibili mwilaita uuli onse pano isonde ukuti, 'Taata', pantu mwakwatafy'e Wisinwe umo uwamumulu.

10 Mwilaitwa ukuti, 'kafundisya' pantu mwakwatafy'e kafundisya umo uli ni Klisu.

11 Umukalamba pali mwebo, awfile aba umubomfi wenu bonse.

12 Pantu bonse abaisansabika bakakefesiwa, nabonse abaikefy'a bakasansamikwa.

Yesu alapisya Abafalise na bakafundisya bamafunde (Mako 12.40; Luka 11.39-52; 20.47)

13 "Akalandi kuli imwe bakafundisya bamafunde namwe Bafalise, mwebabumbimunda! Mwalisalila abantu pakuti beingila mu bufumu bwa mumulu. Mwe bene tamwingilamo elo mwalesya nabambi abalefwaya ukwingilamo.

14 Akalandi kuli imwe, bakafundisya bamafunde namwe Bafalise! Mwebabumbimunda! Muliila bamukamfwila ifyuma fyabo, kibili mwanasnyepo umo abe umusambi wenu. Kibili ngamwafikilisya mulenga umuntu abipisyapo ukukila pakwamba, awaminafye ukuya kumbo ngamwebo!

15 "Akalandi kuli imwe Bakafundisya bamafunde namwe Bafalise! Mweba bumbimunda! Mwenda ba bemba nemilundo pakutifye munasnyepo umo abe umusambi wenu. Kibili ngamwafikilisya mulenga umuntu abipisyapo ukukila pakwamba, awaminafye ukuya kumbo ngamwebo!

16 "Akalandi kuli mwentungulusi impofu mwe! Mulanda ukuti umuntu ngalapa pe Tempele ninsi tapali mulandu. Lelo ngalapa pali golide wamwi Tempele ninsi afwile afikilisya umulapo wakwe.

¹⁷ Mwempofu isipumbu mwe! Kinsi kyakindamapo pali golide ne Tempele ililenga golide ukuba iyamusilo?

¹⁸ Kibili mulanda ukuti, umuntu ngalapa pa kipailo temulandu, lelo umuntu ngalapa pafyabupe fili pakipailo ninsi mulandu.

¹⁹ Mwempofu mwe! Ikyakindamapo kinsi pabupe nangu ikipailo ikilengela ikyabupe ukuba ikyamusilo?

²⁰ Eikyo onse uwalapa pakipailo ninsi alapa napali fyonse ifili pakipailo,

²¹ Kibili naonse uwalapa pe Tempele ninsi alapa pali lyena napali Lesa uwikalamo,

²² kibili naonse uwalapa pamyulu, ninsi alapa pakipuna kyakwa Lesa napa waikalapo.

²³ "Akalandu kuli imwe bakafundisya Bamafundu namwe Bafalise! Mwe babumbimunda mwe! Mulapela Lesa ikyekumi napamisalufye iyakuwamya ifyakulya ifili nga Minti, dilli nakumuni, lelo mwalisula ukukonka amafundisyo ayakankala mu Mafunde yakwa Mose ayali ngo, umulinganya, uluse nekisinka. Ifi efintu mufwile ukulakita ukwabula ukusula ayantansi.

²⁴ Mwentungulusi impofu mwe! Mususa akasisi akanono, lelo mumina ingamilia!

²⁵ "Akalandu kuli imwe bakafundisya Bamafundu namwe Bafalise! Mwe babumbimunda mwe! Musamfyia inkombo nensani kunse, elo ninsi mukati mwaisulafye ubulili no bukaksi.

²⁶ Mwe Bafalise impofu mwe! Mbale samfyeni mukati kalukombo, kibili nakanse nako kulewama!

²⁷ "Akalandu kuli imwe bakafundisya Bamafundu namwe Bafalise! Mweba bumbimunda mwe! Mwaba nge manda bashingulako ulupemba, kunse simoneka isiyayemba lelo mukati mwaisula amafupa yabafwa, nafimbi fyonse ifyakowela.

²⁸ Munsila imoine, kunse mumoneka abasuma kubantu bonse, lelo mukati kenu mwaisulamo bubumbimunda kibili ne membu.

Yesu asobela ukukandwa kwabo

(Luka 11.47-51)

²⁹ "Akalandu kuli imwe bakafundisya Bamafundu namwe Bafalise! Mweba bumbimunda mwe! Mukulilila imanda syaba kasesema, nokuwaminisyu imanda syabalungami,

³⁰ kibili mulanda ukuti, twingaba nifwebo ngatatakitle fintu ifikolwe fyesu fyakitile mukusumya umulopa waba kasesema.

³¹ Kansi mwaliisinina ukuti muli lupwa lwa fipondo fyaipeye bakasesema!

³² Kansi pitilisyeni, pwisyeni fintu ifikolwe fyenu fyatampile!

³³ Imwe mwensoka! Imwe mwebana bansoka! Kuti mwafyuka syani ukuya ku Gehena?

³⁴ Eikyo nalamitumina bakasesema, abaume bamano naba kafundisya, bamo mukabepaya, bambi mukabatanika, kibili bambi mukabalopola musinagogi nokubatamfyia mu musumba nomusumba.

³⁵ Kansi pali mwebo pakaponena umulopa onse uwabalungami, uwasumine pesonde ukufuma pamulopa wakaele uwakwa Abeli, ukufika pamulopa wakwa Sakariya mwana Belekiya, untu mwaipaile pakati ke Tempele nekipailo.

³⁶ Ndemyeba ikinekine ukuti, fyonse ifi fikaponena pabantu baino nkulo!

*Ikitemwiko kyakwa Yesu pali Yerusalemu
(Luka 13.34-35)*

³⁷ "We Yerusalemu, we Yerusalemu! Wipaya bakasesema, nokwipaya kumabwe intumi sintu Lesa aakutumine! Miku inga nalefwaya ukufukatila abana bobe ngafintu inkoko ifukatila utwana mumapindo, lelo tawansum-inisy!

³⁸ Mona injanda yobe ikaba umwabula nangu kimo.

³⁹ Pantu ndekweba ukuti, tawakatale mbonapo nakabili mpaka ukalande ukuti, 'Alipalwa uwisila mwisina lya Mfumu.'

24

*Yesu alanda pakonaulwa kwe Tempel
(Mako 13.1-2; Luka 21.5-6)*

¹ Panuma yaifyo Yesu afumine Mwittempele alaya, abasambi bakwe baisile kuli ena nokwisa musontelela ifikulwa fye tempele.

² Yesu abepwisye ukuti, "Busye namumona ifintu fyonge ifi? Ndemyeba ukuti tapakasyale ilibwe nangu limo palibiye, yonse yakabongoloka."

*Amafya nokupakaswa
(Mako 13.3-13; Luka 21.7-19)*

³ Lintu Yesu ali naikala pa Lupili lwa Miolife, abasambi baisile kuli ena pambali. Bamwipwisye ukuti, "Busye nilisa ifi fyonge fikakitika, kabililangilionsi ikyakwisa kobe nekyampela yesonde."

⁴ Yesu abaswike ukuti, "Kengeleni, pakuti umuntu nangu umo emibepe.

⁵ Pantu abantu abengi bakesila mwisina lyandi, bakalaitunga ukuti 'Ninebo Klistu!' Kabililangilionsi ikyakwisa kobe nekyampela yesonde."

⁶ Mukomfwa inkondo nefintinya fyankondo, lelo mwikatiina. Fyonge ifi fintu fikakitika, lelo impela ninsi tailafika.

⁷ Ifyalo fikemina ifyalo fibiye, ubufumu bukemina ubufumu bubiye. Konse kukaba ifipowe na bamakumba mukende isyalekana lekana.

⁸ Lelo ifi fikabafye ngobukali bwakwambilapo ubwapakupapa.

⁹ "Bakamipakasa no kumipaya, kabililangilionsi ikyakwisa kobe nekyampela yesonde."

¹⁰ Abantu abengi bakalufya ikitetekelo pali iyi nsita, bakalafutuka nokupata ababiye.

¹¹ Elo bakasesema babufi abengi bakamoneka nokubepa abantu abengi.

¹² Pamulandu wakufula kwabubifi, ukutemwa kukafubalila.

¹³ Lelo abakasipikisya ukufika kumpela bakapusuka.

¹⁴ Kabililangilionsi ikyakwisa kobe nekyampela yesonde lyonse ngobunte kufyaloye fyonge, elo impela ikafika.

*Amakyusi yakafula
(Mako 13.14-23; Luka 21.20-24)*

¹⁵ "Kansi lintu mukamona umupamba wabonausi untu kasesema Daniele alaandilepo nawiminina umwamusilo." (Onse uulebelenga eluke, muntu ifi fyalola!)

¹⁶ Abakaba mu Yudeya bakabutukila mumpili.

¹⁷ Uukuba pamutenge wa ḥanda ekekila ukuyapiita ifili fyonge mu ḥanda.

¹⁸ Uukuba mwibala, ekabwelelamo mukupiita insalu syakwe.

¹⁹ Akalanda muli silya nsiku kuli banamayo abakaba pabukulu na kubakalaonsya!

²⁰ Mulepepa ukuti fikakitika munsita yampepo, nangu pabusiku bwe Sabata!

²¹ Pantu kukaba amakyusi yakipesya mano ayasyatala bako ukufuma kuntendekelo yesonde ukufika nandakai kibili ayasyakatale bako nakabili.

²² Isyo nsiku singakana ukwipifiwa ngatapali uwapuswike, lelo pamulandu wa basalwa bakwe isyo nsiku syalipifiwa.

²³ Pali iyo nsita umuntu ngalandu ukuti, "Mona Klistu uyu pano nangu uyo apo" Mwikasumina.

²⁴ Pantu ba krisitu babufi na bakasesema babufi bakamonekela, bakalakita ifisibili ifikalamba nefisungusyo pakuti bakabepe na basalwa ngafingakitika.

²⁵ Moneni! Namyebela limo ifi lintu insita tailaisa.

²⁶ "Kansi, abantu ngabamyeba ukuti, 'Uyo ali mukiswebbebe, mwikayako!' Kibili ngabalanda ukuti, 'Uyu ali munjanda!' Mwikasumina.

²⁷ Pantu Umwana Wamuntu akesa ngakalumba akabyasya mumulu monse ukufuma kukabanga ukufika ku masamba.

²⁸ "Amakubi yakolonganana konse ukuli ikitumbi.

Ukwisa kwa Mwana Wamuntu

(Mako 13.24-27; Luka 21.25-28)

²⁹ "Panumafye yamakyusi yaisyo nsiku, akasuba kakafiita no mwensi tawakabale, intanda sikapona mumulu, kibili nefyaikala mumulu fikasunkansiwa.

³⁰ Elo kumamoneka ikisibili kya Mwana Wamuntu mumulu. Elo abantu bapano isonde bonse bakalosya, lintu bakamona Umwana Wamuntu aleisa pamakumbi yamumulu, namaka nobukata ubukalamba.

³¹ Lintu impenga ilikalamba likalila, akatuma bamalaika bakwe ukuyakolonganika abasalwa bakwe ukufuma mutupinda tune utwapesonde, ukufuma kumpela iyamulu ukufika kumpela.

Isambililo lyapakimuti kyamukunyu

(Mako 13.28-31; Luka 21.29-33)

³² "Nomba sambilileni ku kimuti kya mukunyu. Imisambo ngayaamba ukufumya ubuluba mulesiba ukuti amainsa yapalama.

³³ Nalintu mukamona ifintu fyonse ifi, mukesibe ukuti insita yapalama, ilifye pamwinsi.

³⁴ Ndemyeba ikikine ukuti, iyi nkulo tayakapite ninsi ifintu fyonse ifi fyakitika.

³⁵ Umulu nesonde fikapita lelo amasiwi yandi tayakapite.

Takwaba uwaisiba ubusiku nakasita

(Mako 13.32-37; Luka 17.26-30)

³⁶ "Lelo tapaba uwaisiba ubusiku nakasita, bamalaika ba mumulu tabaisiba kibili Nomwana Wamuntu wine taisiba, Tatafy eka ewaisiba.

³⁷ Ngafintu kyali munsiku yakwa Noa, efintu kikaba nalintu Umwana Wamuntu akesa.

³⁸ Lintu ilyeshi talilaisa, abantu balelya nokunwa, baleupa nokupwa, mpaka pa busiku buntu Noa aingile mu bwato.

³⁹ Tabaisibe nangu fimo ifyalekitika mpaka ilyeshi lyaisa balofya bonse. Efintu kikaba napakwisa kwa Mwana wa Muntu.

⁴⁰ Abaume babili bakaba mwibala, umo akapiitwa umubiye akasyala.

⁴¹ Abanakasi babili bakalapela pelibwe, umo akapiitwa umbi akasyala.

⁴² Eikyo kengeleni, pantu tamwisibe ubusiku Imfumu yenu ikesa.

⁴³ Lelo ilukeni ifi, umwine wa njanda ngaisiba insita intu umujo aleisilapo, teti alale kuti alalolelafye kibili tekuti aleke umujo amwingilile.

⁴⁴ Eikyo namwebo beni abaipekanya lyonse, pantu Umwana Wamuntu akesa pakasita kantu musyenekele.

*Umusya wakisinka nomusya wabula kisinka
(Luka 12.41-48)*

⁴⁵ "Busye umusya wakisinka kibili uwamano ninani? Nyuyo, sikulu wakwe abika ukwanganila ababomfi babiye, ukulabapela ifyakulya pansita iyayana.

⁴⁶ Kikamuwamina uyo umubomfi, ilyo sikulu wakwe abwela ngamusanga alekita ifyofine.

⁴⁷ Ndemyeba ikinekine ukuti, sikulu wakwe akabika uyu mubomfi bukanganila pamfintu fyakwe fyonse.

⁴⁸ Lelo umusya ngamubifi, kuti aayeba umwine mumutima wakwe ukuti sikulu wakwe takabwele bwangu,

⁴⁹ kibili nokwamba ukuma ababomfi babiye, nokwamba ukulya nokunwina pamo nabakyakolwa.

⁵⁰ Sikulu wauyo musya akabweluluka ubusiku ubo umubomfi tenekeli kabilinapansita intu tesibe.

⁵¹ Akaputaula umubomfi mutupimfy, kibili akamuposa kunkende akayakyulila pamo nababumbimunda. Ukukaba ukulila nokusumanya ameno.

25

Umulumbe wa banakisungu ikumi limo

¹ "Pali ilya nsita Ubufumu bwa mumulu bukaba ngabanakisungu ikumi limo, abapiitile utulampi twabo ukuya mukukumanya sibwinga.

² Basano pali aba bali nimpelwamano, kibili nabasano bali bamano.

³ Impelwamano syapiitile utulampi ukwabula ukupiita amafuta ayengi.

⁴ Abamano bena bapiitile amafuta ayengi mutusupa ayamutulampi twabo.

⁵ Abakasyana bayambile ukusipula basukwa baponena mutulo pantu sibwinga afikokwele ukwisa.

⁶ "Pakati kabusiku baumfwile utumpundu ukuti, 'Sibwinga uyu aisa! Iseni mumupokelele!'

⁷ Elo abakasyana bonse babuka bayasya utulampi twabo.

⁸ Abakasyana impelwamano baebele abamano ukuti, 'Tupeleniko amafuta yenu fwebo utulampi twesu twalasima.'

⁹ Abamano bayaswike ukuti, 'Awee, tayatukumane mwebo nafwebo. Kabiyyeni kubasitisya amafuta musiteko ayenu.'

¹⁰ Lelo lintu baleya mukusita amafuta, sibwinga nao afika. Banakisungu basano abaali nabaipekanya baingile nankwe munjanda yabwinga nefiibi fyaisalika.

¹¹ "Mukasitafye abakasyana impelwa mano nabo babweluluka balapunda ukuti, 'We Mfumu, we Mfumu! Twiswileniko ikiibi!'

¹² Lelo sibwinga abaswike ukuti, 'ndemyeba ikinekine ukuti nsimisibe.' "

¹³ Eikyo kengeleni, pantu tamwisibe ubusiku nakasita.

*Umulumbe wabasya batatu
(Luka 19.11-27)*

¹⁴ "Nakabili ubufumu bwa mumulu bukaba ngomuntu uleya pabulendo, uwaitile ababomfi bakwe abapela bukangalila pafyuma fyakwe.

¹⁵ Apeela kila umo ukulingana napapelele amaka yakwe, umo amupela ulupiya lwa golide amakana yasano, umbi amupela ulupiya lwa golide amakana yabili, naumbi amupela ulupiya lwa golide ikana limo. Elo aim aima ubulendo aya.

¹⁶ Umubomfi uwapokele ulupiya amakana yasano, apiitile ulu lupiya aya lubomfyia, akwatilamo nalumbi amakana yasano.

¹⁷ Nowapokele ulupiya amakana yabili akwatilepo nalumbi amakana yabili.

¹⁸ Lelo umubomfi uwapokele ulupiya umwanda umo, aileimba icikulo emuntu asika ulupiya lwâkwa sikulu wakwe.

¹⁹ "Panuma yansita iitali sikulu wabo alibwelulwike. Alibetile alabepusya fintu babomfesye ulupiya.

²⁰ Umubomfi uwapokele ulupiya lusano ulwa golide, aisileletelapo nalumbi lusano nokulanda ukuti, 'Moneni mwesikulu, mwampele ulupiya lusano ulwa golide, nanebo ninkwatilapo nalumbi lusano.'

²¹ Sikulu wakwe alandile ukuti, 'Wabomba, wemubomfi umusuma kabi uwakisinka. Wali uwakisinka mukusugilila tunono tuntu nakupele, eikyo nalakupela ukwangalila ifintu ifingi. Isa usansamukile pamo na sikulu obe!'

²² "Umusya uwapokele ulupiya lubili ulwa golide nao aisilelanda ukuti, 'Mwe sikulu, mwampele ulupiya lubili ulwa golide, moneni ninkwatilapo nalumbi lubili.'

²³ Sikulu wakwe alandile ukuti, 'Wabomba, wemubomfi umusuma kabi uwakisinka. Wali uwakisinka mukusugilila ulupiya ulunono luntu nakupele, eikyo nalakupela ukwangalila ifintu ifingi. Isa usansamukile pamo na sikulu obe!'

²⁴ "Elo umubomfi uwapokele ulupiya lomo ulwa golide aisilelanda ukuti, 'Mwe sikulu, nalisiba ukuti mwalisyupa, musombola muntu tamwalimine, mukolonganika ifisabo umo tamwatandile.'

²⁵ Naletiina, eikyo nailesika ulupiya mumusili. Moneni ulupiya lwenu ulu.'

²⁶ "Sikulu wakwe amwaswike ukuti, 'Wemubomfi umubi kabi umunajani we!' Kansi waisibe ukuti nsombola muntu nsyalima nokuseepa umo nsyatanda?

²⁷ Kilifye, nomba kansi ngawambikile kulya basungila ulupiya, pakuti nakwatamo ulwakumbikilapo.

²⁸ 'Eikyo mupokeni ulupiya mupele umubomfi uukwete ulupiya ikumi limo.

²⁹ Pantu Onse uukwete akapelelwapo nafimbi, kabi akakwata ifingi ukukilapo, lelo onse uusikwete nangu kimo, akapokololwa nakanono kantu akwata.

³⁰ Uyu mubomfi uwabula ubuyo, muposeni kunse mumfimfi, umukaba ukulila nokusumanya ameno.'

Ubupingusi bwakulekelesya

³¹ "Lintu Umwana Wamuntu akesa mubukata nabamalaika bakwe, akekala pakipuna kyakwe ikyabukata,

³² kibili nabantu mufyalo fyonse bakamukolongana. Elo akapatula abantu ngafintu kacema apatula impaanga ku mbusi.

³³ Akabika impaanga kukulyo kwakwe elo imbusi kukuso kwakwe.

³⁴ Elo Imfumu ikalanda ku bantu abakaba kukulyo ukuti, 'Iseni, mwebapalwa kuli Tata! Iseni mupoke Ubufumu ubo mwali namuteyanisiwa ukutula kububumbo bwesonde.'

³⁵ Nali nensala mwalimpele ifyakulya, nali nekilaka mwalimpele ifyakunwa, nali umweni mwalimpokelele mumayanda yenu,

³⁶ nsyakwete ifyakufwala mwalimfwikile, nalilwele mwalinsakamene, nali mukifungo mwaisile mpempula.'

³⁷ "Abalungami bakamwasuka ukuti, 'Mwe Mfumu nilisa twamimwene namumfwa insala twamipela ifyakulya, nangu namumfwa ikilaka twamipela ifyakunwa?

³⁸ Nilisa twamimwene umweni twamipokelele mumayanda yesu, nangu ukwabula ukufwala twamifwika?

³⁹ Nilisa twamimwene namulwala, nangu mukifungo twaisa mimpem-pula?'

⁴⁰ Imfumu ikasuka ukuti, 'Ndemyeba ikinekine ukuti, lyonse lintu mwayafwile munina umo mulifi uwamulupwa lwandi nangu munono syani, ninebo mwayafwile!'

⁴¹ "Elo akeba abakukuso ukuti, 'Fumeni kuli nebo, mwebatipwa! Kabiyeni mumulilo wamuyayaya uwapekanisiwa Kiwa naba malaika bakwe!

⁴² Nali nensala lelo tamwampele ifyakulya, nali nekilaka lelo tamwampele ifyakunwa,

⁴³ nali umweni lelo tamwampelele mumayanda yenu, nali ukwabula ukufwala lelo tamwampele ifyakufwala, nali nindwala kibili nali muki-fungo lelo tamwansakamene.'

⁴⁴ "Nabo bakasuka ukuti, 'Mwe Mfumu, nilisa twamimwene muli nensala, nelyo nekilaka, nangu umweni, nelyo ukwabula ukufwala, nangu namul-wala, nangu mukifungo twakana ukumyafwa?'

⁴⁵ Imfumu ikabasuka ukuti, 'Ndemyeba ikinekine ukuti, lyonse lintu mwakene ukwafwa onse pabantu bandi, nangu abe umunono syani mwakene ukwafwa nebo.'

⁴⁶ Elo bakaye mukakandwa umuyayaya, lelo abalungami bakaya kumweo wamuyayaya."

26

Baumfwana ukwipaya Yesu

(Mako 14.1-2; Luka 22.1-2; Yohani 11.45-53)

¹ Lintu Yesu apwisisye ukulanda ifintu fyonse ifi, aebele abasambi bakwe ukuti,

² "Namwisiba ukuti kwasyalafye insiku sibili, ninsi busiku nkulu bwe Pasaka. Kibili Umwana Wamuntu akapelwa muminwe yabalwani mukumutanika."

³ Basimapepo bakindami na bakalamba babantu bakolongene mukipango kyakwa simapepo mukalamba Keyafasi,

⁴ kibili baumfwene fintu bengakwata Yesu mubumfisolo no kumwipaya.

⁵ Lelo baalandile ukuti, "Twikakita ifi pe Pasaka, abantu kuti baimya ifimfulunganya."

Yesu bamusuba amafuta ku Betani

(*Mako 14.3-9; Yohani 12.1-8*)

⁶ Lintu Yesu ali mu Betani munjanda yakwa Simoni uwafibasi,

⁷ kwaisile namayo napiita amafuta mwibotolo ayanunkila ayamutengo ukalamba ngansi, aitulwila pa mutwe wakwa Yesu ninsi ali pakulya.

⁸ Lelo lintu abasambi bakwe bamwene ifi balifulilwe batampa ukulailisyanya ukuti, "Busye bonausi bwa musango syani ubu?

⁹ Pantu aya mafuta kuti yasitisiva palupiya ulwingi sana nokupela abalandia!"

¹⁰ Lelo Yesu pakwisiba fintu baletontonkanya abebele ukuti, "Kinsi mulekyusisa yuu mwanakasi? Nankitila ikintu ikisuma.

¹¹ Pantu abalandia mukalaba nabo lyonse lelo tamwakaleba nanebo lyonse.

¹² Lintu akitulwila amafuta yanunkila pamubili wandi, akimpekanya mukusiiikwa.

¹³ Ndemyeba ikisinka ukuti, konse kuntu Imbila Nsuma ikabilwa mwisonde Lyonse, ifi fyakita yuu mwanakasi fikalalandwapo mukumwibukisya."

Yuda asumina ukufutuka Yesu

(*Mako 14.10-11; Luka 22.3-6*)

¹⁴ Yuda Isikalyoti umo pabasambi ikumi limo na bibili aile kuli basimapopo mukalamba

¹⁵ aya bepusya ukuti, "Busye mukampela finsi nganamiletela Yesu?" Nabo bamulipile ulupiya lwa siufele amakumi yatatu (30).

¹⁶ Ukufuma apo Yuda atampile ukufwaya akasita akasuma akakufutuki-lapo Yesu.

Yesu balila pamo nabasambi bakwe ipasaka

(*Mako 14.12-21; Luka 22.7-13,21-23; Yohani 13.21-30*)

¹⁷ Pabusiku bwakwambilapo ubwakulyamo umukate uusyatutumuka abasambi baisile kuli Yesu mukumwipusya ukuti, "Busye niipi ulefwaya tukupekanisisye ukwakulila Ipasaka?"

¹⁸ Alandile ukuti, "Kabiyenii mumusumba kumuntu umo, muleya mweba ukuti Kafundisyia alanda ati, 'Insita yandi naipalama! Ndimukufwaya ukwiscalila Ipasaka munjanda yobe na basambi bandi.' "

¹⁹ Kansi abasambi bakitiile umo Yesu abebele, bapekanya ne Pasaka.

²⁰ Mukyungulo, Yesu na basambi bakwe ukumi limo nababili bakubeme petebulo.

²¹ Kibili ilyo balelya Yesu alandile ukuti, "Ndemyeba ikisinka ukuti, umo pali mwebo alemfutuka."

²² Abasambi baiketwe ubulanda batampa ukulamwipusya umo, umo ukuti, "Busye ninebo mwe Mfumu?"

²³ Yesu abaswiwe ukuti, "Uo nalaingisisya nao pamo iminwe mumbale eulemfutuka.

²⁴ Umwana Wamuntu akafwa ngafintu amalembo yalanda, lelo akalandia ngansi kumuntu uulefutuka Umwana Wamuntu! Ngakyaliwemepo kuli uyo mutu ukukana fyalwa!"

²⁵ Yuda, uwamufutwiwe aipwisye ukuti, "Busye ninebo mwe Kafundisyia?" Yesu amwasuka ukuti, "Wemwine wailandila"

*Umulalilo wa Mfumu**(Mako 14.22-26; Luka 22.14-20; 1 Kolinti 11.23-25)*

²⁶ Ilyo balelya, Yesu abulile umukate, aupaala aumokola apela abasambi bakwe nokulanda ukuti, "Buleni mulye, uyu emubili wandi."

²⁷ Kibili abula nolukombo, atotela Lesa elo abapa ukuti, "Nwenimo bonse,

²⁸ uyu mulopa wandi uwakipangano kipyia uwalasumiina pabengi kukwelelwa kwa membu.

²⁹ Ndemyeba ukuti nsyakanwepo ifyakufisabo fyamyangasi nakabili, mpaka bulya busiku nkanwa ifyakufisabo fya myangasi ifipyia pamo namwebo mu bufumu bwakwa Tata."

³⁰ Lintu baimbile ulwimbo balifumine baya kulupili lwa Miolife.

*Yesu aebe Petelo ukuti ulenkana**(Mako 14.27-31; Luka 22.31-34; Yohani 13.36-38)*

³¹ Yesu aebele abasambi bakwe ukuti, "Buno bwine busiku bonse mulembutuka nokunsa, pantu amalembo yalandu ukuti, 'Nkoma kacema no mukuni wa mpaanga ukasalangana.'

³² Lelo panuma nabusiwa kubafwa, nkamitangilila ku Galili."

³³ Petelo aebele Yesu ukuti, "Nebo nsyakamisyenangu bambi bakamisyel!"

³⁴ Yesu aebele Petelo ukuti, "Ndekweba ikisinka ukuti, buno bwine busiku ulenkana imiku itatu ukuti tawangisiba lintu mukolwe talalila."

³⁵ Lelo Petelo ayaswike ukuti, "Nebo nsyakukane ngakufwa ndefwa nobe!"

Nabonse abasambi balanda fimo fine.

*Yesu apepa mu Getisemane**(Mako 14.32-42; Luka 22.39-46)*

³⁶ Yesu aile na basambi bakwe kunkende yaleitwa Getisemane, aebele abasambi bakwe ukuti, "Ikaleni pano, nebo naya kulya mukupepa."

³⁷ Yesu apiitilepo Petelo na bamwana Zebedee babilo Yakobo na Yohani aya nabo. Elo asakamikwa kibili aba uwabulanda.

³⁸ Elo abeba ukuti, "Umutima wandi waisulamo ubulanda nicingafye imfwe. Ikaleni pano mulelola nanebo."

³⁹ Aendelekofye ikyalinga awa pansi ubunkupeme alapepa ukuti, "Mwe Tata, nga nakyanguka lekeni ulu lukombo lumpite, lelo tekufwaya kwandi kano ukufwaya kwenu."

⁴⁰ Elo abwelulwike asangile abasambi bakwe balimutulo, eikyo aebele Petelo ukuti, "Busye tekuti mulole nanebo pankoloko imo?"

⁴¹ Loleni no kupepa pakuti mwiwila mumatunko. Umupasi ulefwaya lelo umubili naunaka."

⁴² Nakabili Yesu aile mukupepa ukuti, "Mwe Tata, ngakyakwebati ulu lukombo teti lufumepo mpaka ndunwe, ubufwayo bwenu nabukitwe."

⁴³ Nakabili abweluluka asanga nabalala. Amenso yabo yali nayafina kutulo.

⁴⁴ Abasile nakabili ayapepa ilya butatu, apepele ipepo limoline.

⁴⁵ Abwelulukile ku basambi bakwe no kubeba ukuti, "Busye mukili namulala muletusya? Moneni! Insita naifika iya Mwana Wamuntu ukuposwa mumaboko ya babembu.

⁴⁶ Imeni tuleya. Uulemfutuka uyo aleisa!"

*Yesu bamwikata**(Mako 14.43-50; Luka 22.47-53; Yohani 18.3-12)*

⁴⁷ Lintu Yesu akili alelanda, Yuda umo pabasambi ikumi limo na babili nao afika. Aali nebumba ilikalamba ilyafumine kuli basimapepo bakindami na bakalamba ba bantu, abaali ne mipanga nenkoto.

⁴⁸ Uwamufutwike alipele ibumba ikisibilo ukuti, "Untu ndetomona emuntu mulefwaya. Mumukwate!"

⁴⁹ Kibili Yuda aile kuli Yesu nokumweba ukuti, "Mwapoleni mwe Kafundisya," nokumutomona.

⁵⁰ Yesu epakumweba ukuti, "Ale kibusa kita fintu ukonkele!"

Abantu abali na Yuda bapalamama, bafokokela Yesu bamukwata.

⁵¹ Umo pabali na Yesu asomwene umupanga akoma umusya wakwa simapepo mukalamba amuputula ukutwi.

⁵² Yesu amwebele ukuti, "Bwesesa umupanga mukitubo, onse uwanga nomupanga akafwa ku mupanga.

⁵³ Busye muletontonkanya ati teti ngebe Taata, kibili nao apapene kuti antumina ifita fyaba mailaka ukukila ikumi limo na babili?

⁵⁴ Lelo, kuti yafikilisyia syani amalembo ayalande ukuti ifi fifwile fyaktikila muli iyi nsila?"

⁵⁵ Pali kalya kasita Yesu aebele ibumba ukuti, "Busye ndikipondo, pakuti mwise nemipanga ne nkonto mukundikata? Kila busiku naleikala mwi Tempele undefundisya, tamwalendikata.

⁵⁶ Lelo ifi fyonse fyalakitika pakuti ifyalembelwe kuli bakasesema fifikilisyie."

Elo abasambi bonse bamusya babutuka.

Yesu mukilye

(Mako 14.53-65; Luka 22.54-55,63-71; Yohani 18.13-24)

⁵⁷ Abo abkwete Yesu bamutwele kuli Kayafasi simapepo mukalamba, uko bakafundisya ba mafunde na bakalamba ba bantu baali nabakolonganaga.

⁵⁸ Lelo petelo alekonkamo akatalamukila mpaka afika na mumusolo wakwasimapepo mukalamba. Alingile nokwikala pamo na bamalonda amone ifyalikitika.

⁵⁹ Basimapepo bakindami na basikilye bonse balefwailisyia ifyakubepesyia Yesu pakuti bamwipaye.

⁶⁰ Lelo tabafisangile nangu abantu abengi baimine nokumubepesyia ubufi. Kwaiminine abaume babilo

⁶¹ nokulanda ukuti, "Uyu muntu alandile ati, 'Nalikwata amaka yakubongololo itempele lyakwa Lesa nokulikula munsiku sitatu.' "

⁶² Simapepo mukalamba aiminine nokweba Yesu ukuti, "Ngawebo taulelandapo?" Ngobu bunte aba bantu balekutunganya?

⁶³ Lelo Yesu aikelefye tondolo. Simapepo mukalamba amwebele ukuti, "Mwisina lyakwa Lesa uwamweo, lapafye nganiwebo Klistu Umwana wakwa Lesa."

⁶⁴ Yesu amwaswike ukuti, "Naulanda ukuti ninebo. Lelo ndimukumyeba mwebonse ukuti, ukufuma pali ino nsita mukamona Umwana wa Muntu naikala kukuboko kwakukulyo ukwa Wamaka, kibili aleisa pamakumbi ya mumulu!"

⁶⁵ Elo simapepo mukalamba alepwile insalu yakwe nokulanda ukuti, "Napontela Lesa! Nikinsi tulefwaila bakambone nabambi! Nomba mwayu-umfwila imiponto yakwe!"

⁶⁶ Ngamwebo muletipo syani?"

Bayaswike ukuti, "Nalinga ukufwa."

⁶⁷ Bamufwisile amate pamenso no kumupuma, elo bambi balemuma amapi

⁶⁸ nokulamweba ukuti, "Klistu, sesema kuli fwebo. Ninani wakuma!"

Petelo akaana Yesu

(*Mako 14.66-72; Luka 22.56-62; Yohani 8.15-18,25-27*)

⁶⁹ Nomba Petelo ali naikala panse pamusolo, umwanakasi umubomfi wakwa simapepo mukalamba aisile kuli ena nokulanda ukuti, "Nobe wine, wakiba na Yesu waku Galili."

⁷⁰ Lelo alikene pamenso yabantu bonse ukuti, "Nsisibe fintu ulelandapo,"

⁷¹ Elo afuma mumusolo aya pamwinsi, naumbi umubomfi amumona aeba abantu abaali nabeminina kulya ukuti, "Uyu Muntu akiba na Yesu waku Nazareti."

⁷² Nakabili Petelo alikene ukuti, "Ndelapafye akalumba nsyamwisiba uyu muntu!"

⁷³ Panuma yakasitafye akalinga abantu abaali nabeminina kulya bapalamine kuli Petelo nokulanda ukuti, "Ikinekine nobe wine uli wamilibena, pantu nemilandile yobe ine yabena Galili."

⁷⁴ Petelo ayambile ukuitipa nokulapa ukuti, "Ulya muntu nsyamwisiba!"

Palyapene na mukolwe alila

⁷⁵ kabilo Petelo aibwisye fintu Yesu amwebele ukuti, "Lintu mukolwe talalila, ulenkana imiku itatu ukuti tawangisiba." Elo afumina panse nokuya mukulila ngansi.

27

Yesu bamutwala kuli Pilato

(*Mako 15.1; Luka 23.1-2; Yohani 18.28-32*)

¹ Ulukelo basimapepo bakindami bonse na bakalamba ba bantu balikumene baumfwana fintu bengepaya Yesu.

² Balimukakile bamupiita bamutwala ku mulashi Pilato.

Imfwa yakwa Yuda

(*Imilimo 1.18-19*)

³ Lintu Yuda uwamufutwike amwene ukuti Yesu bamupingwila imfwa, alilangulwike pali fintu akitile. Abwesesyemo ulupiya lwa siufele amakumi yatatu kuli basimapepo bakindami nentungulusi,

⁴ ukuti, "Nalibembwike, pantu nafutwike umuntu uwakaele!"

Bamwaswike ukuti, "Uyo Mulandu obe!"

⁵ Yuda aposele ulupiya mwi Tempele nokuyaikulika.

⁶ Basimapepo bakindami batolele ulupiya nokulanda ukuti, "Ulu lupiya lwamulopa, takyasuminisiwa mwifunde lyesu ukulubika mukipao kya mwi Tempele."

⁷ Eikyo baumfwene ukusitamo ibala lyakwa kabumba wa nongo, umwakulasika bamwisa.

⁸ Ekintu iyi nkende nandakayi itilwa ukuti "Ibalia lya mulopa."

⁹ Ifyalandilwe kuli kasesema Yeremia fyalfikilisyé ukuti, "Bapiitile ulupiya lwa siufele amakumi yatatu emutengo unto abena Israeli bamusitisisyepo,

¹⁰ bailesitamo ibala lyakwa kabumba wa nongo ngafintu Imfumu yalandile."

*Yesu na Pilato**(Mako 15.2-5; Luka 23.3-5; Yohani 18.33-38)*

¹¹ Yesu bamutwele kumulashi Pilato uwamwipwisye ukuti, "Busye uuli Mfumu yaba Yuda?" Yesu ayaswike ukuti, "Naulanda."

¹² Lelo lintu basimapepo bakindami na bakalamba balemwebelela, tayaswikepo nangu kimo.

¹³ Pilato amwipwisye ukuti, "Busye tauleumfwa ifintu fyonse ifi fintu balekwebelela?"

¹⁴ Lelo Yesu alikene ukwasukapo isiwi nangu limo, iki kyalengele Pilato ukupapa.

*Yesu bamupingwila ukufwa**(Mako 15.6-15; Luka 23.13-25; Yohani 18.39—19.16)*

¹⁵ Lyonse pe Pasaka, umulashi alebakakwilapo umufungwa umo untu abantu balefwaya.

¹⁶ Pali iyi nsita kwali umufungwa umo uwali naisibikwa uwaleitwa ukuti Balaba.

¹⁷ Lintu ibumba lyakolongene, Pilato abepwisye ukuti, "Busye ninani mulefwaya imikakwile pali Balaba na Yesu uwitwa Klistu?"

¹⁸ Pilato alisibe ukuti baaletele Yesu kuli ena pamulandu nomufimbila.

¹⁹ Lintu Pilato ali naikala pakipuna kya bupingusi umukasi wakwe amutumine amasiwi ukuti, "Wikita nangu kimo pali uyo muntu wakaele, ninkyusiwa apakalamba mukiloto pamulandu noyo muntu."

²⁰ Lelo basimapepo bakindami naba kalamba basongelekenye abantu ukuti balombe ukubakakwila Balaba elo Yesu ena bamwipaye.

²¹ Pilato aipwisye ibumba nakabili ukuti, "Busye pali aba babili, ninani mulimukufwaya imikakwile?"

Bayaswike ukuti, "Balaba!"

²² Pilato abepwisye ukuti, "Busye nomba inkite syani kuli Yesu uwitwa Klistu?"

Bonse bayaswike ukuti, "Mutanikeni!"

²³ Lelo Pilato abepwisye ukuti, "Malandu nsi akitile?"

Batampile ukubilisyia nomba ukukilapo ukuti, "Mutanikeni"

²⁴ Lintu Pilato amwene ukuti tapali kintu engakita kuti ifimfulunganya fyaimafye, aabulile amensi, asamba kuminwe pamenso yabantu bonse nokulanda ukuti, "Nsiliimo muli iyi mfwa ya uyu muntu, mulandu wenufye!"

²⁵ Ibumba lyonse lyayaswike ukuti, "Lekeni umulopa wakwe ube pali fwewe napabana besu!"

²⁶ Pilato abakakwilile Balaba, kabili panuma alopola Yesu abapele ukuti bayemutanika.

*Abasilika bapunika Yesu**(Mako 15.16-20; Yohani 19.2-3)*

²⁷ Abasilika ba mulashi batwele Yesu mukipango, elo bakolonganika nempuka ya basilika yonse.

²⁸ Yesu bamufulile insalu syakwe nokumufwika umwingila wakasika.

²⁹ Bapikwile injana yamyunga bamufwika kumutwe, nokumufumbatika itete kukulyo. Balemufukamina nokumupunya ukuti, "Mulopwe kanabesa wemfumu ya Bayuda!"

³⁰ Balemumfwisila amate, bamupoka itete balamuma ku mutwe.

³¹ Lintu bapwisisye ukumupunika, bamufulile umukansu bamufwika insalu syakwe, Elo bamutwala mukumutanika.

Yesu bamutanika

(*Mako 15.21-32; Luka 23.26-34; Yohani 19.17-27*)

³² Lintu baleya, bakumenye umwaume uwalefuma ku Sirene isina lyakwe ni Simoni, kabilo abasilika bamupatikisyé ukupiita umusalaba wakwa Yesu.

³³ Bafikile kunkende iyaleitwa Gologota, ikilepilibula ukuti, "Inkende ya Fipaanga".

³⁴ Bapele Yesu umwangasi wasankana nendusya ukuti anwe, lelo panumá abika palulimi, alikene ukunwa.

³⁵ Lintu bamutanike, balependula pakwakana insalu syakwe.

³⁶ Nokwikala pansi balamulinda.

³⁷ Pamulu wamutwe wakwe babikilepo akapampa apalembelwe umulandu unto bamwipairepo ukuti, "Uyu ni Yesu Imfumu ya Bayuda."

³⁸ Batanikepo notupondo tubili kamo kukulyo nakambi kukuso.

³⁹ Abapita nsila balepukunya imitwe nokutuka Yesu insele,

⁴⁰ balelanda ukuti, "Ewebo walelanda ati kuti wabongolola itempele nokulikula nakabili munsiku sitatu! Ngoli Mwana wakwa Lesa ipususye! Ikila pamusalaba!"

⁴¹ Mu musango umowine basimapepo bakindami na bakafundisyá ba Mafunde na bakalamba ba bantu balemupunika ukuti,

⁴² "Alepususya bambi, lelo ena teti aipususye! Nga nimfumu yabena Israeli, aoke pamusalaba! Elintu twalamusumina!

⁴³ Aketekele muli Lesa, ale Lesa namupususye ngalimutemwa, pantu alelanda ati, 'Ndimwana wakwa Lesa!' "

⁴⁴ Notupondo tubili utwatanikwe pamo nao twalemusalula.

Imfwa yakwa Yesu

(*Mako 15.33-41; Luka 23.44-49; Yohani 19.28-30*)

⁴⁵ Ukuftuma lintu akasuba kafikile pamutwe pansita ya 12 koloko mukyaloo monse mwafitile nafititi, ukufika napantsita ya 15 koloko.

⁴⁶ Pansita ya 15 koloko Yesu alilile mwisiwi ilikalamba ukuti, "Eloi, Eloi, Lama sabakatani?" Ikilepilibula ukuti, "Lesa wandi, Lesa wandi, Nikinsi mwandekelesesyá?"

⁴⁷ Lintu bamo pabaali nabeminina palya baumfwile ifi, balandile ukuti, "Aleita Eliya."

⁴⁸ Palyapene, umo pali bena abutwike ayapiita umwepu atubika mu mwangansi wakantuka, autunga kwitete nokupa Yesu ukuti anwe.

⁴⁹ Lelo bambi balandile ukuti, "Tulolele, tumone Eliya ngalaisa mupususya!"

⁵⁰ Kabilo lintu Yesu apundile isowi lyapamulu, awe aleka nomweo.

⁵¹ Pali ilya nsita insalu baali nabatanika mwi Tempele yalepwike pabili ukufuma pamulu ukufika pansi. Isonde lyalitentele, amabwe yalilepawike,

⁵² imanda syaliswike, abantu bamusilo abengi abali nabafwa balibusiwe.

⁵³ Bafumine mu manda, napanuma yakubuka kwakwa Yesu baile musumba wamusilo, nokuyamonekela kubantu abengi.

⁵⁴ Lintu umukalamba wabasilika nabasilika abalelinda Yesu baumfwile makumba nokumona ifintu fyonsé ifyakitike, bakwetwe nomwenso nokulanda ukuti, "Mukisinka uyu muntu aali Mwana wakwa Lesa!"

55 Kwali banamayo abengi, abaletamba akatalamukila, bakonkele Yesu ukufuma ku Galili kukulamutangata.

56 Pali bena pali Mariya Mangadelena, Mariya nyina wakwa Yakobo na Yosefu, nanyina wabana bakwa Zebedee.

Ukusikwa kwakwa Yesu

(*Mako 15.42-47; Luka 23.50-56; Yohani 19.38-42*)

57 Lintu kyali ikyungulo, kwaisile umukankala ukufuma ku Alimateya isina lyakwe ni Yosefu, kabilo nao ali musambi wakwa Yesu.

58 Aile kuli Pilato mukulomba ikitumbi kyakwa Yesu. Pilato apele insambu ukuti bapele Yosefu ikitumbi.

59 Eikyo Yosefu apiitile umubili wakwa Yesu aupomba munsalu iyipyा,

60 aubika namumanda yakwe iipyा intu afonkwele mwilibwe. Elo akunkulusisypo ilibwe ilikalamba pamwinsi wamanda aya nokuya.

61 Mariya Magadalena na Mariya mubiye bali nabekala kulyakwine apalungatene nemanda.

Balonda imanda

62 Ubusiku bwakonkelepo, panuma yabusiku bwakupekanya, basimapepo bakindami naba Falise baile kuli Pilato.

63 Balandile ati, "Mwemfumu, natwibusya fintu ulya muntu wabufi alelanda lintu ali umumi ukuti, 'Nkabuka nakibili panuma yansiku sitatu.'

64 Peleni abakulonda imanda yakwe bwino bwino mpanka nobusiku bwabutatu, pakuti abasambi bakwe bekeyamwiba elo bakaleyeba abantu ukuti nabuka kubafwa. Ubu bufi bwakulekesya bukabipapo ukukila ubwakwambilapo."

65 Pilato abebele ukuti, "Piiteni abakulonda, musininkisyе ukuti balonda bwino bwino imanda ngafintu mwisibe."

66 Efintu bailefenenkesyapo, basyapo nabasilika bakulonda.

28

Ukusikuka kwakwa Yesu

(*Mako 16.1-10; Luka 24.1-12; Yohani 20.1-10*)

1 Nomba panuma yabusiku bwe Sabata, kumakya pamulungu, Mariya Magadalena na Mariya mubiye baile mukumona imanda.

2 Kwapitile makumba, pantu malaika wa Mfumu alikile ukufuma kumu. Ailulwilepo ilibwe pa manda aikala napalya pene.

3 Imimonekele yakwe yali ngakalumba, nefyakufwala fyakwe fyali ifyabuta tuutu nge mfula yamabwe.

4 Abalelonda bayambile ukututuma kumwenso, bawile pansi ngabafwile.

5 Malaika aebele banamayo ukuti, "Mwitiina! Ningisiba mulimukufwaya Yesu untu batanike.

6 Talimo Lesa namibusya kubafwa ngafintu alandile. Iseni mumone pantu bamulalike.

7 Kabiyeni mukwangufyanya, muleya eba abasambi bakwe ukuti, 'Nabuka kubafwa, apa alimukuya ku Galili natangilako, ekuntu mukayamonana!' Efintu nakisa mukumyeba."

8 Eikyo banamayo bafumine kumanda mukwangufyanya, nabesulamo nensansa uku nomwensomo, balebutukila mukweba abasambi bakwe.

9 Mukupumikisyе Yesu abakumanya nokubebe ukuti, "Umutende ube nemwe," Bapalamine kuli ena baikata ku makasa yakwe balamusinsimuna.

10 Elo Yesu abebele ukuti, "Mwitiina, kabiyen'i mwebe bamuninane ukuti baye ku Galili, ekuntu balaisa mbona."

Akasebo ka bamalonda

11 Lintu banamayo baleya, abasilika bamo abalelonda babwelelemo kumusumba. Baileyeba basimapepo bakindami ifyakitike fyonse.

12 Basimapepo bakindami bakolongene na bakalamba babantu balaumfwana fintu balakita. Bapele abasilika ulupiya ulwingi

13 nokubeba ukuti, "Mulelanda ati, 'Abasambi bakwe bakisaiba umubili wakwe ubusiku lintu twakiba mutulo.'

14 Kibili ngakyakweba ati Umulashi aumfwa ifi, mwikasakamana nelyo kimo tukesiba fintu tukamweba mpaka tukamifumye mubwafya."

15 Abasilika bapiitile ulupiya bakita nefyo babebele ukukita. Ukufika nalelo ili elyasi lyasabankana ku Bayuda.

Yesu amoneka kubasambi bakwe

(Mako 16.14-18; Luka 24.36-49; Yohani 20.19-23; Imilimo 1.6-8)

16 Abasambi ikumi limo na umo baile mu Galili palupili pantu Yesu abebele ukuya.

17 Lintu bamumwene balimusinsimwine, nangu bambi balemutwisika.

18 Yesu apalamine kuli bena nokubeba ukuti, "Amaka yonse mumulu napano isonde nayapelwa kuli nebo.

19 Kabiyen'i muleyalenga abantu bonse ukuba abasambi bandi, mulebabatisya mwisina lyakwa Tata, ilya Mwana, nelyakwa Mupasi wamusilo,

20 kibili mulebafundisya ukulakonka fyonse fintu namikonomesye. Kibili nakulaba namwebo insita, mpaka nakumpela yakyalo."

Kalata yakibili iyalembele Paulo kubena TESALONIKA

UBULONDOLOSI

Inkalata yakibili iyaku Tesalonika yalembelwe na Paulo umutumwa (1.1). Alembele iyi kalata mukwangufyanya panuma alemba kalata yakubalilapo ku Tesalonika, mumyaka amakuni yasano naumo panuma yakufyalwa kwakwa Klistu. Paulo ali akili mu Korinto lantu alembele iyi kalata ku lukuta mu Tessalonika, ulukuta luntu asangile lantu ali pabulendo bwabubili ubwakusabankanya Imbila (imilimo yabatumwa 17.1-10). Ibuuku lyamlimo yabatumwa lyalandia ukuti ulukuta lwapangilwe naba Yuda bamo bambo elo naba Giriki abaengi.

Ulukuta lyamutesalonika lwaliposesyeko amano pamulandu wansita yampela elo nokwisa kwakibili ukwakwa Klistu, pantu Paulo alilembele ifingi pali iyi ilandu muli syonse inkalata sibili isyaku Tesalonika, mupepi napakati kakalata yakibili iyaku Tesalonika yaba pansita yampela. Kabilis Paulo akonkomesye pakukana ikalafye ukwabula ukubomba. Umuntu onse awfile ukubombela ifyakulya fyakwe 3.6-10.

Imilandu yatantama ngefi

1. Paulo pakulemba iyi kalata atampilepo ukuilondolola umwine elo nabantu bakwe. 1.1-2.
2. Elo atotela Lesa palukuta mu Tesalonika nokubapepela 1.1-12.
3. Mukipande kyabubili, Paulo alanda pansita yampela.
4. Elo alanda pakukana ikala ukwabula ukubomba 3.1-15.
5. Paulo alekelesye mukuposya ulukuta nakabili 3.16-18.

¹ Ninebo Paulo, Sailasi elo na Timote twamilembela mwelukuta lwamu Tesalonika mwebaba muli Lesa shifwe kibili Nemfumu Yesu Klistu.

² Ukuosenaminwa elo nomutende fibe namwebo ukufuma kuli Tata elo Nemfumu Yesu Klistu.

Ubupingusi bwapakwisa kwakwa Klistu

³ Mwebabwananyina, fwebo tulatotela Lesa lyonsefye pali mwebo, pantu ekilungeme kuli fwebo ukulakita, umusango wakitetelelo kyenu kilekula apakalamba kibili nekitemwiko mwakwatila kila umo naumo kileya kilekulilako.

⁴ Eikyo fwebo tulaitakisya mukulanda kwesu pali mwebo, munkuta syakwa Lesa. Tutasya pafyo mwakonkanyapo ukusumina elo nokushipikisyu lantu mwapita mumakyusi nangula ukupakaswa.

⁵ Iki kyonse kilangililo kyakweba ati ubupingusi bwakwa Lesa bwamulinalganya, pakweba ati mwaba abalinga kubufumu bwakwe buntu mukyulila.

⁶ Ikyakine Lesa wamulinganya, akakyusya abobonse abamikyusya,

⁷ akapwisya amakyusi yenu elyo namakyusi yesu yene. Akakita ifi, ilyo Imfumu Yesu ikamonekela ukufuma mumulu nabamalaika bakwe ababulamba.

⁸ Akesa nolubingu lwamulilo ulwakwisa kanda abo bonse abasyaisiba Lesa kibili nabo bonse abashumfwila Imbila Nsumya ya Mfumu yesu Yesu.

⁹ Bakakyula umuyayaya, kibili akabafumya namuceni kyakwe elyo namubukata bwabulamba bwakwe,

¹⁰ Lintu akaba nabwela pali bulya busiku, abamusilo bakalamulumbanya, elo abamutetekela nabo bakamukindika, kabili namwebo mukaba nabena pantu mwalisumina amasiwi yabukambone bwesu.

¹¹ Eikyo lyonsefye tulamipepela, ukuti mube nemibeele yalinga kubwite buntu Lesa amitako. Pakuti kumaka yakwe engafikilisyia ifisuma fyonse fintu mufwaya ukukita nokupwilikisyia imilimo yenu yonse intu mubomba mukisumino,

¹² pakweba ati isina lya Mfumu Yesu likatamikwe muli mwebo, namwebo mukatamikwe muli ena, ukulingana nokusenaminwa kwakwa Lesa wesu elyo ne Mfumu yesu Yesu Klistu.

2

Umubifi

¹ Nomba, ukulolenkana nokwisa kwa Mfumu yesu Yesu Klistu kabili nokukumania kwesu kyapamo nankwe, tulemipapata mwe babwananyina ukuti,

² tamufwile ukutunsya imitima nangu ukusakamana pamabusesemo yamo, inkalata nelyo utusebo tumo, utulanda ati nifwebo twalandile ati ubusiku bwa mfumu nabwisa kale.

³ Mwileka uuli onse amilufye munsila iili yonse, pantu bulya busiku tabwakese mpakafye abantu ngabayalukila Lesa kabili nomuntu mubifi akasokoloke,

⁴ uupinkana kabili uunsansabika ukukila pali fyonse ifitwa tulesa nafyonse fintu abantu bapepa, pakuti akapiite apakwikala mwitempele lyakwa Lesa, nokulalamda ukuti ninebo Lesa.

⁵ Busye tamwibusya ukuti ilyo nali namwebo nalimyebele ifi?

⁶ Kabili nomba mwalisiba ikyalenga ukuti kwaliba ikyamwikatilila pakuti akaisikolole pansita iyalinga.

⁷ Pantu amaka yankama yakwa mpulamafunde, kabili ikili ilabomba kabili fintu nandile ukuti fikakitika, tekuti fikitike kanofye Lesa afumyapo ulenga ifi fintu ukukitika.

⁸ Kabili elo mpulamafunde akasokoloka, uo Imfumu Yesu ikakifya kumupu wakukanwa kakwe nokumonaula kubukata bwakwisa kwakwe.

⁹ Ukwisa kwakwa mpulamafunde kukabafye nge mibombele yakwa Satana, akabomfyia imisango yonse iyakulangilamo amaka yakwe ukupitila mufisibilo ne fipapwa ifi fikaba fyabufi.

¹⁰ Kabili akabomfyia nensila syonse isyo umubifi abepelamo abo abaleloba. Bakaloba pantu balikene ukutemwa ikisinka kabili nokusuka.

¹¹ Pamulandu waifi Lesa alatuma amaka yakubafulunganya, mukubalenga basumine ifyabufi,

¹² pakuti bonse bakasekwe, pantu balikene ukusumina ikisinka lelo balebekelwa mububifi.

Mwalisalwa ukuti mukapusuke

¹³ Lelo lyonse tulatotela Lesa pamulandu wenu mwebatemwikwa ku Mfumu, pantu pakutampa Lesa amisalile ukuti mukabe abantansi ukupusuka, ukupitila mukusangululwa kwa Mupasi elo nokusumina mukisinka.

¹⁴ Lesa amitile pamulandu wa Mbila Nsuma twamisimikile, pakuti mukwateko ubukata bwa mu Mfumu Yesu Klistu.

15 Eikyo kansi mweba bwananyina beni abashipa nokwikatililila kuntu tambi twamishilile isyo twamifundile, ukupitila mumasiwi yantu twamye-beleye pakanwa, nayantu twamilembele munkalata.

16 Imfumu yesu Yesu Klistu umwine, na Lesa Tata uwatutemenwe, nokutupela ikikoselesi kyamuyayaya, nokusumina ukusuma ukupitila mukusenaminwa,

17 akoselesye imitima yenu nokumikosya pakweba ati mulebomba imilimo iisuma yonse nokulalanda ifisuma.

3

Muletupepelako

1 Mukulekelesya, mwebamunyinane mletupepela ukuti amasiwi yakwa Lesa yatwalilile ukusabankana elo nokupokelewa nomukinsi, ngefyo kyali pali mwebo.

2 Kibili mulepepa nokutila twingapokololwa, kubalwani, elyo nabantu abafifi pantu tebonse abakwata ikitetekelo.

3 Lelo Lesa wakisinka, akamikosya kibili nokumikingilila kububifi.

4 Kibili twalisintilila mu Mfumu, ukuti mulakita, kibili mwakulakita fintu twamwebele.

5 Imfumu naitungulule imitima syenu mukutemwa ukwakwa Lesa namukusupikisyia kwakwa Klistu.

6 Nomba tulemikonomesya mweba bwananyina, mwisina lya Mfumu Yesu Klistu, ukuti talukeni kuli munyina uuli onse uuwikala mubunanjan, kibili uushikala ukulingana namafundisyo mwapokelele ukufuma kuli fwobo.

7 Pantu imwe mwebene mwalisiba fintu mufwile ukulatupasyanya, pantu tatwali banajani lintu twali namwebo,

8 tatwalilepo umukate wamuntu uuli onse ukwabula ukulipa, lelo twale-bombesya kibili twalebomba ubusiku nakasuba pakuti twiba ikisendo ku uuli onse pali mwebo.

9 Tepamulandu wakweba ati tatwakwata isyo nsambu, isyakuti mule-tutungilila, lelo nipamulandu wakumi-pela ikilangililo ikisuma ikyakulatu-pasyanya.

10 Pantu nelyo twali namwebo, twalimipele iki ikipope ukuti, "Uwakana ukubomba nokulya elalya".

11 Pantu tulomfwa ukuti bambo pali mwebo banajani, tababomba inkito baikalilafye ulwambo.

12 Nomba abantu bapalefyo tulabakonomesya kumaka ya Mfumu Yesu Klistu ukuti balekita fintu bafwile ukulakita pakuti balepanga ubwikasi bwabo.

13 Mweba bwananyina, mwilatendwa ukulakita ifisuma.

14 Ngakyakuti uuli onse akana ukukonka fintu twalandu muli iyi inkalata, mumwisibe bwino uyo muntu kibili mwilasangwa nao, pakuti abe nensoni.

15 Mwilamumona ngo mulwani wenu, lelo mulemusoka ngamunonko.

Amasiwi yakulekelesya

16 Nomba lekeni Imfumu yamutende iyine, imipe umutende munsita syonse kibili namusilie yonse. Imfumu ibe namwebo bonse.

17 Nebo ne Paulo nalemba aya amaposyo namaboko yandi. Ngekisibilo ku nkalata sintu nemba.

¹⁸ Ukusenaminwa kwa Mfumu yesu Yesu Klistu kube namwebo bonse.

Kalata yakwa YAKOBO

UBULONDOLOSI

Ikitabo kyakwa Yakobo kyalembelwe ku muntu wesina lya Yakobo. Uyu Yakobo ni munyina wakwa Yesu, ulya wali intungulusi mulukuta Iwa pakutampa kibili ali mukilye kya mu Yerusalem (Imili 15.13). Umutumwa Polo nao amwitile ukuti, "Ikisinte" kya lukuta muli Galatiya 2.9. Abamasambililo basumina ukuti ikitabo kyakwa Yakobo kyalembelwe Lintu imyaka amakumi yasano tayalakumana panuma Yesu afyalwa. Apo Yakobo ali nintungulusi mulukuta Iwamu Yerusalem, alembéle ikitabo ninsi aleikala mulya mwine.

Yakobo alembéle ikitabo kyakwe "Ku mikowa ikumi limo na sibili isyasalangana ikyalo kyonse" (1.1). Amasambililo yamuli Yakobo yabomba ku bena Klistu bonse lelo ifi abomfesye amasiwi yakuti Imikowa ikumi limo na sibili kilangilila ukuti Yakobo alembela abena Klistu aba Yuda. Pantu iki kitabo kyali nokusabankana amabumba yaba kabelenga, pantu kyalandile pa fikomo ifingi. Yakobo atonteles pabwampano bwaba pa kitetekelo ne milimo. Ikitetekelo kyakine kikamonekela mu milimo (2.17). Kibili alandile na pakulakindamikapo abanonka 2.1-4 nokutweba ukuti tulengelela muli fintu tulanda 3.1-12.

Fyatantama ngefi

Yakobo aposya bakabelenga bakwe mu 1.1

Ikyakonkapo akoselesya abena Klistu ukulasipikisa amafya mu (1 na 2 na 7)

Elo alanda na pafyo kyalinga ikitetekelo ukumonekela mu milimo mu (2 vs 1 na 26).

Panuma yaifyo alanda na pamaka amasiwi yakwata mu 3.1-12.

Yakobo alondole ifyo amano yakwa Lesa yapusana na mano yapesonde 3.13—4.10.

Ikyakonkapo asoka bakabelenga bakwe pamulandu wakuyumfwa 4.11—5.6.

Yakobo apeisia ikitabo kyakwe mu 5.7-20 mukupeela ifyakulakonka.

¹ Ninebo Yakobo, umubomfi wakwa Lesa ne Mfumu Yesu Klistu namiposya mwemikowa ikumi limo nasibili isyasalangana ifyalo fyonse.

Muleba aba kitetekelo na mano

² Mwebabwananina mulekimona ngesyuko amakyusi ya misango misango ngayamisila,

³ pantu mwalisiba ukuti ukwesiwa kwa kitetekelo kyenu kuleta ukusipikisyia.

⁴ Lekení ukusipikisyia kupwisye umulimo wakuko, pakweba ati muleba abakula, kibili abapwililika ukwabula ukubulisyia akantu nangu kamo.

⁵ Umo pali mwebo ngaabulisyia amano, alombe kuli Lesa ukuti amupele. Lesa nao uupelesya nensansa kuli onse uwamulomba akamupela.

⁶ Lelo pakulomba awfile aketekela ukwabula ukutwisika, pantu onse uutwisika aba nge bimbi lya pali bemba ili sunkanisiwa nokupitwa nomwela.

⁷ Umuntu uutwisika eenekela ukupokelela ikintu ikili kyonse ku Mfumu.

⁸ Abafye uwabula ukusininkisya fintu ali nokukita, imilangwe yakwe yaluka alukafye.

Ubupina nobukankala

⁹ Uwabwananya umupina afwile ukumfwa bwino palifintu Lesa amukindamika.

¹⁰ Nomukankala nao afwile ukumfwa bwino pali fintu Lesa amupoka ubukindami, pantu akalukuta ngeluba ly a kyani.

¹¹ Pantu akasuba katula akabalikisy, nekabilila kilenga ikyani ukuma. Amaluba ya kyani yalalukuta nokuyemba kwapwa. Mu musango umo wine efintu nomukankala akonaulwa pansita apamfiwe namakwebo yakwe.

Ukvesiwa no kutunkwa

¹² Alisyuka umuntu uusipikisy mu mesyo. Pantu ngakimfy amakyusi akapokelela ikilambu kya mweo kintu Lesa alaya abantu abamutemwa.

¹³ Ngamwatunkwa, peba nangu umo uuwfile ukulanda ati, "Lesa antunka." Pantu Lesa tekuti atunkwe ku mubifi kabili nao tekuti atunke uuli onse.

¹⁴ Lelo umuntu atunkwa lintu ulunkumbwa lwakwe lwamongola no kumukwata.

¹⁵ Elo ulunkumbwa ngalwaimita lufyala ulubembu, kabili no lubembu nga lwakula lufyala imfwa.

¹⁶ Ala mwilabepwa mwe bwabanana!

¹⁷ Ifyabupe fyonse ifisuma kabili ifyapwililika fifuma ku mulu. Fifuma kuli Tata uwabumba ifya mumulu ifipela ulubuuto. Uusyaluka ngekinsingwa kilesyunguluka.

¹⁸ Lesa umwine ku kufwaya kwakwe ewatufyele kwi siwi lyakwe iyakisinka pakuti tube abantansi pa fibumbwa fyakwe fyonse.

Ukumfwa no kukita

¹⁹ Isibeni iki mwebabwananina abatemwikwa! Umuntu onse alingile ukuba uwayanguka ukumfwa, lelo uukokola ukulanda nokufulwa.

²⁰ Ukufulwa kwa muntu takuleta ubulungami buntu Lesa akabila.

²¹ Talukeni ku fyakowela fyonse ne misango ibi yonse mukili nayo. Mulenakila Lesa nokupokelela amasiwi yakwe yantu abyala mu mitima yenu ayaba namaka yakumipususya.

²² Mwilalibepa pakupelelafye mukumfwa amasiwi yakwa Lesa lelo mulekita nafintu yalemyeba.

²³ Onse umfwafye amasiwi lelo takita fintu yalande, aba ngomuntu uwailolesya pamenso mwigilashi.

²⁴ Kabili lintu aimona aya, kabili palya pene ailaba fintu amoneka.

²⁵ Lelo onse uulolekesya mu Mafunde ayapwililika. Amafunde ayalenga umuntu ukuba umtuntungwa, kabili atwalilila ukwabula ukuba komfwafye ulaba lelo kakita, akaba uwopalwa muli fyonse mumilimo yakwe yonse.

²⁶ Bonse abalanda ati nibakapepa, lelo tabasunga ululimi lwabo ninsi baibepafye abene nabukapepa bwabo buntu bwabula ubuyo.

²⁷ Bukapepa ubwalengama kabili ubusyakowela kuli Lesa nyubu, Kwafwa abana bansiwa naba mukamfwilwa muli fintu balekabila nokusalusya umuntu mukukowela kwisonde.

2*Mwilakita mukisya kinani*

¹ Mwe babwananina, abasumina mu Mfumu yesu Yesu Klistu iyabukata, mwilaba nakapatulula.

² Ngakyakuti umukankala uufwele imbala minwe ya golide nefyakufwala ifyayemba aisa mu njanda muntu mulongene elo nomupina uwaspula nao aisamo.

³ Ngamwapokelela bwino uufwele insalu isisuma mwamweba ukuti, "Ikala apa apaweme", elo mwaeба umupina ukuti, "Webo keminine uko, nangu ati, soikale pansi mupepi nanebo,"

⁴ Busye ninsi tekapatulula mwakita? Busye ninsi temano ayabi mwabom-fya mukupingula?

⁵ Ufweni mwebabwananina abatemwikwa bandi! Busye Lesa tasala aba bantu abo abantu pano sonde beta ukuti bapina ukuba abakankala mukitetekele? Abasala ukupyana ubufumu buntu Lesa alaya abamutemwa.

⁶ Lelo mwebo mwafupula abapina. Busye tebakankala abamifyengelesya no kumitatansinsya muflye?

⁷ Busye tebasalula isina likindami iyakwa Yesu lintu mwainikweko?

⁸ Nga kyakuti ikine kine mulakita ifunde ilikalamba ilya mumalembo yamusilo iyakuti, "Uletemwa umubiyo nga fintu waitemwa," ninsi mulalungika.

⁹ Lelo ngamulapatulula ninsi mulabembuka kibili namusangwa no mulandu wakutoba amafundne.

¹⁰ Uyo onse usunga amafunde yakwa Lesa yonse elo atobapo limo, ninsi apanga umulandu wakutoba yonse.

¹¹ Pantu uwalandile ukuti, "Wilakita bukende," ewalandile nokuti, "Wilipaya." Kansi ngataulekita bukende lelo uleipaya ninsi watoba amafunde.

¹² Imilandile yenu nemikitile yenu ileba nga bantu abalepingulwa ku mafunde ayalenga tube abantungwa.

¹³ Pantu Lesa takomfwe luse pakupingula umuntu usyakwete uluse. Pantu uluse lwalikindama pabupungusi.

Ikitetekelo ne mikitile

¹⁴ Busye mwebabwananyina, bukumunsi bulimo umuntu ngalande ukuti alikwata ikitetekelo nomba talebomba nangu kimo? Busye ikyo kitetekelo kuti kyamupususya?

¹⁵ Nga kyakuti munyinenwe nangu nkansi yenu nasapula kibili takwete nefyakulya.

¹⁶ Ngakyakuti umo pali mwebo alanda ukuti, "Mwende umutende, mulefwala mulekaba, mulelya muleikuta," Lelo takitilepo nangu fimo pali fintu balekabilo, busuma nsi bulimo?

¹⁷ Mu musango umo wine, ikitetekelo kyekafye ukwabula ukubombapo nangu fimo kintu kyafwa.

¹⁸ Nomba umo kuti alanda ukuti, "webo naukwata ikitetekelo, nanebo ndabomba imilimo iisuma." Ndanga ikitetekelo kyobe ikyabula imilimo, nanebo nalakulanga ikitetekelo kyandi mu milimo yandi.

¹⁹ Mwasumina ukuti kwabafye Lesa umo mpo. Kisuma! Nengulu sine nasyo syasumina ifyo fine kibili situtuma nomwenso.

²⁰ We kipumbu kya muntu we! Ulimukufwaya nkulange ukuti ikitetekelo kyabula imilimo iisuma kyafye?

21 Busye kinsi kyalengele Aburahamu ikikolwe kyesu abe uwalungama pamenso yakwe Lesa? Nipamulandu nemilimo isuma akitile lintu atuwilile umwana wakwe Isaaki ilambo pa kipailo.

22 Mwamona ukuti ikitetekelo kyakwe nemilimo fyalebombela pamo, kibili nekitetekelo kyakwe kyapwililike kumilimo akitile.

23 Kabili namalembo yafikilisyeyayakuti, "Aburahamu asumine Lesa, kibili nekitetekelo kyakwe kyalengele Lesa ukumumona uwalungama pa kinso kyakwe." Kabili Aburahamu aitilwe ukuti ni kibusa wakwa Lesa.

24 Mwamona ukuti abantu betwa abalungama pali fintu bakita, te pakitetekelofye kyeka.

25 Epamo pene naku mwanakasi Rahabu kilende. Lesa amumwene uwalungama pa kinso kyakwe pali fintu akitile. Apokelele inengu sya bena Israeli sibili, asyafwilisyako nokufyuka ukubomfyia insila simbi.

26 Nga filya umubili wamuntu ufwu umupasi wamuntu nga wafumamo, efintu nekitetekelo kiba ikyafwa ngatakilebomba milimo isuma.

3

Mulesunga ululimi

1 Mwebabwananyina mwileka abengi pali mwebo babe bakafundisya. Pantu mwalisiba ati fwebo fwe bakafundisya tukapingulwa ukukilapo.

2 Pantu fwebonse tulapanga ifilubo. Nomba umuntu uusilufyanya muli fintu alanda ninsi alipwililika. Kabili ninsi aba muntu uwakwata amaka yakutungulula umubili wakwe onse.

3 Tubika ikela mukanwa kakwa kabalwe pakuti alekita fintu tulefwaya. Ngatwakita ifi tulenga kabalwe ukuya konse kuntu tulefwaya.

4 Tontonkanyeni pakyombo. Nangu kikule syani, nangu kipiitwe nekimwela ikyakosa syani, kipindulwilwafye kukakafi akanono nokuya konse kuntu kensya wakyombo alefwaya.

5 Ululimi nalo efintu lwaba nangu lube kalundwa akanono akamubili, lulailumbanya ukuti lukita ifyakupapa. Tontonkanyeni fintu impanga iikalamba bayokyafye kuli kamulilo akanono.

6 Ululimi nalo lwaba kwati mulilo. Pafilundwa fyamibili yesu, ululimi lwaba kwati kyalo ikyaisulamo ububi bonse, lusalanganya ububi mu mubili onse. Lutanda umulilo mu bumi bwesu bonse ubwa pano kyalo kibili lwena lufumya uyu mulilo kumbo.

7 Umuntunse kuti ateeka imitundu yonse iya nama syampaanga, ifyonni, ifikulika nefyamuli bembra nakuba fyonse ifi tulafiteeka.

8 Lelo tapali umuntunse uwingateeka ululimi. Ululimi talutuusya ku bubifi kibili lwaisulamo no busungu ubwipaya.

9 Ku lulimi tulalumbanisisyako Imfumu na Tata, nakabili ku lulimi lumolwine tulatipwiliako abantu banensu ababumbwa mukyata kyakwa Lesa.

10 Ku kanwa kamo kene kufuma ukutipwila no kulumbanya, mwebabwananina ifi tefintu kifwile ukuba.

11 Busye kuti amensi ayasuma na yakikelekeseyafuma pa kilambe kimo?

12 Mwebabwananina, busye umukunyu kuti watwala ifisabo fya miolife, nangu umwangasi ukutwala amakunyu? Ala tekuti ikilambe kya mensi ya kikelekeseyafuma amensi ayasuma.

Amano ayafuma kuli Lesa

¹³ Ninani pali mwebo uwamano kibili uwailuka? Uyo afwile ukulanga ukuti wamano kibili muntu wailuka mumikitile yakwe isuma mu fintu akita, mukuikefya nokuba uwamano mulifyonse fintu alekita.

¹⁴ Lelo mu mitima yenu ngamwalkwata umufimbila ngansi no kuitemwa, lekeni ukuyumfwilapo nangu ukukana ikisinka.

¹⁵ Amano yamusango uyo, tayafuma ku mulu, lelo ya pano isonde, teyabumupasi lelo yakwa kiwa.

¹⁶ Pantu uko ukuli umufimbila nokuitemwa, ekuba nekimfulunganya ne misango yabubifi yonse.

¹⁷ Lelo amano ayafuma kuli Lesa yena yaba ayasanguluka, yamutende, yamutembo no bufuke. Elo kibili yakwatisya uluse yakitafye ifisuma. Tayaba namunkisia kinani lelo yaiminina pakisinka.

¹⁸ Ukuba uwalungama pa kinso kyakwa Lesa, efisabo abasopa umutende basombola lintu babyala mu mutende.

4

Mwilapanga bukibusu ne sonde

¹ Busye ifilenga mulesosa nokulapusana fifuma kwisa? Busye temukukonkelela ulunkumbwa ululwisikana muli mwebo?

² Mulafwaya ukukwata ifintu nomba tamukwata, ekyo mulepailapo na bantu. Mufimbila ukukwata nomba tamukwata, eco mupusanina no kulwa. Ekyo tamukwatila nipamusango tamulomba kuli Lesa.

³ Ngamwalomba, tamupokelela pamusango mulomba na mapange ayabi. Mulomba ifintu fyakumisansamusya mwebene.

⁴ Mwe bantu bafutatila Lesa mwe! Busye tamwaisiba ukuti ukuba bukibusu nesonde kuba ubulwani kuli Lesa? Kansi onse uwasala ukuba bukiba ne sonde aba mulwani wakwa Lesa.

⁵ Mwilatontonkanya ukuti tefisinka ifyalembwa mu malembo ifilandia ukuti, "Lesa alitutemwisywa ngansi kibili alatufwila ubukwa pamulandu no mupasi untu abika mulifwebo."

⁶ Lelo atupela ukusenaminwa ukukalamba. Ekintu amalembo yalandila ukuti, "Lesa acincintila abafilumba lelo abaikefya bena alabakwatila ikikuku."

⁷ Kansi mulenakila Lesa. Mule ansya Kiwa nao akamibutuka.

⁸ Palamineni kuli Lesa nao akapalama kuli mwebo. Mwe babembu sambeni iminwe yenu! Sangululeni imitimia yenu mweba myalu myalu.

⁹ Beni nobulanda, lileni nokuloosya. Lekeni inseko syenu syaluke imisowa nensansa sibe ubulanda.

¹⁰ Muleikefya pa kinso kya Mfumu, nayo ikamisansabika.

Ulwambo telo

¹¹ Mwebabwananyina mwila ambana. Onse uwalandia ifibi pali munyina nokumupingula, ninsi alanda ifibi pa mafunde yakwa Lesa no kuyapingula. Kansi ngawapingula amafunde yakwa Lesa ninsi tauleyanakila iyoo lelo uleyapingulafye.

¹² Kwabafye umo kapela wamafunde kibili kapingula, uwingapususuya nokulofya. Nomba busye niwebo nani uwakupingula umubiyo?

Amataki teyo

13 Umfweni nomba mwebalanda ukuti, "Lelo nangu mailo, tukaya kuli uyu nangu kuli ulya musumba. Tukayapwako umwaka umo, tuyapanga amakwebo nokupanga ulupiya ulwingi."

14 Tamwaisiba fintu ubwa mailo bukaba. Tamwaisiba ngamukaba abomi. Mwebo mwabafye nga fube fube uomoneka pa kasitafye akanono, kibili mwaluba pantu ele.

15 Fintu mulingile ukulalandia nifi, "Imfumu nga yafwaya tukaba abomi kibili tukakita ifi na filya."

16 Nomba mwebo muupanga ifilumba nokulayumfwa. Ukuyumfwa konse ukwamusango uyu kuntu kwabipa.

17 Kansi umuntu onse uwaisiba ifisuma fintu afwile ukukita, nomba takita, ninsi lubembu kuli ena.

5

Mwe bakankala cenjeleni

1 Umfweni mwe bakankala, lileni ifilamba, mwangwilepo nemisowa pamusango na makyusi ayalamisila.

2 Ifyuma fyenu nafibola, kibili nensalu syenu nasiliwa ku buswa.

3 Golide na Silufele yenu nafikwata indalawa. Nesi ndalawa sikaba ekambone wakumisinina. Sikalya imibili yenu kwati mulilo. Mwebo namuitulikila ifyuma munsiku syakulekelesya.

4 Moneni ifilambu mwafililwe ukupela ababomfi abalebomba mu mabala yenu filelilia palimwebo. Imisowa syabalesombola mu mabala yenu, nasifika mu matwi yakwa Lesa Wamaka yonse.

5 Mubwikasi bwenu ubwa pano isonde mwaleposa ulupiya pa fyakuisansamusya mwebene mweka, nokuilemena. Namuinya mibusiku ubwakwipaiwa.

6 Mupingwila abantu bakaele imilandu nokubepaya mulabepaya, nabo tabakanako nakalya.

Muleteka imitima nokupepa

7 Mwebabwananyina muleteka imitima mpaka nalintu Imfumu ik-abwela. Moneni fintu umulimi ateka umutima pakulolela, ifisabo ifisuma fipyе mwibala lyakwe. Ateka umutima nokulolela imfula yakubalilapo ne yakulekelesya.

8 Nemwe bene muleteka imitima nokwiminina abakonsa ndi, pamusango ukwisa kwa Mfumu nakupalama.

9 Mwebabwananyina, mwilaisosya pali fintu umubiyo akita, pakuti mwikapingulwa. Moneni Kapingula ali pa mwinsi.

10 Mwebabwananyina, fisendeni ngekilangililo fintu bakasesema abale-landila mwisina lya Mfumu balekita, baleteka imitima munsita ya makyusi.

11 Moneni, balya basipikisyua mu makyusi ebo twita abasyuka. Mwalyum-fwa ukusipikisyua kwakwa Yobo nafintu Lesa amulambwile pakulekelesya pantu imfumu yafulisyua uluse no kukuntikilwa.

12 Nekyakilapo mwe bamunyinane mwilalapa mulapo pakulaya iki-layo. Mwilalapa mulu ne ikyalo, nangu ikintu kyonsefye. Lelo mwebo mulelandafye ngani "Ee" ati ee nga ni "Awe" ati awe, ngateifyo Lesa akampipingula.

Ipepo lyakitetekelo

¹³ Busye umo pali mwebo ali mumafya? Napepe. Busye umo pali mwebo ali nensansa? Naembe inyimbo syakulumbanya Lesa.

¹⁴ Busye umo pali mwebo nalwala? Naete abakalamba ba mulukuta bamupepelele nokumusuba amafuta mwisina lya Mfumu.

¹⁵ Kibili nepempo lya mukitetekele likalenga umulwele ukupola. Imfumu ikamundapa nokumubelela uluse ngalibembuka.

¹⁶ Kansi Muleyebelela imembu kuli kila umo naumo nokulapepelana pakuti mulepola. Ipepo lya mulungami lilabomba na maka.

¹⁷ Eliya alifye muntu ngafwebo. Apepele pamaka ukuti imfula iloka kibili nayo tayalokele pa myaka itatu nekipande.

¹⁸ Nakibili apepele ukuti iloke nayo yalilokele nefisabo fyatwala pamusili.

¹⁹ Mwebabwananyina, umo pali mwebo nga ayaluka, afuma na munsila yakisinka elo umbi amwalulula nakibili, isibeni iki.

²⁰ Umuntu onse uwayalulula umubembu ukufuma kumibele yakwe iyalubembu, akapususya ulya muntu kumfwa kibili akafimba pa membu isingi.